


CITAMPI CYA NZAMBI

 ...? ... ànu mùshindù wà cyena-kale wutùvwà naawù kale wàwa kùkaadi bidimu byàbùngì awu, ne tudi ne kusàkidila kwàbùngì bwà bwalu abu. Ne ndi ngaanyisha misambu yà pamutù ayi, ngimbilù yònsò ewu, ne ngimbilù yònsò wa bantu-nkàâyà ewu. “Pàngìikalà nkààdi mwenzè kilòmèètà wa ndekeelu wa njila, diikisha ku ndekeelu kwà ditùkù.” Ki kwòkò aku, pàmwàpa, musòmbe ànu mwab’ewu, pàvwàbo bàwimba, ntàngila pambèlu mmòna díbà munkaci mwà kubwela; nyuunyi yònsò munkaci mwà kwimba ne díyi dikesè ne bitùlùbitùlù, byònsò bikaadi byàmbna kujika mpindyewu ne yòyi yìkaadi miyè kiikisha, bwà màalabà mu dindà kujuukayi bwà ditùkù dipyadiyà.

² Nènku ki mùdìbi nàнку ne mwoyi; matùkù a midimu àdi àpita kàtààtakà, nènku tulààla panshì pa bulàalù bwètù. Ndi mèmè muswè kwakula Nendè mu ditùkù adi, ànu kwakula Nendè cyanààna. Ndìjìngila bivwàlù byànyì pambidi, ne mbwela mu cibambalu aci.

³ Mumanyè bímpè, mwàkambà Munsantu Pòlò wa kale awu ne: “Ndi muMumanyè mu Bukolè bwà Dibìikà Dyèndè dyà ku lufù.” Bwa ne, pààbìikilàYe bwà kupàtuka munkaci mwà bafwè, nèmbiikiidiibwè bwà kupàtuka pàmwè naabò. “MuMumanyè mu Bukolè bwà Dibìikà Dyèndè dyà ku lufù.” Nciyi muMumanyè ku mèyi anyi ku byenzedi nànsha, kàdi muMumanyè mu Bukolè bwà Dibìikà Dyèndè dyà ku lufù. Ki cimwè cyà ku bintu binène bitùdi—bitùdi tutèkemena dilòlò edì ncyòci aci, ne ditèkemena òmwèpelè ditùdiku naadi, dìdi mmu. . . dibìika dinènè dyà ku lufù dyà Mukalenge wetù Yesù; ne dibìikà dyà ku lufù dyà kumpàla ditùdi naadi mpindyewu adi, dyà kuumuka ku lufù kuya ku Mwoyi adi, mu kupeta kwà Mwoyi wà Cyendèlèlè mu Yesù Kilistò.

⁴ Dindila, ne dindila dyà butùmbi, dyà bufùki bujimà, too ne ku ditùkù dyàlwàYe bwà musangu mwibìdi adi, ùfùmina mu Dyulu, Wìkalà Nzambi mwà kutùma mu movù wàdi. Nènku díbà adi mibidi yà cifwàkà eyi, yitùdi tutwilamù mikèmù mpindyewu eyi, neyìvwalè dibènga-kufwà: “Nènku netùshintulukè ne netùvwijiibwè bafwànàngàne ne mubidi Wèndè Sungasunga wà butùmbi, bwalu netùMumònè mùdiYe.”

Dìbà adi mpèkaatù ne tunyinganyinga,
mpèkaatù ne lufù byà buloba bwà mîdimà
ebu abi nebìjikè,
Mu bukòkeshi bwà butùmbi bwà bidimu
cinunu byà ditalala ebu pàmwè ne Yesù.

⁵ Nyuunyi mmindile cyôci aci. Mici mmindile cyôci aci. Bufûki bujimà bùdi munkaci mwà kubèndama ne kudila mwadi, bwindile cikondo aci, bùtwa mikèmu bwà kuvwàdikiiwbabù.

⁶ Mwanàanyi mukese wa bakàji, kwènji katanci, ùvwa mungeelè lukonko. Kwambayè ne: “Papa, buloba ebu bùvwakù ne mmwènekelu kaayi pàakabùjikijà Nzambì apu?”

⁷ Mémè kwamba ne: “Bùvwa bulenga, munanga wanyi. Bùvwa bulenga.” Ki mémè ne: “Dìngà ditùkù nebwikalè cyàkàbìdi mùshindù awu, pùùmushiibwà mulawu. Nènku dîbà adi netwikalè. . .Nebwikalè mùvwàbu ku cibangidilu amu, mpàlàdiizù munène wa Nzambì.”

⁸ Mpindyewu, tùbwelàayi buludì mu mudimu. Mwua ndyàmbridila mpindyewu, dilòlò dyà kumpàla adi. . .Edi ndilòlò diisàtù dyà ditàbuluja dyètù dikesè edi. Ne katwèna benzè kàmpanyè kàà dyondopa to. Cìdi ànu bwà kwololokakù, bwà kwambakù patòke njiyà yètù, ne kulongesha Èvànjeeliyò mu mùshindù wà cyena-kale; Èvànjeeliyò umwèumwè ùngààkalongeshà kaaba aka, kùkaadi bidimu byàbùngì, byàbùngì menemene awu, nciyikù mushintùlùle kantu nànsha kàmwè to. Ncyà bushùwà, ànu Èvànjeeliyò umwèumwè awu, kakùyì kantu nànsha kàmwè kàà dicìvwija naaku cìpyacìpyà anyì kàà dilengeja naaku dimanya to; ànu Èvànjeeliyò umwèumwè awu.

⁹ Mu masangisha a pàndì mpàtuka, mwikalè nciyi nsungulujangana bilondèshilè màngumba to, mùshindàmèene pa diikala mu màbàlaasà ne màngumba maashiilèshìilàngàne a bantu bàdi bàdisangà, udi udikànda mu mùshindù kàmpànda ku Dilongesha dyà nshìndameenu; byònsò pa kuumusha ànu dyondopa dyà kùdì Nzambì, ne, mu bushùwà bwà bwalu, kwitabuuja Mukalenge Yesù. Kàdi paùdì mwèbè mu nzùbu, bu mùdì èkèleeziyà udi bu ne ki kwèbè kumbèlu emu, udi udyùmva ànu mwà kuumusha nkoolò, ne kuyiisha ànu byùdì wèwè wela meeji ne mbilelèlà abi, nènku ki cyôci aci.

¹⁰ Nènku misangu yàbùngì, mwab'ewu, tudi, misangu yàbùngì, ne bantu bàtu bàbèngà. Katwèna mwà kutèkemena ne bantu bònsò nebàtwe ku cyètù pa bìdì bitàngilà Malongesha ne bikwàbò bitùdì naabi to. Kàdi tudi bafwànyine kwenza mwomùmwe, bu mpaasàtà wenù ùyiisha, kàdi nànsha nànkù mmufwànyine ànu kwikala mwanèètù. Ncyèna mmudyombola to. Ne bantu bònsò bàtu bàtàngila maalu mu mmwènenù mishìilàngàne.

¹¹ Nènku mu elu lumingu, bu mùdìbi ne bìvwa bìkèngela bwà mémè kushipa ndongamu wa lumingu lujimà mu Canada, bwà cipeepèlè cikolè cyà nêjè, mòna's, ncimpèèshekù mpungà wa kwanji kwalukila ku tabernacle eku bwà ditàbuluja dyà ndambù wa malòlò, dìmva mulayè pàngàakuumukà. Nènku ndi mucimanyishe ne, kakùvwa . . . “kakùvwa mudimu wà dyondopa

to; ànu bwà kuyiisha Èvànjeeliyò cyanaànà.” Ànu . . . Ne pa cyòci eci, kusangana ne, mémè kudyàmbidila ne tudi bafwànyine kwangatakù ndambù wa malòlò pa Bikondo Mwandamutekète Byà Ekèleeziyà. Bwalu mémè ndi cyà bushùwà ngiitabuuja ne tudi ne mwoyi mu cikondo cyà ndekeelu, ditùkù dyà ndekeelu, pabwipi menemene ne Dilwa dyà Mukalenge Yesù.

¹² Ntu misangu yònsò ànu nteeta kudyèla mémè mwinè ku cipimu, kaèkèleeziyà kakesè aka, mwaba kanà wònsò wùndiku ngaakula, bwalu Mukalenge mwimpè wa mu Dyulu mmumpèeshèkù kàbidi ndambù mukèsè wa mudimu wà bwambi, mu luseke lwà citàmbe-mfùkilu, munùdi bamanyè. Ne bantu bàdi bàshàala bakwàte ku díyi dyèbè, ne—ne pa nàнку bikèngela mémè—mémè kwikala ne mbàbi yàbùngi bwà díyi dyònsò díndi ngamba. Bwalu, piikalàbi ne Nyumà Mwimpè mmufile bukòlè bwà cikèèna-kumòna ne dijingulula, bùdìbo kabàyi mwà kwelakù mpatà ebu, ne pàdìbo bàkuumvwa wakula, bàdi bùm vwa ne wèwè udi ne mmwènenenu kampànda wa byùdi wamba abi, bwà cyanàànà Nzambi kí mmufwànyinekù kubènesha cilèma ne kucitùma pa buloba mùshindù awu nànsha. Nwamònu anyi? Pa nàнку bikèngela wikalè ne mbàbi yàbùngi, ne kucyèla ku cipimu mu bukènkè bwà Díyi, díbà dyònsò. Nèнку mu cyòci aci, mémè mwenzè ntùpàkànyì, ndi ndòmba Nzambi bwà àmfwilè luse, bwalu kí nku bukòlè kùndi mucyènzè to. Nèнку ndi . . .

¹³ Nèнку díbà kanà dyònsò, mu kulongesha, ne nangàngà mu byena-bwalu byà ndòndò mutùdi mpindyewu emu ebi, ne makèèlèlè dilòlò pa *Cimanyinu Cyà Nyama Wa Lwonji*, ne byena-bwalu byà mùshindù awu abi, ne dilòlò edì cyà *Citampì Cyà Nzambi*, cimanyinu cyà Nzambi, ne bikwàbò byà mùshindù awu abi, ndi ndyùm vwa pàm wàpa ne, ndi mufwànyine kwikala ne bààbùngi bàdi bafwànyine mu mùshindù kampànda kubènga kutwà ku cyòci eci, ku bìndi ndongeshapù abi. Kàdi ndi nteeta bwà kucyènta ànu mùdi . . . nciyi nCiludikila èkèleeziyà kampànda, anyi dìngumba, anyi bantu kampànda to, nànsha kakesè. Nzambi mmumanyè nàнку. Ànu mu Bukènkè bùndi ncimwèna amu, ki mùshindù wùndi ncyàmba.

¹⁴ Ne kakwèna èkèleeziyà udi utèèla Dìna dyà Mukalenge Yesù úndi nciyi munangè to. Kakwèna muntu udi mufwànyine kusòka Dìna Dyèndè, anyi udiku ne kaneemu kùdiYe, úndi mémè ewu nciyiku mufwànyine kuyila too ne ku lufù bwà kumwenzela nì nciyi cyònsò to. Ncyà bushùwà. Nànsha yèyè mwitàbe dìnà kaayi dyà ntèndeelèlu, ikalè Méthodiste, Baptiste, Kàtòlikè, cyònsò cidici cifwànyine kwikala aci, aci kí ncifwànyine kushintulula kantu nànsha kàm wè to, ncyà bushùwà, pàdiye ànu ne kaneemu bwa Mukalenge wanyi.

¹⁵ Kàdi, mpindyewu, kùdi Dizòla. Nèнку mpindyewu èkèleeziyà yònsò údi ùlongesha, pàm wàpa, cidì tèlòlòjì wabò

wa èkèleeziyà awu, bèèla meeji ne ncishindamijila pa Dizòla adi. Èè, mpindyewu, misangu yàbùngi, pa kumòna bintu abi, kabyèna ànu mu mùshindù wùndì mèmè mbala Dizòla adi to, pa nàнку dìbà adi ndi ne bukenji mu èkèleeziyà wanyì sungasunga bwà kwadija bìndì mèmè ngeela meeji ne mbilelèlà abi.

¹⁶ Mwab'ewu kwènjì cikondo kampànda, mwibaki kampànda wa nzùbu. . . Mvwa nsangayiibwa mu Milltown, ku èkèleeziyà kampànda wa ba-Baptistes wa mu Milltown, kutùvwà twenza ditàbuluja. Nènku Mwanèètù Wright ne nwènù bònsò aba, ngeela meeji, nudi bavùlùke Marion Lee. [Mwanèètù George Wright ùdi wàmba ne: "Amen."—Muf.] Nènku yèyè awu ùvwa mutàcishiibwe bikolè kùdi cintu kampànda cìmvwà mulongèshe pa dibàtiiza dyà mu màyi. Èè, kwalukilayè mwèndè, kàdi ùvwa mutàcishiibwe pa bwalu abu. Kàdi yèyè ùvwa mwibaki wa nzùbu.

¹⁷ Bufùku abu kulòòtayè cilòòtà. Mukalenge kumuleejaYè yèyè mwikàle wibaka nzùbu, ne bivwa bikèngela bwà èlèku dididiishi dyà dilòpòke mu cimanu. Kàdi kwenzekabi ne pamutù pàà kukwèlayè dididiishi dyà dilòpòke mu cimanu, kwelayè ànu lutanda cyanààna, kwambayè ne: "Abi nebiiikalè ànu bimpè." Pa nàнку pàakalwà mwena nzùbu awu, kwambayè ne: "Mushimbùle too ne ku cishimikidi; bangùlùlà."

¹⁸ Pa nàнку yèyè ùvwa mulongèshiibwe bishiilàngàne ne cidi Bible mulongèshe, ki kwambayè ne: "Mbipiciibwe ne mèmè mushimbùle cishimikidi cyònsò ne mucibàkùlùle." Mèmè kuya nendè kwèndè kumbèlu dilòòlò adi, kushààla kwèndè aku bufùku bujimà. Ki dìbà adi twètù. . .

¹⁹ Aci ncilelèlà. Bikèngela cìteekiibwè. Nènku, mu kulongesha kwà byena-bwalu ebi, mèmè ncyèna mulongeshi to. Kàdi mu cìndì mumanyè pa Cyòci aci, ntu munangè kuCyùmviija bakwàbò, ne kwikala mu bwobùmwè banyùngùlùkile Dìyi, pàdi Nyumà Mwìmpè ùCivwiija cilelèlà ku mwoyi wètù. Ne pa nàнку tudi ànu tupicila mu cikondo cyà dicyònkómoka mu dicyènza amu's.

²⁰ Ne bidi ànu mu mùshindù kampànda bu kwikishishakù mpaasàtà wetù munanga, Mwanèètù Neville ewu. Kwòkù beenyi bàdi batwèndè; mulùme ewu, *ewu*, ki udi mpaasàtà wetù, Mwanèètù Neville, mulùme wa Nzambi, musadidi mulelèlà wa Mukalenge Yesù Kilstò. Ncyèna ngamba nàнку bwalu mmusòmbe kaaba aka to. Ntu ngamba nàнку padiye kayipù to, anyì mwabà kanà wònsò, ki mwèndè mùtùye kacya mèmè ngàmumanya. Ùvwa Méthodiste wa maalu muumisha, ne mèmè mwikàle Baptiste wa maalu muumisha, kàdi tuvwa bânà bàà muntu pàmwè, ne kwenzekabi ne bùbìdi bwetu twalu kushààla bansantu babùnguluki bàà mu maalaba. Èyo, kì nàнку anyì, mwanèètù? Amen. [Mwanèètù Neville ùdi wàmba ne:

“Amen. Àlèluuyàh!”—Muf.] Pa nàнку tуди biimàne mu buloba bwètù bònsò.

²¹ Èè, twètù, tуди tupicila mu cikondo cyà dicyònkomoka mu mùshindù ewu ne: “Biikàle ànu twenza bwobùmwe muntu ne mukwèndè, pàdì Mashi a Yesù Kìlistò, Mwànà wa Nzambì, àtùsukula ku bubì bwònsò.” Pa nàнку tуди tupicila mu cikondo cyà dicyònkomoka, ne ncyà bushùwà ne tуди twanyisha beenyi bàdì batwèndèle, dilòòlò edi, kaaba aka.

²² Kaaditàbuluja kèètù kakesè aka, ngeela meeji ne nwènù nudi nudìkonka ne mbwà cinyi kakàvwa kamanyisha. Èè, kàvwa ànu kaacikondo kakesè kàà cibìlù cyà disànka bwà èkèleeziyà wetù ewu, ne ki bwà cinyi misangu mikwàbò pàmwàpa. . . Ncyèna mumanyè ne mmùshindù kaayì wàlombolà Nyumà Mwimpè to, kàdì pàmwàpa dilòòlò kampànda, kumpàlà kwà twètù kujikija kaaba aka, tуди mwà kwenza mudimu wà dyondopa, bu Mukalenge mwà kwanyisha. Nènku ndi mutwishiībwe ne Yèye neènzè nàнку.

²³ Bikèngela ngààlukilè ku Canada mpindyewu, bwà katùngunuka mu matàbuluja. Ne mùdì bònsò bamanyè, tуди ne ndongamu wa bujitu bwàbùngì, mùle ànu menemene too ne ku ditùkù dyà kuya dyàmwàmwà dyà mbù. Ne byònsò mbimana kulongolola, bwà kutwàdijila mu Durban, mu Sud. . . Mu Johannesburg, mu Àfrikè wa ku Sud, mu ngondo wa citèemà, lwà ku matùkù a ngondo àsàtù. Ne pashiishe netùtungunukè kuumukila apu tukabwela mu Durban; ne ku Inde; ne ku Pàlestinà; ne ku Luxembourg; ne ku Francfort; ne ku Transjordan; ne kwònsò aku. Netwàlukila kumbèlu pààlombolà Mukalenge bwà kwalukila apu, pààtwàmbilàYe bwà twètù kwalukila. Pashiishe bàdì bàlongolola lwendu lukwàbò bwà kuya ku Nouvelle Zélande ne ku Australie, ne kwònsò aku; ne kuya kabwela mu esètè mwàmwà, kuya ku Japon, ne ku matùngà a kuntwaku awu.

²⁴ Ndi ndyùmvwà ne èkèleeziyà yàbùngì yà mu nyùngulukilu emu, mùdì bantu, kaa, ekèlekèle, biikàle ànu bu bàdì bàswishangana bwà kwitabuuja, muntu ne mukwèndè, kadi, piine apu, bantu binunu kacya kabàyikù banji kuumvwà bàmba bwà Yesù bwà wàbò musangu wà kumpàla to. Ne pa nàнку ndi ndyùmvwà ne. . . Adi ndyànyì didyùmvwà’s, dyànyì mèmè nkààyaanyì ne, mbujitu bungoomekela bwà kubàtwàdila Mukenji, ne mwànyì pàànyì mwònsò. Nènku mpindyewu pàndì. . .

²⁵ Ngánjì ngàmbè cyàkàbìdì mpindyewu, bwalu, nkusòmbe kaaba aka, ba-Méthodistes, ba-Baptistes, beena Kàtòlikè, ba-Presbytériens, beena Mpenta, ba-Pelèrins de la Sainteté, ba-Nazaréens, basòmbe mwab’ewu, ne ki mutùdì bènza. . . Ndi mèmè ngiitabuuja ne ki mwikalàbi mu Dyulu, mu mùshindù kampànda, twètù bònsò cisumbù bàsòmbe mwaba awu.

26 Nènkù mpindyewu, pa mayiisha aa, bu mùdì *Cimanyinu Cyà Nyama Wa Lwonji*, ne leelù ewu pàdiku cibwejàkàjì búngicì . . . Nuvwa bacyǔmvwè, makèèlèlè dilòòlò awu anyì? Piiikalàbi ne nuvwa bacyǔmvwè, ambààyi ne: “Amen.” [Disangisha didi dyamba ne: “Amen.”—Muf.] Mpindyewu netwikalè mwà kwakula dilòòlò edi pa cimanyinu cyà Nzambì, anyì: *Citampì Cyà Nzambì*. Mpindyewu tudi tufika ku dyumvwa ne . . .

27 Mpindyewu, ncyènà ànu nteeta bwà kuyiishila mu Bibles yìbìdì ayi to; umwe mmukùmbàne. Kàdi ndi ne umwe wa ku yòyi mwab’ewu mu kiipàcilà kàà mèyi makesè a kwinshì kwà dibèjì awu, ne bikwàbò, a dileedila, bu muntu mwà kwela lukonko. Nènkù mpindyewu, mààlabà dilòòlò, bu Mukalenge mwà kwanyisha, paanyimà pàà diyiisha . . .

28 Dilòòlò dyà kumpàla, pa *Bikondo Mwandamutekètè Byà Èkèleeziyà* bwà kumòna mwaba wutùvwà, wutùdì, bilondèshile myaba, mu ditùkù ditùdì ne mwoyi.

29 Makèèlèlè dilòòlò, pa mwenzàvì mutàmbe bunène udikù pa buloba apa: *Cimanyinu Cyà Nyama Wa Lwonji*.

30 Nènkù, dilòòlò edi, pa dibènesha dyà ditàmbe bunènè didiku pa buloba: *Citampì Cyà Nzambì*.

31 Mpindyewu, mààlabà dilòòlò, nêngiikalè mwà kunùpèèsha mpùngà wa kungaasakù mikete. Mààlabà dilòòlò neikalè bwà nkonko, ne bintu binùdì kanùyì nuumvwa pa bìdì biyiishìibwe. Nudi badileejè balùmè ne bakàjì bakàlàngà mu mùshindù mukùmbàne, anyì beena Kilstò mu mùshindù mukùmbàne, mùndì mufwànyìne kwamba, bwà kushààla bapùwe mu cikonko cyà masangisha. Ndi muswè bwà nùfundè, mààlabà dilòòlò panwàlwà mu èkèleeziyà, ne nwàlwayikù ànu kumpalà kwà dîbà ne mwènù mwònsò, bwalu mémè néndwè kumpalà kwà dîbà bwà kubala ne kuyàndamuna mu mùshindù kampànda, lukonko lwèbè pa Mifùndu alu.

Pashìishe mu dyàlumingu mu dindà nekwikalè kàlaasà kàà Dyàlumingu kàà pa ciibidilu.

32 Mu dyàlumingu dilòòlò, pàmwàpa mu dyàlumingu dilòòlò, nekwikalè mudimu wà kubàtiiza. Kùdì ndambù wa bantu bàà kubàtiiza. Ne pashìishe mu dyàlumingu dilòòlò, netwikalè pàmwàpa, anyì mwà kwikala ne diyiisha dyà Èvànjeeliyò anyì mudimu wà dyondopa. Netùmonè cyònsò cyàtùlombolà Mukalenge bwà kwenza dilòòlò adi aci, bwà dyàlumingu dilòòlò, diyiisha bwa dîbà adi.

33 Mpindyewu tudi tusangana, kumpalà kwà twètù kulenga bwalu ebu, ne: “Kakùvwa muntu nànsha umwe mu Dyulu, muntu nànsha umwe pa buloba, anyì muntu nànsha umwe mwinshì mwà buloba, uvwa mukùmbàne mwà kwangata Mukàndà, anyì kuWùbuulula, anyì kukòsa Bitampì byàwù to.” “Muntu nànsha umwe!” Yone ngwàkacimòna mu

Bwàkabuulwibwà. Ne tudi tulongesha Bwàkabuulwibwà mpindyewu. “Nènku Yone wàkadila mwadi. Kàdi kùvwa Mwànà wa mùkòòkò uvwa mushipa, kacya ku difùkà dya dyulu ne buloba; Yèyè nguvwa mukùmbànyine bwà kulwa kwangata Mukàndà mu cyanza cyà dyàbalùmè cyà Ewu uvwa musòmbe pa Nkwasa wa butùmbi, ne kubuulula Mukàndà, ne kukòsa Bitampi byàwù.” Ne Mwànà wa mùkòòkò awu, mu bushùwà bwà bwalu, ùvwa n’Yesù Kilstò, Mwànà wa Nzambi. Ne piikalàbi ne Yèyè ngudi Umwèpelè udi mukùmbànyine . . .

³⁴ Yèyè wàkasòmbelakù pànwapa pàmwè neetù, pa buloba apa, mu mmwènekèlu wa Muntu. Nzambi ngwàkasòmbela munda mwà Mwan’Endè, Yesù Kilstò, bu Nzambi-Muntu.

³⁵ Ne Wàkaalukila mu Butùmbi, ùshiya Dîyi edi ne: “Mu katanci kakesè bàà pa buloba kabààkuMmòna kàbìdì to. Kàdi, nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà buloba.” Mupèsonà wa Nyumà Mwimpè, Nzambi, wàlukila mu mmwènekèlu uvwaYè . . . Yesù wàkamba ne: “Ndi mufùme ku Nzambi; Ndi nya ku Nzambi.” Ùvwa mupàtùke mu Cyendèlèlèlè, mupwekè mubwelè mu cikondo; kupàtuka mu cikondo, kwalukila mu Cyendèlèlèlè.

³⁶ Kàdi bàà pa buloba kabààkaMumanya to. “Yèyè ùvwa pa buloba, bàà pa buloba bààkafùkiibwa kùdiYe, kàdi bàà pa buloba kabààkaMumanya to. Kàdi bònso bààkaMwakidilà abu, bóbò . . . wàkabàpèesha bukolè bwà kulwabò bânà bàà Nzambi.”

³⁷ Nènku, mpindyewu, mpindyewu Yesù Kilstò ùdi neetù: “Kàdi katanci kakesè bàà pa buloba kabààkuMmòna kàbìdì to, kàdi nwènù nenùMmònè.” Mpindyewu nekwikalè bàà pa buloba biikalà kabàyi mwà kuMumòna, kàdi nekwikalè *yèyè* kampànda udi cyà bushùwà ùmòna. “Bwalu Mèmè,” *Mèmè* mmupinganyi muleeji muntu, “Mèmè nèngiikalè neenù, munda mwènù mene, too ne ku ndekeelu kwà buloba. Kàdi nwènù,” mwena kwitabuja, “nenùMmònè too ne ku ndekeelu kwà buloba.”

³⁸ Ebèlù 13.8, mmwambè ne: “Yesù Kilstò ùdi umwèumwè awu makèèlèlè, leelù, too ne kashidi.” Mutàngilaayi mu bukolè Bwèndè, Mukalenge Yesù Kilstò umwèumwè awu, dinanga dimwèdimwè adi, maalù a kukèma àmwèàmwe awu, bimanyinu bimwèbimwè byàkaMufilà Yèyè abi, kacya ànu byàtùngunuka. Ùdi mu Mubidi musokòme mpindyewu, Mubidi wà bàdi babiike ku lufù, buumùke ku mpèkaatù bayè ku Mwoyi. Yèyè ùdi ne mwoyi munda mwàbò.

³⁹ Nzambi mu Butùmbi Bwèndè bunène, Nzambi ùdipwekesha milongo, ùmuka ku Dikunji dya Kapyà, uvwa muntu nànsha umwe kàyi mwà kulenga awu, kupweka mu mmwènekèlu wa mubidi wà buntu mùvwàye mwà kulenga, kàdi Wàkalediibwa kùdi virgò. Pashiishe, kupàtuka amu, kufila mwoyi Wèndè bwà kupoopediibwa pa nkùrusè, bwà kukezula muntu mubi, ne

Ūvwa mwà kusòmbela munkaci mwà bantu mene. Dinanga kaayi didi naadi Nzambi bwà muntu, mu mùshindù wà Yèyè ùDivungulula ùlwa panshi, bwà kwenza njila musukula bwà Wàmòna mwà kunanga ne kusòmbela munkaci mwà balùme ne bakàjì. S'mbilenga be. Èyowà. Ki Taatù wetù nyawù.

⁴⁰ Tùyiikilààyikù Nendè mpindyewu mene, Mwena Mukàndà awu awu, kumpàlà kwà twètù kubuulula mabèji.

⁴¹ Taatù wetù wa mu Dyulu wa musàngeelu, nyewù tulwa Kùdì, dilòòlò edi, mu mùshindù wùtu mutùlaya awu ne: “Nwènù baNdòmbe cintu kanà cyònsò mu Dìnà Dyànyì, cyòci aci ki cìNgènzà.” Pa nàнку twètù katwènàkù ne bwakàne to, katwènàkù ne citùdì mwà kulàmbula to, tudi tulwa ànu mu Dìnà dyà Mukalenge Yesù, bamanyè ne Wèwè ngwàkalaya bwà kutèèlejila ku Dìnà edi.

⁴² Nènku tudi tuKulòmba, bamanyè ne tudi kaaba aka, bwa kukenketa dilòòlò edi, cimwè cyà ku byena-bwalu byà bitàmbe kwikala byà pabwàbì byà mu ditùkù edi: *Citampì Cyà Nzambi*. Taatù, tudi tulòmba, Mukalenge, bamanyè ne kasumbù kakesè kàà bantu kàdì kasangìle mwab'ewu aka, bu mèmè mwà kubàpàmbula, nèndumbululè bwà bwalu abu mu Ditùkù dyà Cilumbulwidi. Ne dilòòlò dishààle, pa: *Cimanyinu Cyà Nyama Wa Lavonji*. Èyì Taatù, tudi tulòmbakù bwà Wèwè kulombola ne kuludika Mèyì awu. Swàku bwà kaCìpinganyi cyanàànà to, kàdì Cikumbajèku cìvwàCi cipàngadikila bwà kwenza pààkafùndiibwàCi mu Mukàndà apu.

⁴³ Nènku mpindyewu lwàku, Wa Cijila, pàtulàku Dìyì dyà Nzambi mu Bible, Dyàkwilèku ku mishikù yà cifwàkà, mu maci a cifwàkà, ne tengùlàku ne dyakula ne ditèèleja, bwà twamònakù mwà kukùmbaja cintu kampànda mu kudìsanga eku, dilòòlò edi, bamanyè ne kùdì mwà kwikala bàmwè kaaba aka, bu buloba mwà kushààla kàbìdì cidimu cimwè, bìikalà kabàyi bàà cifwàkà pa buloba to.

⁴⁴ Nènku mpindyewu tudi tusanganyiibwa ku nzùbu wa dilongolola dyà bilèma, ku nzùbu wa Nzambi, kùdì kùkèngela bwà twètù kulwa bwa dilongolodiibwa. Nènku Nyumà Mwìmpè àndongòlòlèku, ne àkangè mukana mwanyi, muWàkakàngà mukana mwà nyama yà ntambwe amu, bwà Danyèlè. Ne Wèwè udi mumanyè mwoyi wànyì, bu mèmè mwà kwamba dìyì dimwèpelè dyà dibèngàngàne anyì mu mèmè mwìnè. Nyumà Mwìmpè àlaabèku maanyi ku Dìyì dyònsò. Mèmè ndi mwimàne ànu bu dibùngù cyanàànà dyà munda mutupù; nènku Yèyè àkulèku Dìyì dyà Nzambi, dilòòlò edi, bwalu myoyi yètù yidì ne nzala yidì yìjinga ne mwoyi mujimà bwà kutèèlejila KùdìYe Yèyè. Nènku Yèyè, Wàkafùnda Bible awu, àlwekù ne àMùmvwijè basadidi Bèèbè badipwekèshe aba. Tudi tulòmba nùнку mu Dìnà dyà Yesù. Amen.

45 Mpindyewu bwà pàà kushìndamijilakù ndambù bitùdi twamba, bwà kubanga dilòòlò edi, ne: *Citampi Cyà Nzambi*.

46 Kanùpu mwoyi to, mààlabà dilòòlò, ne tudi baswè bwà ùlwa ne lukonko lwèbè. Ne ùlùfùndè bitòòke tòò, ne ùlùtèèkè pa cibùmbà cyà ku cyambilu, kumpàlà kwà dîbà, anyi pa cyambilu, kumpàlà kwà dîbà ne mwèbè mwônso. Mpindyewu cyena-bwalu cinène citùvwà naaci dilòòlò dishààle. . .

47 Dilòòlò dyà kumpàla, kumpàlà kwà dyà ndekeelu, cìvwa ng'Èkèleeziyà ne cikondo cyà èkèleeziyà, mutùvwà bamòne Yesù mwimàne munkaci mwà Bitèèkedi byà myèndù byà Ngòlò Mwandamutekète, bwà kumwèka bu dibwe dyà yaspà ne dyà sardoine, ntwàdijilu ne ndekeelu, Luubènà ne Benyàminà. Mònaayi bitèèkedi byà myèndù mwandamutekète, anyi biimanyikidi byà myèndù mwandamutekète abi biimàne, ne mwanzankòngòlò kumutù kwàbi, bu cipungidi, ne mwàkamwènekàYe. Ne Dîyi Dyèndè divwa Dîyi dyà máyi àbùngì, bônso bàbidi Kilistò ne Èkèleeziyà, bàakula pàmwè; mwikàle ne mwonji wa ngòlò mujìngila pa citùpà cyà pa cyàdì cyà Èkèleeziyà, mubwikilepù, mukwàte, Èvànjeeliyò mukwàte bwakànè bwà Kilistò pa Èkèleeziyà. Mwimàne pa cishimikidi cyà cyamù cyà mitakù, cilumbulwidi cyà Nzambi; Nzambi wàkiicikija dilumbulwisha Dyèndè dyà Nzambi pa Kilistò, ne Yéyè wàkakènga, uvwa kàyi mwenzè bubì pa mwaba wà mupiile awu.

48 Pashiishe, pa kumòna mwàkabangàbi ne èkèleeziyà wa Efèsò; pashiishe cikondo ciibìdi cyà èkèleeziyà; cikondo ciisàtù cyà èkèleeziyà; cikondo ciinàyi cyà èkèleeziyà, bidimu cinunu ne nkàmà yitaanu byà bikondo byà mîdimà; kupicila mu Cikondo cyà Luther; ne mu Cikondo cyà Filàdelèfiyà; ne kuya kabwela mu Cikondo cyà Laòdikiyà, cikondo cyà ndekeelu aci.

49 Pa kumòna mu Dipungila Dikùlukulu, mùvwàbi bifwànyikija ànu menemene ku ntwàdijilu, mu Solòmò, too ne kupicila mu cikondo cyà Aakàbà, cikondo cyà mîdimà aci. Ne kujandula ne, bu Izàbèlà, Aakàbà, muyiishi wa ku mikàlù awu, anyi muntu wa dikàsà munda dikàsà pambèlu. Byenzè ànu bu bààbùngì bàà ku bidimba byà civùmvù byà èkèleeziyà leelù ewu abi, bantu, bàà dikàsà munda dikàsà pambèlu; mu èkèleeziyà leelù ewu, mààlabà udi mwà kutèkemena ne nebiiikalè mwaba kanà wónso; bàdya cibàngà, bàlekelela biibi bwàshi, bènda pàmwè ne bàà pa buloba, cibì bàdibiiikila mùdìbo beena Kilistò. Nènku Aakàbà, mu ngiikàdilù awu, kunangayè kakàji kampànda kalenga kwisù, nànsha mùvwàku ne lwonji luya ne mwa nàka. Ki kumusèlayè, ne yéyè kubweja dikuukwila dyà mpìngù mu Izàlèlèlà, ànu menemene mu cikondo cyà Izàlèlèlà cyà citàmbe kwikala cyà mîdimà aci, cikondò cyà mîdimà. Mpindyewu, tudi tusangana ne bààkapàtukamù ne ciimanyikidi cyà cyamù cyà mitakù, ne bènda bàlwa, ne ndekeelu wa byónso

bàà civùmvù, too ne mwàkalwà Nzambì kubàtwila mukana Mwèndè ne kwitaba bàà Bisàmbà byà bendè.

⁵⁰ Nènku mpindyewu tudi tusangana ne bààkabangila ku cyà kumpàla, Èkèleeziyà wa—wa Efèsò, ku ntwàdijilu aku, mu cikondo cyà èkèleeziyà aci; cikondo cyà èkèleeziyà cyàkalondà cyàkabanga kukwàta mashika ne kulwaci civùmvù; kutùngunukaci ne kubwela, ne cikondo cyà mîdimà. Ne ànu mwàkadibi mu—mu ditùkù adi, Aakàbà ùsèla mukuukwidi wa mpìngù, Izàbèlà, ne kubwejayè dikuukwila dyà mpìngù mu Izàlèèlà; pashìishe cyena-Mishòònyì kusèlanganaci ne cyena-Loomò, cyena-Kàtòlikè, ne kubwejacì dikuukwila dyà mpìngù mu èkèleeziyà. Kupàtukilaci mu Martin Luther; kupìcilaci mu John Wesley; kulwaci kubwela mu Mpenta; ne kupàtukaci, kutwidiibwabò mene ne mukana mwà Nzambì; ne Nzambì ùkaadi ùkùdimukila cyàkàbidì kùdì beena Yudà, ànu menemene's.

⁵¹ Mpindyewu, ndi mumanyè ne ndi... Mpindyewu, nwènù, nudi nwamba ne mèmè ndi mulongeshanganyi wa ne bifwànyikijilu. Bwà aci kaayi ncyà bushùwà. Bwalu, ndi—ndi mumanyè cintu cìmwèpelè ne, mèmè nya mutàngile kùdì mundidimbì wànyì awu ne mmòna cìdì mundidimbì wànyì mufwanàngane naaci, ndikù ne cingènyingenyi cyà cìndì mèmè mufwanàngane naaci; ní ndi nyama wa makamà ànaayi, anyi nyuunyi wa masàlà, anyi cyònsò cìdìku aci, necìfilè mundidimbì.

⁵² Nènku Dipungila Dikùlukulu òvwa mundidimbì wà Dipyadìpyà. Twacimònu makèèlèlà dilòòlò awu, mu Bwàkabuulwibwà 12, mukàjì udi ne mikemji mwinshì mwà makàsà èndè awu, ngondo ne dībà kumutù kwèndè, bu cifwànyikijilu. Mùshindù wùdibi ne, bintu byònsò abi, Ebèlù nshapità wa 11 ùdì ùtwàmbila ne, byònsò abi bìvwa bifwànyikijilu ne mindidimbì. Ngeela meeji ne, Ebèlù 12, mmwambè yèyè ne: “Bu mùdibi ne tudi banyùngulukila kùdì ditutu bunène nùku dyà bantèmù, tuteekàayi ku luseke bujitu bwònsò, ne mpèkaatu udi utùcìncimika ànu bipeepèle nùku, bwà twamòna mwà kunyeema ne lutùulù lubilu lùdì lutùtèekela kumpàla.” Mpindyewu, tudi bamòne bintu abi. Pashìishe makèèlèlà dilòòlò...

⁵³ Tuvwa bangàte mwab'ewu, bwà kujandula, anyi—anyi, dilòòlò òvwa kumpàlà kwà dyàshàadi edi. Tudi tusangana dībà adi, ne, èkèleeziyà wa kumpàla, mwàkabangaye. Wàkabanjiiibwa ne wàkabanga mu Ditùkù dyà Mpenta, dyàkiicikijiibwa Nyumà Mwimpè pa beena kwitabuuja adi. Kì twètù kumòna dibìnduluka dyà beena kwitabuuja abu, ne mwàkenzàYe pa bóbò, ne byàkenzàbo, ne bimanyinu ne maalu a kukèmà byàkabàfilà.

⁵⁴ Pashìishè tudi tusangana, ku ndekeelu wa cikondo cyà èkèleeziyà aci, bidimu bitwè ku nkàmà yisàtù, bàakajuula

ngiitàbùùjilù mupàm bwishi munkaci mwàbò, ùbìlkidiibwa ne, “dilongesha dyà—dyà beena Nikàlàwù.” Pashiishe twètù kusangana ne, bivwa “byenzedi,” ku ntwàdijilu.

Mu cikondo cyà èkèleeziyà cyàkalondà, kulwabi “dilongesha.”

Ne pashiishe kulwaci “dikèngeshangana,” mu cikondo cyà mîdimà.

⁵⁵ Pashiishe kupàtukakù ku luseke lukwàbò, lwà apa nùnkù, twètù kusangana ne ncitooyisha ànu pàmwè ne maèkèleeziyà a cyena-Mishòònyi àkapàtukà awu.

⁵⁶ Pashiishe twètù kwalukila cyàkàbìdì dîbà adi ne kusangana mùdì byà civùmùvù byònsò abi biikàle kaaba aka ku ndekeelu kwà cikondo, ku *elu* luseke, mwàkakwàtàbi byònsò abi mashika. Ànu mwàkenzàbi kùdì beena Yudà amu, ki mùdìbì kàbìdì munkaci mwà kwenzeka kùdì bàà Bisàmbà byà bendè emu; bàkwàta mashika pàyaayàbo mùshindù *ewu* apu, mundidimbì, bènda bàbwicidila.

⁵⁷ Ànu menemene mwàkadìbì amu, matùkù a Wesley, ki twètù kucyàngata makèlèlèlè dilòlò awu, ne Luther. Ditàbuluja kaayi dinwàkapetà's wè, kàdì, mu cipungu cyàkalondà, kubangaci kukwàta mashika. Citùpà cyàkalondà, kutàmbacì kukwàta mashika. Kàdì mpindyewu cìkaadi ànu mushikì wà twitabàayi ne bintu byà kwìsùkwìsù. Ki cyònsò cìdìku ncyôci aci. Nwamònu anyì? Ne mùshindù awu ki wùdìbì too ne ku ndekeelu. Pa nànkù aci nciitùdì balongèshe.

⁵⁸ Mpindyewu, ne ntèmà mpindyewu, tèelejàayi, bwà nwikalè batwìshùibwe bwà kuvùluka. Ncyèna mpiisha beena Kàtòlikè to, ne ncyèna mpiisha beena Mishòònyi to, bwalu mu byònsò bibìdì abi mùdì mùpàtukà Dimiinu dyà Nzambì, ku disungula. Aba bàdì balongolwela Mwoyi nebàWùmòne ne nebàbwelèMu. Aba bàdì kabàyi mwà kumòna to, bàdì bèndela mu mîdimà. Aci nciitàngile Nzambì. Nzambì ngudi ucyènza. Yèyè wàkadìcipa ne wàkalaya Abraham ne Úvwa mwà kumusùngila yèyè ne Dimiinu dyèndè. Mpindyewu, wèwè ne Dimiinu dyà Abraham, udi ne Mwoyi wà Cyendèlèlèlè, kwàjiki, ne nudi bapyànyi bilondèshile mulayi. Ne byònsò nku ngàsà ne ku disungula dyà Nzambì.

⁵⁹ Mpindyewu mònaayi, mu cyôci eci kaaba aka. Nènku mémè ndi mîngà misangu ànu. . . pàmwàpa mémè muiyishè bipite, anyì mulongèshe bipite. Kùkaadi bidimu. Edi ndisangisha dyà ntwàdijilu dyà dilongesha dîndì mwenzè, mu bidimu bitwè ku mwandamukùlù. Ne cidì ànu ndambù, pàmwàpa ne ndambù wa dimòmà, pa tuumyaba kampànda. Dîbà kanà dyònsò dyùdì—dyùdì. . . Ungeelè lukonko kanà lwònsò lùdì uringa kungeela alu; lùtèkè pa cibumbà cyà ku cyambilu, anyì pa cyambilu, ne nèngiikalè ne disànkà dyà kulùpeta.

⁶⁰ Mpindyewu mōnaayi. Kàdi cyōnsò cīndi mumanyèPu, ncitukù muCìlongèle kùdi muntu, ku sèminèrè kampànda nànsha. Ntu musambile too ne pāndi mupetè dibuulula dyàci, ne bìvwa bìkèngela bwà kukùmbananganaci ne Dìyi dyà Nzambì.

⁶¹ Mu Dipungila Dikùlukulu, bàvwa ne mishindù yisàtù yà kumanya mukenji kampànda. Mùshindù wà kumpalà wùvwàbo bàjandula, anyi wùvwa mufùnda mu mikenji; cintu cìvwa cìlondà cìvwa mmupròfetà; anyi cintu cìvwa cìlondà cìvwa ng'Ulimà-Tuumimà. Mpindyewu mulongeshi kanà yōnsò ewu mmumanyè cìvwa Ulimà-Tuumimà. Úvwa mbu—mbukènkè bùvwa bùpenyà pa cibwikilu cyà pa cyādì cyà Aalònà, cìvwàbo bakùdike mu ntempèlù. Mpindyewu, bu mupròfetà mwà kwamba cipròfetà, ne Bukènkè abu kabùyi bùpenya pa Ulimà-Tuumimà to, cìvwa ncyà mafi. Ki cìvwa dyandamuna dyà kùdi Nzambì ne, “Cìvwa cyà mafi.” Pashiishe bōbò. . . Mulòòci wa bilòòtà kampànda yèyè mulòòte cìlòòtà, ne kaciyi cìpenya pa Ulimà-Tuumimà apu to, cìvwa ncyà mafi.

⁶² Mpindyewu, Ulimà-Tuumimà ùkaavwa muumùshìibwe, mu awu mùshindù, kàdi *Eci* ncidì Ulimà-Tuumimà wa Nzambì mpindyewu, Bible. Mupròfetà, anyi mulòòci wa bilòòtà, anyi ní ncinyi cyōnsò, anyi mulongeshi, yèyè kàyi mushindàmijile dilongesha dyèndè dikwàtakaja adi ànu menemene pa EMU MMŪDÌ MUKALENGE WÀMBA to, mèmè ncyèna nciitabuujakù to, nwamònu's. Bìkèngela cìlwe buludì *Apa*, kuumukila ku Genèsè too ne ku Bwàkabuulwibwà, kaciyi ànu kaaba kàmwè cyanàànà to. Bìkèngela cìpicilè mu Bible mujimà ne cìMutwàngàje ànu mujimà menemene. Èyowà's, mukalenge. Bìkèngela cinwanganè ne bikwàbò byà Cyòci aci, ne cìCìswikàkàjè cyōnsò pàmwè. Wèwè kùyi wenza nànkù to, udi mufwànyine kwangata cintu kampànda kwamba ne mmpùrgàtoriyò, kàdi kuyiishila cyena-Kàtòlikè mu Bible. Kàdi cidì ne cyà kunwàngana ànu menemene kuumukila ku Genèsè too ne ku Bwàkabuulwibwà, kuvwija cimfwànyi aci citòòke tòò. Ncyà bushùwà.

⁶³ Nènku Nyumà Mwîmpè n'Yèyè Udi ùkulongolwela cimfwànyi eci, wèwè ànu muMulekèle ùcyènza. Yèyè ngwàkulombola e kukubweja mu Bukènkè bwōnsò. Ki mùdi Bible mwambè. Yesù wàkamba ne Yèyè nguvwa mwà kucyènza.

⁶⁴ Mpindyewu mōnaayi patùdì. . .Kàbidì, mpindyewu, tudi tusangana cìvwàbo bènza kuntwaku. Pashiishe, paanyimà pàà mutanci, kupetabò dilongesha. Kupetabò dikèngeshiibwa. Kupàtukabò.

⁶⁵ Ki pashiishe twètù kufika ku dijandula ne, mu edi ditukù mpindyewu, Bible wàkadyànjila kwamba ne kuvwa mwà kulwa cikondo cìvwa bantu mwà kupeta cimanyinu kampànda, ne cimanyinu cyà nyama wa lwonji.

⁶⁶ Musangu wónsò wùvwàku ànu kantu kakesè kàjuuka mu ditunga, bantu bónsò bàvwa bàmba ne: “Ki cimanyinu cyà nyama wa lwonji ncyôci aci.” Pàvwa mukùlumpè. . . Nèicivwa mfùminakù ku dijidiibwa mu bwambi mu èkèleeziyà wa ba-Baptistes, pàngaàkumvwà bàmba bwa N.R.A. Èè, bantu bónsò kwambabò ne: “Ki cimanyinu cyà nyama wa lwonji ncyôci aci.” Ki pashiishe cyónsò cìvwà cìbanga ne: “Ki cimanyinu cyà nyama wa lwonji ncyôci aci.”

⁶⁷ Kàdi mpindyewu bàdi bàmba ne: “Ki Russie ukàadi ulwa ewu, communisme, Ki cimanyinu cyà nyama wa lwonji.” Kàdi, s’mmafi. Kí ncmanyinu cyà nyama wa lwonji nànsha. Bible ùdi wàmba cìdi cimanyinu cyà nyama wa lwonji. Cimanyinu cyà nyama wa lwonji kí nkwaka kampànda munène wa ùlwishangana ne maalu a ntèdeleelu ne ùlwishangana ne ditunga mwikàle ùjuuka mùshindù awu to. Communisme kí n’Russie to; communisme nnyumà kampànda. Bidi byónsò. . . Kabyèna—kabyèna bikèngela bwà twètù kutàcisha meeji bwà Russie to.

⁶⁸ Dibola dyètù sungasunga ndìdi ditùshebeyà. Communisme mwikàle ùkwàta mudimu munkaci mwà èkèleeziyà yètù ne bikwàbò byónsò, aci nudi bamanyè, mu bilongelu byètù, mu mbànzà yètù, mu myaba yónsò, mu ditungà dyètù. Cintu cyónsò mu kaabujimà ncidya kùdi cìshi. Kayuunyi kakünze mu cyàdi kàdi kàtonkonà ne mwìnù cimuma cyà pomme kí nkàdi kacyenzela bibi to; cìshi cidyadyà lukunde cidi munda mwà lukunde. Ki mùdi bwalu nàнку, cìdi ànu ndibola dìdi munkaci mwètù twètù biinè adi. Tuya, tudibiikila mutùdi beena Kilistò, kàdi twenza maalu bu bàà pa buloba, ne tuvwàla bilàmbà bu bàà pa buloba, ne twabanyangana maalu ne bàà pa buloba, kàdi tudibiikila. . . Bàà pa buloba byà nàнку awu’s bikaadi bibèndèshe ku mwoyi ne bibàtondè. Ne kí ng’ànù bàà pa buloba nkààyaabò to, beena Kilistò bààbúngì pàabò, mbibàtondè. Èyowà.

⁶⁹ Misangu yàbúngì nkàadi mwambàmbe ne: “Nzambi ènzèku bwà kùlwe ditùkù dèikalà bantu cìvwà cikèngelàbo kwikala aci. Bu mèmè mbèngangana Nendè, mvwa mufwànyine kwamba ne ndi mbèngangana Nendè, mufwànyine kubèngangana Nendè mu cyónsò cìndi mufwànyine kwikala aci.” Kàdi mèmè ndi mutwè ku Cyèndè, ne ndi muMunangè, ne ndi mMwitabuujà. Ne—ne mwoyi wànyì wùdi mu byanza Byèndè, bwà kwenza naawù cyónsò cìdiYe muswè aci, bwalu ndi ngiitabuujà ne bwena Kilistò ki Bulelèlà. Aci ncyà bushùwà. Ndi ngiitabuujà ne ki Bulelèlà.

⁷⁰ Mu kwenza kwà ngendu pa buloba, ne kucitàngila mu tusùmbù tushilèshilàngàne, ne bikwàbò, babìjuudi bààbò mbafwè ne bàsanganyiibwa mu lukità, ne bàdi ne tèlòjì. S’ncyambè kwikala pòpò apu pàdi èkèleeziya wa beena Kilistò mwimanyina pèndè naaci, nànsha nàнку.

71 “Kàdi aba bàdi bamanyè Nzambi wabò nebènzè byenzi byà bulòbo.” Ne Bukolè bwà Yesù Kilistò mubiishùbwe ku lufù bùdi ne mwoyi munda mwà muntu. Ncyà bushùwà. Yéyè kî mmufwè to; mMubiike ku lufù. “Nèngükalè neenù, munda mwènù mene, ne bintu bîNdi ngenza nenùbyènzè pèenù.” Èyowà’s, mukalenge.

72 Dìbà adi bàà pa buloba bàdi bàtàngila bàmba ne: “Dikolesha dyà maalu.” Nuvwa bamòne mwaba utwacyàngaci makèlèlè dilòlò awu, ku dikwàcisha dyà Nzambi.

73 Mpindyewu, tudi tusangana ne cintu cyà kumpàlà cikaadiku cijuukè bwà kwenza mmwènekeli kampànda wa nyama wa lwonji, nànsha bìshi, anyi. . . *Nyama* ùdi ùmvwiya “bukolè.” Tudi bakenkète bimfwanyi byònsò ne bikwàbò byònsò, makèlèlè dilòlò awu, bwà kujaadika ne nyama wa lwonji awu mbukolè. Ne yéyè kààkapàtukila mu Russie nànsha. Wàkapàtukila mu Loomò. Aci ncyà bushùwà. Wàkafùmina ku Loomò.

74 Ne kacìwà—kacìwà nkasumbù kàà bantu to. Kacìwà mbulongolodi bwà cidiidi to. Mbulongolodi bwà maalu a ntèdeleelu. Ùvwa ng’èkèleeziyà uvwa “musòmbe pa tukùnà mwandamutekète,” mwikàle ne muntu umwèpelè uvwa ne bukòkeshi pa buloba bujimà, mwòmò amu. Cyà bushùwà menemene. Ne tudi tusangana ne mmukàji kampànda, ne twètù kumufwanyikija ànu bitòoke tòò. Nciyi ngàngata dyanyi dyumvwija sungasunga nànsha; mbala ànu Bible cyanààna. Ne, kakwèna mungà mwaba pa buloba, cingà cimenga pa buloba, cidi cikòokeshà pa buloba bujimà nànsha. Mu ditungà ne ditungà dyònsò, kashoonyi kàà cyena-Loomò aku kàpàtuka ànu bu mu bânà bàà nkàsà dikùmì bàà mu cikèenà-kumònà cyà Danyèlè, ne tudi tujandula ne cìwà n’Cimenga cyà Vatican.

75 Beena Kàtòlikè bàà lulamatu dikùmì ne bàbidi bòbù bakesè bàvwa basòmbe mwaba ewu makèlèlè dilòlò. Bàvwa basòmbe bapùwe ne batèèlèje. Bàdi ne meeji matòoke. Bàdi ne nzala.

76 Mpindyewu, wèwè kwèna mwà kukòkangana ne nsaserdòse to. Yéyè kààkukòkangana to, bwalu, nsaserdòse: “Èkèleeziyà yéyè wàmba cintu cishiilàngane ne cyà Bible ewu, èkèleeziyà ngudi mubingè.” Bwanyi mèmè, Bible ngudi mubingè ne èkèleeziyà mupiile. Nwamònu anyi? Kwèna mwà kukòkangana naabò to. Bòbò, bikèngela bwà wèwè. . . Kakwèna mùshindù wà kwelangana mpatà to. Kakwèna mùshindù wà kukòkangana anyi kudya lupiku to. Bwalu, bòbò bàdi biitabuuja ne: “Cidi èkèleeziyà wàmba aci, ki cyòci! Ki cyòci, cidi èkèleeziyà wàmba aci, nànsha Bible wàmba cinyi. Ncidi èkèleeziyà wàmba aci!” Bòbò bàdi biitabuuja èkèleeziyà. Twètù tudi twitabuuja Bible.

77 Mpindyewu tudi tusangana ne ùvwa ùbìikidiibwa. . . Èkèleeziyà ùvwa mukàji. Ne ùvwa ùbìikidiibwa dîna dyà ciipanshì, dyà busenjì dyà “MUKAJI WA MASANDI,” ne pashiishe ùvwa “MAMWÈNDE WA BANDUMBÀ.” Nènku tudi

tusangana ne èkèleeziyà wa Kàtòlikè nguvwa èkèleeziyà-maamù wa kumpàla. Yèyè ùdi menemene ànu civwàye mwambè ne ncidiye aci. Yèyè ki ekeleeziya wa nzànzànzà wa kwikalakù muvwijìibwe bulongolodi. Pàkaadìku Nzambì muvwijè ntèndeleele bulongolodi, ùvwa ng'èkèleeziyà wa Kàtòlikè. Bulongolodi bwà nzànzànzà bùkaadiku kacya bwenjìibwe ne ki bulongolodi pa buloba, bwà ntèndeleele wa bwena Kilistò, ng'èkèleeziyà wa Kàtòlikè. Mpindyewu . . .

⁷⁸ Ki pashiishe, ndekeelu wa byònsò, ùvwa “MAMWÈNDÈ WA BANDUMBÀ.” Ùvwa mulelè maèkèleeziyà, paanyimà pèndè yèyè, bwalu kabàvwa mwà kwikalà bânà bàà balume nànsha, bìvwa bikèngela kwikalabò bânà bàà bakàjì, ne tudi tusangana ne èkèleeziyà wa Mishònyì ncintu cifùmìne ku èkèleeziyà wa Kàtòlikè. Mu kukenketa kwà Mifundu, ne kutàngila kwà mukàndà wènu wà maalu-malonda, tudi tumòna ne èkèleeziyà wa Mishònyì ki cyòci cintu aci. Ne mwena Mishònyì kèna mwà kubingila mwena Kàtòlikè to, bwalu, bwà bònsò bàbìdi abu, bàdi bàmba ne bàdi “BANDUMBÀ” ne “MUKAJÌ WA MASANDI.” Aci's ncyà ciipanshi's, kàdi cidi EMU MMÜDÌ MUKALENGE WÀMBA. Ncyà bushùwà.

⁷⁹ Tàngilàayi, pashiishe kwambayè ne: “Twènzàayi,” mu États-Unis, kwambabò ne: “Twènzàayi cimfwànyì cyà nyama wa lwonji.” Piikalàbi ne nyama wa lwonji ùvwa mbukolè kampànda, ne bukolè abu bìvwa mbulongolodi; mpindyewu kì nnè ndi ngangata dilongesha dikwatakaja to. Aci n'Diyì dyà Nzambì. Beena bulongolodi bwà èkèleeziyà wa Kàtòlikè bàakadìvwija bôbò biinè pàmwè bulongolodi ne kwenzabò di- . . . bàpetangana ku mèyi. Ne bàakateeka, cidibo bàbìikila ne, “baataatù bàà ku cibangidilu” pàmwè, ne kuvwijabò èkèleeziyà wa Kàtòlikè bulongolodi, ne kwenzabò mu—mu—mu—mushingà kampànda, ne bìvwàbo bìtabuuja ne bìvwàbo mwà kulongesha, diitabuuja dyà buloba bujimà. Ki kucyènzejabò bantu ku bukolè, ku dinyooka.

⁸⁰ Ne pashiishe pàakapàtukà Martin Luther, mumòne Nyumà wa Nzambì ùmulombola bwà kupàtuka, pamutù pàà kulekela bantu kushàalabò badishikàmìne, yèyè kuvwija èkèleeziyà bulongolodi, cimfwànyì cifwànàngàne ne nyama wa lwonji, bukolè bwà cidìidi bufwànàngàne nendè. Pamutù pàà kulekela bantu bènda mùdì Nzambì ùfila bukènkè amu, bôbò kudìvwija bulongolodi mwinshì mwà dikazamuna kampànda, nènku bikèngela bwà kushàalabò bakwàte ku dikazamuna adi.

⁸¹ Nzambì kupàtukaYè buludì e kubwela mu èkèleeziyà wa ba-Méthodistes. Ba-Méthodistes kupetabò ditàbuluja dyàkatangalakà buloba bujimà; Nyumà Mwimpè mwikàle naabò, ùlongesha dijidiibwa. Kàdi katanci aka, pààkenzàbo cyòci aci, ki pashiishe kulongololabò èkèleeziyà kampànda, kwenzabò cimfwànyì cyà nyama wa lwonji, ncyà bushùwà, bukolè bwà cidìidi, bulongolola, bwà kuswikila bantu bàà

Nzambì ku twitabàayi kampànda; pamutù pàa kwikalabò badishikàmìne bwà kukuukwilabò ne kwendabò mu bukênkè pàvwà bukênkè bupòngolola mu kajila kààbò apu.

⁸² Kubàshiyabò paanyimà, mu cikondo aci. Bùvwa mbukênkè bulenga bwà kwòkò aku. Bùvwa mbukênkè bwà—bwà èkèleeziyà wa Peegàmò.

⁸³ Kàdi bìshi bwà èkèleeziyà wa Filàdelèfiyà? Abu mbukwàbò pààbù bukênkè. Kàdi, nudi numòna's, nànsha mwinè mùvwàbò badyènzè bulongolodi amu, Nzambì wàkapàtuka buludi mu aci cikondo cyà èkèleeziyà, nànsha nànkù, kutùma muntu, dìnà dyèndè John Wesley. Luther kàvwa mwà kubùlonda to, bwalu kààkabwitabuujà to. Yéyè ùkaavwa mumanè kudyènza bulongolodi *apa* nùnkù.

⁸⁴ Pashìishe John Wesley kudìvwijayè bulongolodi bùme cyoncyoncyo, ne kufikayè mu mùshindù kampànda. Dìbà dikaa vwa dikumbàne bwà *eci* cikondo cyà èkèleeziyà kubangaci. Nzambì kutùma Yè cisumbù cyà beena Mpenta; kupàtukabò apa ne dibàtiiza dyà Nyumà Mwìmpè. Kaa, ba-Méthodistes kwambabò ne: “Uh-oh. Huh! Twètù katwèna mwà kuya ne Aci to. Huh-uh! Katwèna twitabuujà cintu aci to. Kaa, to.” Bwà cinyi? *Ebu ki* bukênkè bùvwàbò bèndelamù, *apa; apa ki* bukênkè bwà *apa* nùnkù mpindyewu.

⁸⁵ Twètù tudi batùngùnùke twenda tuya batàngile ku dibwela dyà díbà. Nudi bavùlùke cyàkamba mupròfetà anyi? “Nekwikalè ditùkù dìikalà dyà mavuba, kadiyi bufùku anyi mundaamuunya to, kàdi ku ibaamulòlò nekwikalè Bukênkè.” Bukênkè bwàkakenkà musangu kampànda mu ditungà dyà ku esètè kùdi beena Yudà adi, ku esètè (beena Yudà ncisàmbà cyà ku esètè), Bùdi munkaci mwà kuteemena bàà Bisàmbà byà bendè; Bukênkè bùmwebùmwe abu, Nyumà Mwìmpè umwèumwè awu, mu matùkù a ndekeelu kaaba aka, dibàtiiza dìmwèdìmwè dyà Nyumà adi. Tudi bapicìle mu bikondo byònsò ebi kaaba aka, mùdi kamùyikù Bukênkè anyi cikondo cyà mîdimà to, ànu ditùkù dyà mavuba, dibwicidile; kàdi *apa* mene, ànu mùdi Bukênkè buteemè mùshindù wùmwebùmwe wàkateemàbu kwàka awu.

⁸⁶ Ki bwà cinyi: “Bikèngela Ìkalè ne mwenekelu wa dibwe dyà yaspà ne dyà sardoine; Alpha, Omega, Cibangidilu ne Ndekeelu; Ewu Uvwakù Awu, Udikù Awu, ne Wálwa Awu; Muji ne Mùtòlokù wà Davidi; Mùtootò wà mu Dìndà.” Ki cyòci aci's. [Katùpà kàà mukàbà wà mèyi munda mutupù—Muf.] Ndi ntèkemena ne nudi nucimòna.

⁸⁷ Nènku, vùlukàayi ne, tudi basangàne, kakùyikù cilèma nànsha cimwè to ne, cimanyinu cyà nyama wa lwonji ncimanyinu cyà dipàmbuka, mbwena kwamba ne, bidimba byà èkèleeziyà bishààle kacya byàkwàta ku èkèleeziyà wabò pamutù pàa kwendelabò mu Bukênkè. Bàdi bàbènga Bukênkè, ne kí

nkushààle cintu nànsha cimwè to ànu mîdimà. Aci ncyà bushùwà, ne bwà beena Kàtòlikè ne bwà beena Mishòònyì. Kùdi “nyama wa lwonji, ne mukàji wa masandi,” ne yêyè ewu ùdi ne bânà bàà bakàji “bandumbà.” Nè biinè bânà bàà bakàji bandumbà aba, pàakapàtukàbo, bàvwa virgò yà ku Bukênkè bwà ditùkù adi, bôbò kudivwija bulongolodi ne biikàle bàlwa ne bantu apa, bàbààluja emu, bàbàvwiya ànu cintu cyà mùshindù wùmweùmwe civwà Loomò ku cibangidilu aci. Ki cidì Bible mwambè. “Nyama wa lwonji; ne cimfwànyì cyà nyama wa lwonji; dileetà dyà dinà dyèndè,” ne bikwàbò.

⁸⁸ Mùshindù minè wutùdi balongè cintu cyònsò aci mu kaabujimà, makèlèlè dilòòlò, ne Bible bitòòke tòò...kaciyi dilongesha dyà muntu kampànda dikwàtakaja to. Kàdi Bible mmucyàdije ne, nyama wa mitù mwandamutekète, ne nsèngù mwandamutekète [Katùpà kàà mukàbà wà mèyì munda mutupù—Muf.] wa ku Loomò awu, ùvwa ku Loomò aku, ne ùvwa “ewu uvwakù, ne kàyikù mpindyewu to; ne udikù, ne kàyikù to,” paapà umwe paanyimà pàà mukwàbò, paapà umwe paanyimà pàà mukwàbò, ne wàya mu dibùtuka awu. Nènku kujandula ne mukàji umwèumwè wàkalela bânà bàà bakàji. Bàvwa virgò ku cibangidilu aku, bèndela mu Bukênkè bwinè bùvwàbo naabù abu. Ki pashìishe kubangabò kwenza maalù bu bandumbà, ne kwalukilabò buludì ku dyanza dyà cintu cimwècimwè cidì mamwàbò wènza eci. Menemene. Menemene.

⁸⁹ Lekèlaayi nnwàmbilèku cintu kampànda, nwènù bakàji. Tèèlejàayi. Nudi bafwànyine kubènga kwikala naanyì dyeyemena dyàbúngì mpindyewu, pàndì ntonokela bintu ebi apa. Kàdi kî mbwà kunùtapa ku mwoyi to; mbwà kunùkwàcisha. Kàdi panùdi numòna bantu, makèlèeziyà leelù ewu, bàànyishila bakàji bààbò...Mpindyewu, nènye—nènye kafika kùdi bantu balùme pààbò. Kàdi bàànyishila bakàji bààbò bwà kwikalabò bènza maalù mùshindù wùdibo bènza leelù ewu ewu, ne biinè abu bàjikula bàmba mùdibo beena Kilistò! Mèmè ncyèna nnùdyula nwènù bakàji to; nènnyùdyulè, paanyimà pàà dilòòlò edi. Kàdi, tàngilàayi, ncyè—ncyèna nnùdyula nwènù bakàji mpindyewu to. Kàdi, wèwè mwanèètù wa bakàji, bààbúngì bàà ku balongeshi bàà cyena-sèminèrè aba, anyì balongeshi bàà mu nkità, anyì mwònsò munudì nucibiikila amu, bàà mwaba kampànda ewu aba, bàdi ànu bànùlekela cyanaànà nwendela mu bintu byà mafi abi. Bible mmwambè ne bàvwa bampòfo, bàlombola bampòfo. Ncilelèlè.

⁹⁰ Mpindyewu, nènku Yesù, pa kumòna cyòci eci, ne mumanyè ne yimwè yà ku èkèkeeziyà yà Mishòònyì ayi yivwa mwà kuya buludì too ne ku ciibi cyà Bukênkè, kàdi kukùdimuka kuya. Yesù, mu Maatàayi 24.24, mmwambè ne nebìikale ànu, mufwilakanyi ne Kilistò ùvwa mwà kufwàngana ànu bikolè ne mulelèlè, mu mùshindù wà mufwànyine kuseeswisha ne Basungula mene, bu byòbi mwà kwenzeka.

⁹¹ Mpindyewu, nwamònu's, cyena-Loomò, cyena-Kàtòlikè, kaa, ncituutè bàmwè bàà kunùdi nwènù beena Mishòònyi aba cintu ku mutù. Kàdi, muntu udikù nànsha ne ndambù mukesè wa ngàsà, ndambù. . . mumanyèku ànu ndambù pa Bible, yéyè's neànyeemè ne neèpukè abi. Ncyà bushùwà. Dikòkiibwa dyàci ndifiike bwèndè yéyè; mmumanyè ne kacyèna ne bwà nsongo to, bintàkanyì byònsò bìdìbo bàlongesha abi. Kabyèna ne Mufùndù nànsha wùmwè to; ku musangu ne ku musangu, bàdi bàlenga ndambù cyanààna.

⁹² Mafi matàmbe bunènè àkaadiku mambiibwe, àvwa ànu ne Bulelèlà bwàbùngì munda mwàwù. Ncyà bushùwà. Ne a kumpàla, Sàtaanà ùyiikilangana ne Evà, wàkamba Bulelèlà bwàbùngì. Kàdi ùvwa bu ne, panshì pààwù apu, ùvwa ne mafi àvwa àpiisha mukàjì awu, ne àkanyangakaja lukòngò lujimà, bufùkì bujimà. Ncyà bushùwà.

⁹³ Bikèngela nùtangilè aci. Bikèngela cilwe Bulelèlà *apa* ne Bulelèlà *apa*, Bulelèlà *apa* ne Bulelèlà *pààpa*. Kantu kààci kònsò, Bulelèlà; bilondàngàne ànu byà mwomùmwe, too ne ku ndekeelu.

⁹⁴ Ne mùshindù mwinè wùdì bantu mwà kumòna èkèleeziyà wa ku cibangidilu kwàka ne ùvwa muteemesha ne citèekedi cyà mwèndù, ne pashìishe lwà *apa* bà mòna cintu cìmwècìmwè cyàkenzèkà kwàka aci cyènzeka, ne Dìyì dyà Nzambì dyàmba ne cìvwa mwà kwikala “Yèsù Kilstò umwèumwè awu makèlèlèlè, leelù too ne kashidi.” Kàdi kucìbènga? Bidi bìleeja ne mbabènge Bukènkè, ne bèndela mu mîdimà; ki cintu cìmwèpelè cìdì cishààle.

⁹⁵ Ncilelèlèlè's, mwanèètù wanyì. Ncyèna ngamba nàнку bwà kuleeja dimanya to. Nzambì mmumanyè nàнку. Yéyè mmumanyè mwoyi wànyì. Ndi ne mudimu wà bwambi, ne byàbùngì bicìkàle kumpàlè kwànyì. Ne mumanyè ne dìngà ditùkù, ku Cibàsà cyà Cilumbulwidi, nèndubululè bwà bintu ebi. Ncyà bushùwà menemene. Ndi mufwànyìne kusanganyibwa mwikàle mushiminyinyangananyì wa maalu, mulongeshi wa mashimi, dìbà adi Nzambì mufwànyìne kumpiisha. Ncyà bushùwà. Kàdi mèmè mumanyè cyà bushùwà Bulelèlà bwà bintu ebi, kàdi nciyi nnwàmbila to, Yéyè neàmpìishè dìbà adi, bushùwà menemene.

⁹⁶ Wàkambila nsentedi ne: “Tàngilè! Wèwè mupangile kudimwija, dìbà adi Nè—Nènkubadilèci. Kàdi wèwè mudimwije cyà bushùwà, ne bóbò batùngùnùke ànu bènda bàya, nebàfwe mu mpèkaatù wabò, kàdi Ncyàkukubadilaci to. Kwèbè ku mwelè kakwàkwikala mashi to.”

⁹⁷ Pa nàнку tudi baswè kwikala badimùke bwà tùmànyè cìdì Bulelèlà, bilondèshìle Bible. Kàdi mùshindù mwinè wàkabangà cikondo aci, ne cyàkenzàbo, ne leelù ewu kumòna èkèleeziyà wa Mishòònyi ànu panshì menemene.

98 Tàngilààyì kùneeku. Bivwa pa ciibidilu ne, kùkaadi ntàntà mule, ne nwènù beena cijila aba, bivwa bibì bwà nwènù bantu bakàji kukòsa nsuki yènù. Ncinyì cìdì cilwè pa bwalu abu? Pàdì Bible mwambè ne . . . mukàji yéyè mukòse nsuki yèndè, bàyèndè ùdì ne bukenji bwà kushipa nendè dibàkà. Dilongesha dyà kadiyi bundù, kàdì aci's m'Bible.

99 Ne nwènù bakàji, nupàtuka apa nukòsa mashindà mu bulà bwènù, bavwàle cinsàlabeetà, ne bivwàlù byà bantu balùme. Kàdì Bible mmwambè, Nzambì wa Bukolè bwònsò awu mmwambè ne: "Mukàji wavwàla civwàlù cìdì cikùmbànyìne muntu mulùme, ncinyangu, bukooyà ku mèsù kwà Nzambì." Kàdì wèwè's udi ucyènza.

100 Ne udi unwà mfwankà, uya ku maja ne ku myaba yà bikàsa, cibì mwikàle ànu wà mu èkèleeziyà. Udi uleeja ne udi mwàngate cintu cyà mùshindù kampàndà; kwèna mutwibwe cimanyinu mu Dyulu nànsha, Nyumà Mwímpè. Paanyimà pàà katanci netùbwelè mu cyòcì aci, ne tunùleeja bishiilàngàne ne aci. Mpindyewu, aku kàdì ànu kaacintu kakesè cyanààna.

101 Ne nwènù bantu balùme, ubwela mu èkèleeziyà, wenda upweka ne mùsèèsù mwikàle ne cifwankà ku mishiku, byenzè bu—bu ngombe mupakula wa ku Texas, mutùùla nsèngù. Ne wangata. . . Ncyèna ngamba nànkù bwà kwela bilèlè to. Ncitu ngiitabuuja dyelela dyà bilèlè mu cyambilu nànsha. Ndi ngamba ne m'Bulelèlè. Upweka ne mùsèèsù, ne wenda ùsòmba mu myaba kampànda, ne ushima, ne wiba, ne nwibilangana muntu ne mukwèndè, biinè abu balami mu kasumbù kàà balami kàà èkèleeziyà.

102 Nudi nubwela mu maèkèleeziyà nunàya manàyi a kale a mibèlè aa, àdì ànu manàyi a PMU à ciipanshi, a ciibidilu aa. Ncyà bushùwà. Nudi nubyènza, ne pashiishe nwela lubilà bwà mufidi wa bipeta byà manàyi. S'nudi pèènù ànu babì, mu èkèleeziyà yènù amu, nwènù ba-Méthodistes, ba-Baptistes, beena Mpenta, nànsha biikàle banganyi bàdì bènza nànkù awu abu. Ncyà bushùwà's. Ne nwènù's nudi bamanayè ne mbulelèlè. Kàdì ncinyì aci? Nwènù's nudi nwenda nubànda ànu bu maman wenù wàwa. Cintu ànu cyòcì cimwècimwè aci menemene, ne lwesu lwà mishilà kalwènakù mwà kupenda mbìdikà wa diipikila kàfé mùdiye mufiike to. Nènku nyumà wa bintu abi's ki yéyè awu.

103 Kàdì ncyèna mbèngangana ne beena Kàtòlikè mu kantu nànsha kàmwè to. Ncyèna mbèngangana ne ba-Méthodistes, anyì ba-Baptistes, anyì ba-Presbytériens mu kantu nànsha kàmwè to. Nzambì ùdì ne bantu, Mamiinu a Abraham, muntwamu. Kacyèna cibèngangana ne bantu nànsha. Ncitàngile èkèleeziyà yàbò, yìdì yìdivwijà malongolodi muntwamu ayi, ne bòbò bàdì bàkuukwila èkèleeziyà pamutù pàà Nzambì. Kaa, nwènù beena Mishòonyi kanùtu baswè kwitabuuja aci to, kàdì

nwênù's ki cinùdi nwenza, nànsha nànkù. Nèngàmbè ne, "Wèwè udi mwena Kilistò anyi?"

¹⁰⁴ Èè, mwab'ewu ànu àbìdì aa, Mwanèètù Bosworth kwelayè nsongààkàjì kampànda lukonko, wàmba ne: "Udi mwena Kilistò anyi?"

¹⁰⁵ Awu ne: "Mwena Kilistò? Ndi muswè ùmanyè ne, mèmè ntu nteemesha kàndeyi bufùkù ne bufùkù bwònsò ebu!"

¹⁰⁶ Èè, mpindyewu nwênù beena Mishòònyì nutu nwela meeji ne aci ncintu kampànda anyi? "Wèwè udi mwena Kilistò anyi?" "Ndi muswè bwà ùmanyè ne, mèmè ndi Méthodiste," anyi "Baptiste." Èè, aci's cìdì cyùmvwija ànu ne udi muyè mupàtùke mu ditùkù dyà ngàsà, wèwè mwinè, bwànyì mèmè; ncyà bushùwà, piikalàbi ne ki cyònsò cyùdi, ànu Méthodiste anyi Baptiste. Wèwè kùyì mwena Kilistò mu èkèleeziyà wa ba-Méthodistes, anyi wa ba-Baptistes, anyi wa Kàtòlikè amu to, udi mujimine. Ncyà bushùwà. Pa nànkù's ki cimanyinu cyènù ncyòci aci menemene.

¹⁰⁷ Bimanyinu byònsò bìbìdì abi mbyà nyumà. Mpindyewu nènùjaadikilèci ne Bible. Bimanyinu byònsò bìbìdì abi mbimanyinu byà nyumà.

¹⁰⁸ Bantu bààbùngì bàwva bèèla meeji ne: "Nebànyungulukè kàdi kukutàpa lusàlù kampànda mu mpàlà mwèbè amu, ne kukutàpa lusàlù kampànda mu cyanza." Twàsangànyì, makèlèlèlè dilòòlò awu ne, aci cìwva mmafi. Èyowà's, mukalenge. Aci ncyà mafi. Ncimanyinu cyà nyumà. Nci—ncisokòme ànu menemene. Kàbìdì, tàngilàayi, misangu yàbùngì. . .

¹⁰⁹ Mpindyewu ndi mumanyè ne eci cìdì mwà kunùfiikisha munda, ne cìdì—cìdì—cìdì cyùmvwika cishilè. Kàdi ne—necyòlolanaganèku bu twètù ànu. . .ne kupèeshakù Nzambì mpùngà mukesè. Ncyèna—ncyèna ne meeji a kwikala ne ngaakwilù mukàyàbàle to, kàdi ndi—ndi ànu nteeta bwà kwambaku bwalu kampànda, ne mwoyi wànyì wònsò.

¹¹⁰ Pààkamònà Yesù Kilistò èkèleeziyà wa Mishòònyì awu ùlènduka ùmuka ku èkèleeziyà wa Kàtòlikè awu kuntu kwàka, ne ùpàtuka kàdi kwalukilamù buludì, ùkùdimuka cyàkàbìdì ànu mwàkènzàbo amu, Yèyè wàkamba ne: "Nyumà awu neàtambè kufwànangana, mu mùshindù wà yèyè mufwànyine kuseeswisha ne Basungula mene. . ."

¹¹¹ Nukààvwakù bajingùlùle, nwênù balundà bàànyì beena Kilistò, bwà ne mufwilakanyì ne Kilistò awu, ncimanyinu cyà nyama wa lwonji anyi? Mufwilakanyì ne Kilistò awu, muntu kanà yònsò's mmumanyè ne mufwilakanyì ne Kilistò mwaba awu, aci ki cimanyinu cyèndè, cìdì. . .cyà bukolè bwèndè. Nènku, nwamònu's, nnyama, ùdi mbukolè. Kudi bukolè bwà èkèleeziyà wa Kàtòlikè. Kudi bukolè bwà èkèleeziyà wa ba-Méthodistes.

112 Mvwa muyè, àbìdì aa, kùdì muntu kampnda mukàlàngà wa dikèma. Mémè nciyi mutùpàkàne to, yéyè awu mmusòmbè kaaba aka mu èkèleeziyà emu dilòlò edi. Ne Edith Wright mwànà ne bakwàbò bàtu bàlwa mu disangisha kaaba aka mene, mu ntàntà wa kàyi mupite kilòmèètà makùmi àsàtù ne yibìdì ne kaaba aka to. Nènku, twètù, bantu. . . Mvwa nyiisha ànu cyanàànà Èvànjeeliyò wa lupàndu. Bìvwa bìkèngela bwà twètù kwendela pampàla pa màshinyì bwà kubwela muntwamu. Kàdi dilòlò adi, mpaasàtà kumbìkilayè bantu bònsò bitèèlèja, wàmba ne: “Ùmfwìlèku luse bwà dikwambila, Révèrend Branham. Kàdi mbangambile ne bàdi ne babèèdì ndambù bàdi balwè muntu mwàmwa, kàdi mulombodi wetù wa distriki mujuukè e kulwa kwamba ne: ‘Kakwènzeki dyondopa dyà kùdì Nzambi mu èkèleeziyà wa ba-Méthodistes to.’ Pa nàнку nebikengelè bwà wèwè kubànda pa cibùmbà cyà ku cyambilu, kulaya bantu, ne kushiya disangisha edi.” Ncyà bushùwà.

113 Bwà cinyi? Bukolè bwà èkèleeziyà wa ba-Méthodistes. Ki bukòokeshi bwà nyama wa lwonji mbwòbù abu. Èkèleeziyà wa ba-Baptiste byà mwomùmwè; ba-Campbellites, ne ba-Luthériens, ne mikwàbò yònsò ayi, ne beena Mpenta, babì mwomùmwè. Ncyà bushùwà. Ndi mupetè beena Mpenta. . . Ne Assemblées de Dieu bàkaadi bakabwelè mu nsangilu wa maèkèleeziyà, udi bu—bu. . . Mbaswikàkànàngàne mwab’ewu, ne “maamù” ndumbà wa kale awu. Pa nàнку bulongolodi bwònsò bwà èkèleeziyà mbumùkile ku Loomò. Ki maamù wabù nyéyè awu. Ne mémè ncyèna munsantu wa Ditùkù Dishìishe, anyi wa Ditùkù dyà Mvùla Mushiishe, anyi cyònsò cinùdì nucìbìikila aci to. Ncìtu muswè. . . Ncyènakù wa ku byà nàнку awu to.

114 Kàdi ndi njinga kwamba nùнку ne, bìvwa bìkèngela bwà balùme ne bakàji kwikalabò badìshikàmìne mu Killistò Yesù, bwà kwendela mu Bukènkè. Ne bìvwa bìkèngela bwà èkèleeziyà ne èkèleeziyà yònsò kwikalayè mùshindù wùmwèwùmwè awu. Aci ncìlèlèlà.

115 Mpindyewu, mònaayi eci, mùdì Bible. . . Umvwayi aci. Bulongolodi abu, vùlukàayi ne, mwòmò amu mmùdìbu bùsanganyiibwa, mwòmò amu mene. Nènku tudi tusangana ne, èkèleeziyà wa Kàtòlikè pàakabangàye kale wàwa, bàvwa ne dibàtiiza dyà mafi dyàkapàtukàbo naadi, bàmyaminangana màyi pamutù pàa kubàtiizangana. Kakwèna Mufundù nànsha wùmwè mu Bible bwà cyòcì aci to. Ne kakùyì ànu aci nkààyaaci to, kàdi Nyumà Mwìmpè, ne dibàtiiza dyà mu màyi, ne bintu byà kwìsùkwìsù, ne myànzù, ne bikwàbò byònsò, ànu bwà kuseka cyà cìlèlèlà. Ne kakwènakù mwambi nànsha umwe mu ditùnga emu, udi mwà kundeeja mwaba wùkaadìku aci cyenjiibwe mu èkèleeziyà wa ku cibangidilu to. Ncyà bushùwà. Kacyèna mu Bible to. Kàdi bòbò mbàakapàtukà naaci, ki pèètù kuciitaba. Nudi bamòne kutùdì twenda twalukila buludi aku anyi?

116 Kàdi leelù ewu ki nwênù kudikonka bwà cinyi katwèna bapetè ditàbuluja. Cidiku ncyôci aci's, mwanèètù. Cìdì citùkèngelà leelù ewu nditàbuluja dîmpè, dyà cyena-kale, dyà Pòlò Munsantu adi, ne Nyumà Mwîmpè wa mu Bible awu mwalùkile cyàkàbìdì mu ditùnga. Ki cìdì citùkèngelà ncyôci aci. Mpindyewu. . .

117 Nènku kwangatabò “cimanyinu cyà nyama wa lwonji,” anyi “dileetà dyà dînà dyèndè,” mu mûshindù wà ne bààkamwenzela cimfwànyì. Cimfwànyì aci cìvwa mbulongolodi bufwànàngàne menemene ànu ne èkèleeziyà wa Kàtòlikè. Bàvwa bamuvwijè bulongolodi ne benzè cimfwànyì cyà èkèleeziyà wa Kàtòlikè. Èkèleeziyà wa ba-Méthodistes ngudi cimfwànyì cyèndè; èkèleeziyà wa ba-Baptistes, èkèleeziyà wa ba-Presbytériens, èkèleeziyà wa beena Mpenta, èkèleeziyà wa beena Cijila, ba-Pelèrins de la Saintété, anyi m'Bànà bèètù Basanga anyi? Yònsò wàkadivwija bulongolodi awu, mmutentula pòpò apu. Kacya kacìvwakù mu Bible wa Nzambì to. Ncyà bushùwà. Malongolodi; bàdivwija malongolodi!

118 Nzambì ngudi mulombodi. Cyàngataayi nwàlukilè nùye naaci too ne kule kwònsò kunùdì baswè aku. Tàngilàayi Izàlèlèl, pàvwàye ùpàtuka mu Èjiiipitù.

119 Ne ba-Moàbà bònsò abu biimàne kwàka, ne maalu ànu mùdìwu mafùnda, bàlàmbula milàmbù; byoshelu mwandamutekète, mwandamutekète bìy-. . .mikòòkò mwandamutekète, byàmba bwà dilwa dyà Kìlistò; ngombe mwandamutekète, mulàmbù musukula. Ànu mwaba awu mene, mupròfetà wèndè munène mwimàne mwaba awu, Baalàmà, bwà kwela Izàlèlèl mulawu. Nènku ki Izàlèlèl wàwa. . .Ki Moàbà wàwa, ditùngà dinène. Ki beena Amòlà bàba ne bònsò abu, ditùngà dinène, badìlongòlòle pàmwè bu ditùngà.

120 Kàdi Izàlèlèl ùvwa mutàngàlàkàngàne mu mpàtà mwònsò amu ne musùmbà wà tentà. Bàvwa “beena lwendu ne beenyi, bènda bàkèbangana ne Cimenga cìcìvwa cìlwa,” ànu menemene bàà kabàyi bàsungulujàngana bilondèshile màngumba to. Kàdi cyàkenzàbo ncinyi? Bàvwa ne bimanyinu ne maalu a kukèma bìbàfìla. Aba bôbò kabàvwà naabì to; nènku bàvwa bùmvwila bàba nàka mukàwù. Bintu abi bìvwa nnyumà.

121 Nzambì ùtu wàngata muntu Wèndè, kàdi kàtu wàngatakù nyumà wèndè to. Wàkangata Eliyà, kàdi nyumà Wèndè wàkalwa pa Elishà, bidimu nkàmà yàbùngì paanyimà, wàkalwa pa Yone Mubàtìiji, mmudyanjila kwamba cyàkàbìdì bwà mu ditùkù dyà ndekeelu.

122 Dyabùlù ùtu wàngata muntu wèndè, kàdi kàtu wàngatakù nyumà wèndè to. Mulongeshi umwèumwè wa maalu a ntèndeleele wàkapiìsha Yesù Kìlistò bwà bishimà Byèndè ne maalu a kukèma, ne kupangakanayè Nèndè pa Mifùndu awu, ùvwa wa ciipanshì menemene bwà kulwayè kuMwambilaci.

Nyumà umwèumwè awu ùdi ne mwoyi mene too ne mu mulongeshi wa butèndeledi leelù ewu. . . ? . . . mulongolola kùdi Nzambi bwà kulwayè kubwela mu dipiila adi. Ki cidi Bible mwambè. “Bantu bàà kale, badyànjila kulongolwela dipiila edi, bwà kukùdimuna ngàsà wa Mukalenge wetù mu masandi makolè.” Ncyà bushùwà menemene. Mu Yudà, mvensà mwi3—mwi3 wa—wa Yudà, nudi mwà kucipeta. Ncyà bushùwà.

123 Mõnaayi bintu byõnsò abi biikàle bijaadika mwaba awu ne, ki cimanyinu cyà nyama wa lwonji ncyòci aci. Ki mwaba wùdici ngwòwù awu. Pa nàнку paùdi unyeemakana eku ne eku mwaba ewu wamba ne: “Èè; mèmè nènkuleejè pààlwà cimanyinu cyà nyama wa lwonji aci,” wadimuka’s ní ukàadi mumanè kucipeta. Ne bõbò bàdi naaci nàнку awu abu, nebànyookiibwè mu kapyà ne soufre, bipòngolola mu lupànza lwà ciiji cyà Nzambi, bwà kukèngeshiibwabò muunya ne bufùku, kashidi ne kashidi. Ncintu cyà disù dikolè. Mpindyewu dipànduka dyèbè nediiikalè munyi?

124 Nekùlwe cikondo, cidi munkaci mwà kulwa mpindyewu mene. Mõnaayi, ne mu bulongolodi bùdi bwènda bùyà. . . Mpindyewu lekèlaayi nnùpèèshèku kantu kakesè kàà kukwacisha naaku dyumvwa dyènù kaaba aka. Mu bulongolodi bùdi bwènda bupwekà mùshindù awu abu, kùlwalwa cikondo cyàkèngelàbi bwà nwènù kwikala bàà mu bulongolodi abu bwà cyanààna kanwèna mwà kusùmba anyi kusùmbisha to; anyi kwikala ne cimanyinu cyà dipàmbuka, cyà èkèleeziyà aci. Bikèngela nwikalè bàà mu bulongolodi kampànda bwà cyanààna kanwèna mwà kusùmba anyi kusùmbisha to.

125 Nènku, tèelejààyaaku, nwènù bàdi bamanyè cidi Bulelèlà abu. Ncyèna ngamba ne umùkaayi mu èkèleeziyà wenù to. Ncyèna ne bwalu bubì bùndi ngamba bwà wenù. . . bwènù nwènù anyi bwà bidimba byènù nànsha. Ndi ngamba bwà ciimamwèndè wa bukalenge, kale wàwà pàakavwijàbo cintu aci bulongolodi, ne kucyènzabò ne: “Netwikalè mwà kwenza *cikampànda*. Netwikalè mwà kwenza *cikansanga*.” Ki kushikikabò kanungu kàdi kakàyi mwà kushintuludiibwa aku. Kàdi Nzambi ùdi ùcisùnsula, ne ùpàtulamù Èkèleeziyà Wendè; ùtu wènza misangu yõnsò ànu nàнку.

126 Tàngilàayi mu lwendu lwà bânà bàà Izalèlèlà. Bàvwa bàkwàcisha mudilu. Bàvwa bàshààla bufùkù ne bufùkù. Dikunji dyà Kapyà divwa dilembèlèlè kumutù kwàbò. Kadi díbà dyà mundaamuunya anyi dyà bufùku divwà Dikunji dyà Kapyà adi dyumuka nànsha diikàle díbà kaayi, mpungi yivwa yidila ne Izalèlèlà ùvwa ùjuula citùùdilù ne wàsà lwendu ùya. Ní cívwa ndíbà mundankùlù, ní ndíbà ibìdi wa mapingaja, cikondo cyõnsò cívàku aci, bàvwa bàjuula citùùdilù bàlonda Dikunji dyà Kapyà adi. Ncyà bushùwà anyi? Bàvwa bàlonda Kapyà aku.

127 Èè, Martin Luther pààkamònàye Kapyà kàà Nzambì kàpàtuka, Martin Luther wàkapàtuka, wènda ùlonda Kapyà aku pambèlù pàà cyena-Kàtòlikè. Kàdi wàkiibaka mwinshì amu ne wàkavwija èkèleeziyà wendè awu bulongolodi, kàdi kààkapeta mwà kuya kumpàla to.

128 Kapyà aku kààkapàtuka buludì, ne Wesley wàkaKàmòna, ne ki yêyè udi wasa lwendu wènda ùKàlonda wàwa. Ncyà bushùwà. Kapyà kàà Nzambì aku kààkashìya Luther musòmbe. Pashìishe, katanci aka, Wesley kwibakilayè mwinshì mwàKò amu, èkèleeziyà wa ba-Méthodistes bàà cyena-Weslèy.

129 Ki pashìishe kulwakù Alexander Campbell, John Smith ne ba-Baptistes, ne bikwàbò byà nàнку awu, ne Moody, ne bònsò abu. Pashìishe, katanci aka, kubangabò kulwa beena mishìngà, ne buumàkàne, ne bakwàte mashikà, pààkafwà bapròfetà bàà kale abu, ne bikwàbò. Musùmbà mupyamùpyà ewu kulwawù ànu ne dilonga dyà tùlaasà dyà mu sèminèrè cyanààna, ki pashìishe, katanci aka, kuzabikabò byanza mu nsebelà ne kucitampakajabò ne bukooyà.

130 Ki Nyumà Mwímpè kupàtukaYè, ne beena Mpenta kuMumònabò ne ki bòbò bàyaaya bàba; cyà bushùwà, kupàtukabò buludì, kushiyabò ba-Méthodistes ne ba-Baptistes, ne bikwàbò. Mpindyewu cintu cyà citàcisha mu bwalu abu, kàdi bwà kuuja Dìyì dyà Nzambì, beena Mpenta kudìvwijabò bulongolodi, ne biikàle bakwàte mashikà ne balondi bàà mishìngà ànu mùvwà bakwàbò abu amu. Kàdi, tàngilàayi, kakwàdyàkwikalakù cikwàbò cikondo cyà èkèleeziyà nànsha. Cikondo cyà ndekeelu n'Çikondo cyà Èkèleeziyà wa Laòdikiyà, cidì kaciyi ní nku mashikà ní nku luuyà. Ànu ntèndeleelelu búngì bukùmbàne nyanààna, pàdi mìjikì yimba apu, bwà kuja maja bàbànda bàpweka ne kajila, ne pashìishe kusòmbe panshì, bàalukila mu mààbò ne bàjààna mwena mutumba naabò.

131 Cidì citùkèngelà leelù ewu nditàbuluja dyà cyena-kale, dyà Nyumà Mwímpè, dyà kapyà ditùma kùdì Nzambì, dyànùlàdikà batwè mpàla panshì nwela mbilà, mundaamuunyà ne bufùku, nudìla myadi nutwà mikèmù, ne nutùngunuka, bwà mpèkaatù yà bàà pa buloba. Netùbwelèmu. Ncyà bushùwà.

132 Kàdi's ki bòbò abu. Ànu pòpò apu ki patùdi bafikè, bàà civùmùvù. Nzambì mmwambè ne: "Cidì ciNgendesha ànu ku mwoyi ne ciNgenza bibì mu cifù! Nènnütwilè ànu mukana Mwànyì." Ki èkèleeziyà nyêyè awu's, èkèleeziyà wa Mishòònyì, mubèngiibwe. Èkèleeziyà wa Mishòònyì mmubèngiibwe; kuumukila ànu ku Mpenta too ne ku Luther, kantu ne kantu kàà Cyòci aci. Ki mùdì Dìyì dyà Nzambì dyàmba.

133 Kàdi mu yònsò wa ku yòyì èkèleeziyà ayi, Yèyè mmupàtùle Musungula. Mmupàtùle Mamiinu mu yònsò wa ku yòyì, mu ba-Méthodistes, mu ba-Baptistes, mu ba-Presbytériens, mu

ba-Luthériens, mwônsò amu, mu Kàtòlikè, ne bônsò abu. Mmupàtùle bàshààdìlè, mupàtùle cisàmbà.

¹³⁴ Mùneemu emu ànu àbìdì aa, inàbànzà mutekète uvwa mulààdika ànu mu Louisville emu, mwena Kàtòlikè, ùpunga ne lufù. Mémè kuyakù. Ki nsaserdòsè kwambayè ne: “Lukutukutu’s, ciinè cintu eci!”

Kàdi bàyendè kwambayè ne: “Shiya mwaba. Mulekèlè àbwele.”

¹³⁵ Mémè kubwelamù. Nènku bìvwa bimanya ne mukàjì awu ùvwa ne cyà kufwà mu dindà dyà pàvwàbu bùcya. Mémè munkaci mwà kumusambidila, cikèèná-kumòna kubwayikaci, cyàmba ne: “EMU MMÜDÌ MUKALENGE WAMBABA.” Ncyà bushùwà. Dindà dyà pàakacyàbu. . . Kumwambila búngì bwà mèbà àvwà mwà kwikalà, ànu pyòpyopyò, díbà òvwàye mwà kwalukila kwèndè kumbèlu musàngàle. Kusekabò cyòcì aci, mwà bàdyombola. Kàdi ànu díbà mene òvwà Nyumà Mwímbe mwambè adi, kwalukilayè mwèndè musàngàle, ne ùdi ne mubidi tumatuma leelù ewu. Ùvwa mwena Kàtòlikè. Bòbò bàvwa beena Kàtòlikè. Bàvwa beena Kàtòlikè.

¹³⁶ Paùdì upeta Bukènkè. . . Mu Dipungila Dikùlukulu. . . Lekèlaayi nnùleejè cimwèneni mpindyewu. Tèèlejàayi ne ntèmà, pashìshe nènye buludì ku cyena-bwalu cyànyi. Tàngilàayi, mu Dipungila Dikùlukulu, pàvwà mupika ùsanganyiibwa ku bupika, ne pashìshe mwikàle ne. . . Ùvwa musùmbiibwe kuntwaku, ku mushinga kampànda. Ùvwa ne cyà kukwàcila mfùmwendè awu mudimu too ne ku cidimu cyà budishikaminyi. Nènku pàvwà cidimu cyà budishikaminyi cìlwa, kùvwa mpungi uvwa wediibwa.

¹³⁷ Nènku pàvwà mupika awu kuntwaku, yèyè ne bàná bèndè, ne mukàjèndè ne bônsò abu bàjinga bwà kwalukila ku buloba bwàbò bwà kale abu. Bàvwa bènda bàtwa mikùmà mu madimi amu, kàdi benzejanganyi bàà midimu ku bukolè bàbàtuuta, ne mu *nùnkù* ne mu *nàka*. Ki pashìshe pàvwà mwakwidi wa cibilù cyà disànta ùvwilapù, wènda wèla mpungi, ne mwakwidi awu wèla mpungi, ne muntu awu ùmvwa mpungi awu. Ùvwa mwà kulekelela lukàsù lwèndè pànshì, ùvwa mwà kulekelela cyònsò cìvwàye munkaci mwà kwenza aci, ùtàngila mwenzejanganyi wa midimu ku bukolè awu mumpàla, wàmba ne: “Kwèna mwà kuntuuta musangu mukwàbò nànsha wùmwe to. Ndi mudishikàmìne.” Wàsa lwèndu buludì nènku nyèyè udi walukila kwàbò wàwa. Bwà cinyi? Kùdi mwadi wà mpungi wà cibilù cyà disànta, pùmvùye mwadi awu apu.

¹³⁸ Nènku ki Èvànjeeliyò nyèyè awu, cibilù cyà disànta, cyà ne wèwè washààdi mudishikàmìne ku mpèkaatù. Udi mudishikàmìne ku biibidilu byònsò byà bukooyà ne bintu bìdì bàà pa buloba bapàtùle kaaba aka mu dîná dyà ntèndeleelelu, mu bukòokeshi ne bwà Mishòònyi ne bwà Kàtòlikè, mwinshì

mwà cimanyinu cyà nyama wa lwonji. Ncyà bushùwà. Udi mudishikàmine.

¹³⁹ Kabyèna ànu bikèngela bwà wèwè kwikala nàнку to. Kàdi dîbà adi bu muntu awu mwà kubènga bwa kwakidila aci, dîbà adi muntu awu bàvwa bàmwangata mwaba awu bàya nendè ku dikunji dyà ku cyoshelu cyà èkèleeziyà, ne bàmutwà cimanyinu, bàmutùbula disòsò mu dici. Nènku ùvwa ùshààla musadidi wa mfùmwendè awu matùkù endè ònsò a mwoyi.

¹⁴⁰ Nènku paùdi ubènga bwà kwitaba Bukènkè bwà Èvànjeeliyò pàdiYe ùyiishiibwa mu Bukolè bwà Nyumà Mwîmpè, ku Bible, udi mwà kuditwisha wèwè mwine citampì bwà kwèbè kwà Cyendèlèlè kùyaaya. Amen.

¹⁴¹ Mpindyewu tàngilàayi, kakwàbò kantu kàmwèpelè, bu nwènu mwà kumfwilakù luse bwà dyamba dyà diyi dingàmbi kùkaadi katanci kakesè aku adi, bwà—bwà muntu awu. Kàdi, tàngilàayi kùneeku: “Ùseeswisha ne Basungula mene. . .”

¹⁴² Mpindyewu, tudi balengè ba-Luthériens, ba-Baptistes, ne bakwàbò, ne beena Kàtòlikè, mpindyewu lekèlaayi nye kunùdi nwènu beena cijila bwà katanci kakesè cyanààna. Nwamònu anyi? Mémè ntu ngiitabuuja cijila. Udi ne cyà kwikala wa cijila. “Kakùyì cijila muntu nànsha umwe kààkumònakù Nzambi nànsha.” Kì ncijila cyànyì mémè to; cijila Cyèndè Yèyè. Ne mémè ncyèna ne cîndiku mwà kwenza mu bwalu abu to; ncidiYe Yèyè mwenzè bwànyì mémè. Ncyèna ngiimana mu cyànyì sungasunga to, bwalu ncyèna mene naaci to, ncyèna nànsha nteeta bwà kucipeta to. Ncyèna nànsha nteeta bwà—bwà kwikala nàнку to.

“Udi uteeta bwà kukwàta mukwàcilemù anyi, Mwanèètù Branham?” To, mukalenge.

¹⁴³ Mémè ndi ànu ndekelela cyanàna, ndekela bwà Yèyè ikalè mukwàte. Ncyà bushùwà. Yèyè Ki Udi mukwàte. Shààla wèwè ànu mufwè, ki cyònsò cidi cikèngelà bwà wèwè kwenza. Ikàla wèwè mudilamè ànu mufwè, Yèyè neàtungunukè ne kukwàta. Yèyè ngukàadi mumanè kukwàta. Yèyè wàkàkwàta kwòkò aku too ne mwàkambàYe ne: “Kwàjikì.” Aci ncyàkakòsà bwalu. Nzambi ùdi ùtùlekela tucyènga, mwomùmwe. Nkujikè.

¹⁴⁴ Kàdi, beena cijila, nwènu ba-Nazaréns ne ba-Pelèrins de la Sainteté mpindyewu, nwavùlukaayi. Mwinshì mwà bukòlè ne dipàtuka dyà mu èkèleeziyà wa Wesley, anyi èkèleeziyà wa ba-Méthodistes, pàakadiwijiábo bulongolodi, nwènu beena cijila bananga aba nwàkapàtuka, kwamba ne: “Twètu netùtungunukè ne cijila.” S’bivwa bilenga be. Nwènu kutùngunuka ànu ne cikondo aci, Cikondo cyà Filàdèlèfiyà aci, too ne mwàkafikàci ku cyà Laòdikiyà. Kàdi dibàtiiza dyà Nyumà Mwîmpè pàakalwàdi, ne bimanyinu kwalukilabi mu èkèleeziyà, nwènu kucibiikila ne “dyabùlù.” Bwalu bààkaakula mu myakulu ne bààkiitabuuja byòbi bintu ebi, nwènu kwamba ne: “Bivwa byà dyabùlù.” Ne panwàkenzà cyòci aci, s’nwàkápènda Nyumà Mwîmpè.

145 Mmunyì mûndiku mwà kwambila cyanza cyànyì ne: “Ncyèna neebè dijinga”? Piikalàbi ne kùdi balongeshi, s’kùdi dyakula dyà mu myakulu. Piikalàbi ne kùdi batangadiki, s’kùdi kàbìdì mapà a dyondopa. Mmunyì mùdiku dikàsà mwà kwambila dísu ne: “Ncyèna neebè dijinga”? Nwamònu anyi? Wèwè, pawikalà mwànà mulela kùdi Nzambi, udi wenda ne witaba kantu ne kantu kàdi Nzambi wàmba ne nkîmpè aku. Newèndelè buludì mu Bukènkè.

146 Pààkakùmbanà dîbà bwà Èkèleeziyà kutentemukaYè, Luther’s wàkatentemuka. Pààkakùmbanà dîbà bwà Èkèleeziyà kunyungishaYè cyanza Cyèndè, Wesley’s wàkanyungisha cyanza aci. Pààkakùmbanà dîbà bwà Èkèleeziyà kwakulaYè, Mpenta’s wàkabwela mu cyalu. Aci ncyà bushùwà. Kàdi, mpindyewu, mònaayi.

147 Nwènu nudi nwamba ne: “Kàdi cifwànyikijilu?” Nudi nwamba ne: “Kùdikù cifwànyikijilu cyà cyòci aci anyi?” Èyowà’s, mukalenge.

148 Nudikù nujungulula ne Yudaàsà Mpongoloki awu, mufwilakanyi mulelèlè ne Kilistò awu, ùvwa muntu mutèndeledi wa dikèma anyi? Nukààvwakù bajingùlùle aci anyi? S’bàvwa nendè ne dyeyemena dyàbùngì, kùdi bânà bèètù abu, mu mùshindù wà ne wàkashààla too ne mulami wa cibùcilu cyà èkèleeziyà.

149 Ne Yudaàsà Mpongoloki awu wakabingishiibwa ku diitabuuja, mwikàle mwitàbùùje Mukalenge Yesù Kilistò.

150 Wàkajidiibwa ku Dìyì. Ebèlù 17.17... Ndi njinga kwamba ne, Yone Munsantu 17.17: “Bàjidilè, Taatù, ku Bulelèlè; Dìyì Dyèbè m’Bulelèlè.” Ne Yèyè ùvwa Dìyì.

151 Ne bôbò bààkapèèbwa bukolè bwà kuyabò kayiisha Èvànjeeliyò, ne kwipata baadémons, ne kwondopa babèèdi. Yudaàsà Mpongoloki awu, Maatàayi 10, s’wàkabadiibwa munkaci mwàbò amu. Nènku kupàtukabò e kuyabò kiipata baadémons, ne kuyiishabò Èvànjeeliyò mu mùshindù wà ne bangènzàmpèkààtù bààkanyingalala ne demons yàkuumuka. Ki kwalukilabò bènda bàcyònkómoka ne bèèla mbilà, ne bàpicila mu cikondo cyà dicyònkómoka, cyenzè bu disangisha dikesè dyà mu citùùdilù, dyà beena cijila. Ne Yudaàsà’s ùvwa ànu naabò kalamandindi. S’ncyà bushùwà menemene, mwikàle ànu naabò.

152 Kàdi pààkalwà dîbà dyà ne ki Mpenta nyèyè ewu, Yudaàsà’s wàkaleeja cìvwàye.

153 Apu’s ki pààkaleeja èkèleeziyà wa beena cijila cìvwàye, mwaba awu mene, ne kukùdimukabò e kuvilabò Nyumà Mwîmpè mwinè uvwa ubàlombola bwà kubwèlabò mu màyi matàmbe kwikala a ndòndò awu, bôbò kukùdimuka buludì e kuMuvilabò.

154 Ndi mumanyè ne bàdi ne dikolesha dyà maalu bûngi cyanààn-... Mémè ncyèna mwena Mpenta to. Kacya nçitukù mwikàle wa mu bulongolodi bwà beena Mpenta to, kacyapù. Ntu mwimàne pankaci. Mémè ncyèna mwena Mpenta, Méthodiste, Baptiste nànsha. Mémè ntu ànu mwena Kilistò wa mu Bible awu. Kwajiki. Mémè ndi ngiitabuuja cìdi Dìyì dyàmba. Ne ncyèna mwà kuvila dipà dyà dyakula dyà mu myakulu nànsha; mémè mudìvilè, nêmvilè dilongesha ne dipà disonsola dikwàbò dyònsò. Aci ncyà bushùwà. Kacyà nçitukù mutwè ku cyà bânà bèètù beena Mpenta pa “cileeji cìmwèpelè,” cyà dyakula dyà mu myakulu aci nànsha. Ncyèna ngenzakù aci to. Mpindyewu, abi bìdi ànu bîmpè, pìikalàbò bàcìitabuuja mùshindù awu. Aci ncibàtàngìle, nwamònu’s, kàdi bìdi ànu bîmpè menemene. Mémè... Pòlò wàkamba ne: “Ndi muswè bwà nwènu bònsò nwikalè nwakula mu myakulu.” Ndi muswè kumòna muntu ne muntu mwikàle sheemàsheemà ne Nzambì mùshindù awu.

155 Bòbò bàdi ne bintu bikwàatakaja bûngi cyanàànà, diitabuuja dyà mafi bûngi cyanàànà. Bàdi bàpàtuka kuntwaku, misangu yabûngi, ne bènza maalu bu ne bàdi ne Nyumà Mwîmpè, bambè cintu kampàndà cìvwà kacìyi dyakula dyà mu myakulu to. Nsòmbelu wabò ngudi mujaadike ne cìvwa ncinyi. Kàdi kùdi kaacintu kalelèlè ne kashùwashùwàle kènzeka ànu bu ne kakwèna bwalu to, díbà dyònsò.

156 Èè, bwà cinyi dyabùlù kàyikù mufwànyine kwela panshi cîshi cyà dyela ku ndòbò cyà dijimija naaci díbà, cyà cikòlòlò? Ncyà bushùwà ne, mmufwànyine kucyèla panshi, bwà kuteeta bwà kupangisha. Mmwelè panshi cintu cìmwècìmwè aci mu beena cijila. Mmwelè panshi cintu cìmwècìmwè aci mu ba-Méthodistes. Wàkeela panshi cintu cìmwècìmwè aci mu ditukù dyà Luther. Ne yèyè ùdi munkaci mwà kwela panshi cintu cìmwècìmwè aci leelù ewu. Ne ku bukolè bwà mapà, dyà dyondopa dyà kùdi Nzambì ne dyà dijingulula, ki kwelaye panshi cintu cìmwècìmwè aci eku.

157 Kàdi cìfwèbè cìdi ne dyumvwija kaayi kùdi, pìikalàbi ne wèwè udi mwà kwakwisha nyuunyi? Nyuunyi yìdi yàmba ne: “Pàndi mémè mmòna cìfwèbè, s’ki pàa kudiila mpòpò apu. Bimuma byà pomè byà bitàmbe bwîmpè bìdiku, s’mpabwìpì ne mwaba wùdi tubwengè túsanganyiibwa ne wùdi bifwèbè bilembeleja.” Ncyà bushùwà.

158 Kàdi nudi numòna mùdi nyumà awu mubànde buludi mwaba ewu. Ne Yesù wàkatàngila e kudyànjila kumwèna aci mu èkèleeziyà wa Kàtòlikè, mu dipàtuka amu. KwambaYè ne: “Kanùbìikidi muntu nànsha umwe ne ntaatù to. Kanwikadi nwenza dyambulula didi kadiyi ne musinga to, bintu byònsò ebi.” KupàtukaYè e kwamba ne: “Mpindyewu nwadìmukaayi, mufwilakanyi ne Kilistò neikalè mufwànàngàne menemene mu mùshindù wà ne neàseswishè too ne Basungula mene bu ne bivwa mwà kwenzeka.”

159 Tàngilà, wêwè mwanèètù, virgò yàkayà katwilangana ne Mukalenge yivwa búngì kaayi? Dikùmi. Yònsò yivwa virgò. *Kujidila* mbwena kwamba cinyi? “Mukezùke, wa cijila, virgò.” Yòyi dikùmi yivwa virgò. Yitaanu kayivwa ne Maanyi mu myèndù yàyi to. Yitaanu yivwa ne Maanyi mu myèndù yàyi. Yitaanu *eyi* yivwa yà cijila ne virgò ànu mùvwà *eyi* nùнку ewu amu. Kàdi *Maanyi* àdi àleeja cinyi, mu Bible, mutwácyàngàcìdi makèèlèlà dilòòlò, dilòòlò dyà dyàbwàbwà amu? Nyumà, “Nyumà Mwimpè” awu. Yivwa midisukùle ne misòmbè mwaba awu, kàdi yivwa ne bwòwà ne miimànyine kule ne Mpokolo uvwa upòngolola Maanyi awu. Nwamònu’s, midyènzè bulongolodi kàdi kusòmba, nènku’s ki yòyi ayi, yà civùmvù. Ki kùvwà cikondo cyà èkéleeziya ciyè nkwòkù aku.

160 Mpindyewu, mpindyewu tukàadi tukafika ku cimanyinu cyà Nzambi. Ndi ne tusunsa makùmi àsàtù, bu Mukalenge mwà kwanyisha. Mpindyewu ndi muswè bwà nùbuululèku pàmwè naanyi, dyàmbedi, bwà kujandula mùdici cyà mushinga munène, cimanyinu cyà Nzambi eci.

161 Vùlukàayi cìdi cimanyinu cyà nyama wa lwonji; kì n’communisme nànsha. Cimanyinu cyà nyama wa lwonji cìdi cìfùmina ku Loomò, pa buloba bujimà; cyena-Kàtòlikè, pàmwè ne cyena-Mishònyì mbikadiswikilemù, ntèndeleele mudyènzè bulongolodi. Ne bòbò abu nebùikalè mwà kusanga maèkéleeziya mu mùshindù wà ne nebikengelè bwà èkéleeziya ne èkéleeziya yònsò inaminè cyòci cintu aci, yètù yìdi kayiyi yisungulujangana bilondèshile màngumba eyi mmisàkùibwe ku luseke. Ncyà bushùwà.

162 Bwàkabuulwibwà nshapità wa 9 mpindyewu. Tùbalàayi kaaba aka ne ntèmà yònsò bwà katanci kakesè cyanààna, bu Nzambi mwà kwanyisha, bwà tùmònè cìdi Ye mwambè mu Dìyi Dyèndè. Mpindyewu . . . [Katùpà kàà mukàbà wà mèyi munda mutupù—Muf.] . . . wa—wa Bwàkabuulwibwà, ne mvensà mwi4. Tèèlejàayi eci.

Ne bàakabàtùmina dìyi (pàakamònàbo bipùpù bipòngolodiibwa) bwà ne kabènzèdi bisoosà bibi anyi micì . . . anyi cintu cibishi cyònsò, anyi mucì kanà wònsò; ànu . . . bantu bàdi kabàyi ne cimanyinu cyà Nzambi pa mpalà pààbò abu.

163 Pàvwà bipùpù ne cyà kulwa, cintu cìmwèpelè cìvwà cikùbiibwe ng’aba bàvwà batwibwe citampì mu Bukalenge bwà Nzambi. Eci ncilumbulwidi bwà kukenketa, pàdi bantu . . . Nènku bu Nzambi mwa kunkwàcisha, mu katanci kakesè netùcijaadikilè ku Dìyi dyà Mukalenge ne, eci ki cikondo cyà ditwibwà dyà citampì dyà mwaba. Ne aba bàdi bàCibènga, kakwèna cingà cintu cìdi cishààle to ànu dinyooka dyà Cyendèlèèlè.

¹⁶⁴ Mpindyewu netùye mu Dipungila Dikùlukulu. Nèku tùyaayi apa nùku, bu nwènu mwà kuswà, mu Mukàndà wà Yèhezèkèlè, bu nwènu mwà kuswà, ne tùbalàayi bwà katanci mu Yèhezèkèlè 9. Mpindyewu, ku dikwàcisha dyà Nzambi mpindyewu, Yèyè àtùkwàcishèku. Nèku sòmbaayi bwà dilongesha, ànu bwà tusunsa makùmi àsàtu cyanààna tùdi tùlondà etu, bu Nzambi mwà kwanyisha. Mpindyewu eci ncitàngile, nùfundàayi aci, Yèhezèkèlè 9, eci ncitàngile. . .

¹⁶⁵ Cintu cyà kumpàla civwà cikèngelà bwà twètù kusòmbesha mpindyewu, Citampì cyà Nzambi ncinyi? [Katùpà kàà nukàbà wà mèyi munda mutupù—Muf.] Kanwènaayikù nwela meeji ne ncidwànyine kwikala cyà mushinga munène anyi? [Disangisha didi dyamba ne: “Amen.”] Bible n’Diyi dimpèku bwènu nwènu anyi? [“Amen.”] Mpindyewu ndi mumanyè ne nudi ne aci nàku, aba bàdi bàmba ne: “Kuneemekela kwà ditùkù dyà nsabatu,” kàdi kakwènakù katobà nànsha kàmwè kàà Mufùndù bwà kutwà aci nyama ku mikòlò to, mu Dipungila Dipyadipyà. Tùjandulàayaaku cidi Citampì cyà Nzambi, mu bushùwà bwà bwalu. Buulùlaayi mu Efèsò 4.30, 4.30, ne 1.13. Cifùndaayi. Efèsò 4.30 ùdi wàmba ne:

. . .*kanùbungamiji Nyumà Mwìmpè wa Nzambi to, unùdi batwìbwe nendè citampì too ne ku ditùkù dyà bupikudi bwènu.*

¹⁶⁶ Mpindyewu, *kutwà citampì* kùdi kùumvwija cinyi? Kutwà kwà citampì “ncimanyinu cyà dyoya.” Ncyà bushùwà anyi?

¹⁶⁷ Èè, nukàadikù bamòne mupàyi wa bintu wa ku kàwulù pàdiye ùpàya bintu mu màkaadikà anyi? Neàpatukè ne neàteekè bùngi kampànda *emu*, ne bùngi kampànda *emu*. Mukòntononyi ùdi ùlwa, ùtápamù disù; nèku eci cyòci *ciikàle* citènkakana ndambù, ciikàle cinyungakana: “To. Ncyàkubikànga to. Bikèngela ùbisaasùlùlè ne ùbyènzùlùlè.” Cintu cidi cìlondà, neàteetè bwà kubìpàya cyàkàbìdi; neènzè cyòci eci bibi. Mukòntononyi ùlwa: “Mbibi. Enzùlùlè.”

¹⁶⁸ Nèku cyòci aci ki cidi Nzambi wenza ne èkèleeziyà Wendè ntàntà yònsò buleyi ewu. Neupayè, ne uyàya mu Dyulu; udi wangata byònsò abi bwà kuya naabi. Manàyi èbè a twartà awu, huh, cintu cìkwàbò cyònsò cyùdi mwà kupàya mu èkèleeziyà, wèwè udi uteeta bwà kucyàngata kuya naaci. Nzambi ùdi ànu ùcipiisha; kwèna mudìlongòlòle bwà ditwìbwa dyà citampì to.

¹⁶⁹ Kàdi pàdi Nzambi ùmòna muntu, ne nyumà munyongàme, mucibùlùke, ne meeji matòòke mu mwoyi, mutwè binù ku cyoshelu, Nzambi ùdi ùmukàngila ciibi cyà maalu a pa buloba, ne ùmutwà citampì munda amu ne dibàtiiza dyà Nyumà Mwìmpè, ne didi dishàala too ne pàalwà Yesù; kakùyi kuumukila ku ditàbuluja too ne ku dikwàbò to, kàdi, “too ne ku ditùkù dyà bupikudi bwènu.”

170 Pàdì ànu dikaadikà adi, ciibi aci, cikàngiibwa, ne citampì cyà bukalenge citwibwapù, kadyèna mwà kukàngudiibwa kabìdi to too ne pàdìdi dikafika kwàdi kwà ndekeelu kùyaayàdi.

171 Ne muntu yònsò udi muledibwe cyàkàbìdi ne mutwibwe citampì mu Bukalenge bwà Nzambi, kàcyèna kàbìdi ne dijinga dyà maalu a pa buloba to too ne ku ditùkù dyàmubwejà Yesù Kilistò mu Bukalenge. Pa nàнку wèwè ne lutàtù, kàdi wamba mùdi ne Nyumà Mwímpè; wikalè wa mu èkèleeziyà wa ba-Méthodostes, èkèleeziyà wa ba-Baptistes, èkèleeziyà wa beena Mpenta; wikalè mwele mbilà, mwakùle mu myakulu; mbàtìjiibwe cyàdi panshi, cyàdi muulu, mummyaniibwe màyi; wèwè mutungùnùke ànu ne kwikala ne ntàtù yà mùshindù awu, mbímpè wàlukilè ùtangilulè dipàyà dyà bintu adi. Neyà bushùwà. Ùdi wangata bintu bipitèpìte búngì; bìdi bitàmba kutènkakana, bitàmba kunyungakana. Nzambi kàakubitwa citampì mùshindù awu nànsha.

172 Pàdì lutètè lwà blé lùmata mu buloba, nànsha byòbi ne. . . Lutètè lwà blé alu lwòlò lufwè mu lwòlò amu, kalwèna mwà kupàtula mpoopu to, nànsha byà munyi. Lutètè lwà blé nelùkwamè ànu lutètè lwà blé, cyà bushùwà ànu bu cintu kanà cyònsò eci. Nènku piikalàbi ne tudi bakùnyiibwe Dimiinu dyà Nzambi didi kadiyi dibolà adi, mmunyi mùdiDi mwà kupàtula cingà cintu cìdi kaciyi mwoyi wà ku Mwoyi wà Kilistò?

173 Nyumà Mwímpè ùlombola Èkèleeziyà, ùdi ùMulombola mu Bukolè bwà dibìikà dyà ku lufù dyà Yesù Kilistò, ne wèwè udi mutwibwe citampì too ne ku ditùkù dyà bupikudi. Aci m'Bible. “Kanùbungamiji Nyumà Mwímpè wa Nzambi to, unùdi batwibwe nendè citampì too ne ku ditùkù dyà bupikudi bwènu.” Efèsò 4.30.

174 Mpindyewu, kumpàlà mene kwà Nyumà Mwímpè kulwaYè, yèyè mmutwibwe citampì kumpàlà mene kwà cikondo cyà bàà Bisàmbà byà bendè kubangaci. Mmutwibwe citampì mwinshì mwà bitèekedi byà myèndù byà ngòlò abi, tuvwa ne dizola, bwà kucyumnvwa, kale wàwa mwinshì mwà cikondo amu.

175 Yèyè wàkatungunuka ne kubàtwàla kacya ànu ku Abraham, Izàkà, Yakòbò, Davidi, ne bònsò bàà cikondò cyònsò cyà mìdimà civwàbo naaci mu matùkù a Aakàbà, too, ne ku Solòmò, ne bakwàbò, too ne mwà kalwàci kupàtuka mu ngiikàdìlù wa civùmvù awu. Kadi ànu pabwìpì ne kwoyaYè cipungu aci, Yèyè kupèèsha beena Yudà nkààyaabò ngiikadilu munène mulenga wa Nyumà Mwímpè ne: “Kanùyì mu njila wa bàà Bisàmbà byà bendè to, kàdi nùye kùdi mìkòòkò mijimìnè yà Izàlèèlà.” Mmwòmò anyi? “Yèyè wàkalwa kùdi bàà Kwàbò, kàdi bàà Kwàbò kabàkaMwakidila to.”

176 “Kàdi bònsò bààkaMwakidila, Wàkabàpèèsha Bukolè bwà kulwabò bàna bàà Nzambi.” KwambaYè ne: “Ndi mbàpèèsha Mwoyi wà Cyendèlèèlè.” *Mwoyi* wà Cyendèlèèlè wùdi wùfuma

ku mwakù wà cyena-Ngelikà “Zoe.” Zoe ngwôwò Mwoyi awu. Zoe m’Mwoyi wà Nzambi. Nènku byòbì ne Mwoyi wà Nzambi mmusòmbèle munda mwèbè, wùdi wùpàtula nsòmbelu wa difwàna dya Nzambi ànu mùdìbì bulelèlè ne mèmè ndi mwimàne mu cyambilu emu. Ne muntu udi naaWù awu, kèna mwà kubùtuka to ànu mùdi Nzambi kàyi mwà kubùtuka amu, bwalu Nzambi ùdi munda mwà muntu awu. Amen. “Ewu udi utèèleja Méyì Àànyì, ne wìtabuuja Ewu udi muNtùme, ùdi ne Mwoyi wà kashidi, ne kààkulwa mu dipiila nànsha; kàdi ùdi ne Mwoyi wà kashidi.” “Ewu udi udyà mubidi Wànyì ne ùnwa Mashi Àànyì, Nèmmubiishè ku lufù ku ditùkù dya ndekeelu.” Ki Dìyì Dyèndè ndyòdi adi. Busàmbi kaayìpu bwà mwena kwitabuuja’s wè! Ne ndipiila kaayì bwà aba bàdi bàbènga bwà kwendela mu Bukênkè!

¹⁷⁷ Kùdi kwènda kwènta luuyà, kì mmwômò anyi? Èyo, Cidi cìmpè bwènù nwènù. Mònaayi, anjì mònaayibi eci ní ncilelèlè. Mwanèètù, tudì bafwànyine kucyàngata, ku Mufùndu ne ku Mufùndu, ku lumingu ne ku lumingu, ku lumingu ne ku lumingu, ne kushàala pa cyòci eci, too . . . cyena-bwalu cìmwècìmwè aci, munda mwà cidimu cijimà, katùyi ànu tucipàtula mu Bible to, cyòci cyònsò, kàdi biikàle ànu pa cintu cìmwècìmwè aci.

¹⁷⁸ Mpindyewu ànu bwà kantu kakesè cyanààna kàa dibanga naakù mwab’ewu, netwàlukilè paanyimà bwà kujandula cidi dibèngà dya dibàtiiza dya Nyumà Mwìmpè dyùmvwija bwènù nwènù, cyàkumvwijàci bwàbò bòbò mu ditùkù adi.

¹⁷⁹ Mpindyewu mu Yèhezèkèlè nshapità wa 9, mupròfeta wàkamòna Yelusàlèma. Mpindyewu vùlukàayi, tudì munkaci mwà kwakwila cyàkàbìdi mu mwaba awu, beena Yudà, ànu pabwìpi menemene ne ku ndekeelu kwàbò.

¹⁸⁰ Mpindyewu tudì mu bàa Bisàmbà byà bendè, ku ndekeelu kwàbò. Pashìshe netùbwelè mu Bukalenge bwà bidimu cinunu. Èyo.

¹⁸¹ Kàdi tàngilàayi mpindyewu, nukàadi nujikija bwalu bwà beena Yudà mpindyewu. Mupròfeta ùdi ùdyànjila kucimòna. Eci cìcidi ànu bidimu lukàmà, bidimu bitwè ku nkàmà mwandamukùlù, kumpàlà kwa dilwa dya Mukalenge, ne cyàkambiiwba mu cipròfeta kùdi mupròfeta. Mpindyewu tèèlejààyaaku ne ntèmà patùdi tubala apa.

Wàkeela kàbìdi lubilà mu maci àànyì ne dìyì dikolè, wàmba ne: Seemèjà pabwìpi aba bàdi ne bujitu bwà cìmenja, ne muntu yònsò mwikàle ne cyamù cyèndè cyà dishebeyangana naaci, anyì cyamù cyà dibùtulangana naaci ku cyanza.

¹⁸² Mpindyewu tàngilàayi ne ntèmà mpindyewu patùdi tubala apa.

Nènku, mònaayi, bantu bàsambòmbò bàakafumina ku . . . cùibi cyà kumutù, cidi cisanganyübwà lwà ku nord, ne muntu yònsò ne cyamù cyà dishebeyangana naaci mu cyanza; ne muntu awu munkaci mwàbò, muvwàle bilàmbà bitòòke, muvwàle bilàmbà byà linà, muwikàle ne kalòndò kàà máyi a mukàndà kàà mufundi ku luseke lwèndè; ne bààkabwela . . . ne bààkiimana kumpàla, ku luseke lwà cyoshelu cyà cyamù cyà mìtakù.

Nènku butùmbi bwà Mukalenge Nzambi wa Izàlèlèlà bwàkabànda e kuumuka kùvwà mukèlùbà, kwàkadiye aku, kuyabù ku cibweledi cyà nzùbu. Ne yèyè wàkeela dìyi ùbükila muntu uvwa muvwàle bilàmbà byà linà awu, uvwa ne kalòndò kàà máyi a mukàndà kàà mufundi ku luseke lwèndè awu; (Tèelejàayi.)

Ki MUKALENGE kumwambilayè ne: Pìcilà munkaci mwà cimenga, munkaci mwà Yelusàlèmà, (citùmina Yelusàlèmà), útwe cimanyinu pa mpàlà pàà bantu bàdi bàpùmunà ne . . . bàdila bwà . . . binyangu . . . bìdi byènjübwà munkaci mwàcì.

Ne pashìishe kùdi bakwàbò abu kubàmbilayè mu maci àanyi ne: Ndàayi . . . paanyimà pààbò nupicila mu cimenga amu, ne nùtuute: ne mèsù ènù kaedyanganyi paanyimà, anyi kaikadi ne . . . luse nànsha;

Nùshipè nùbutulè bakùlumpè ne bânà, ne bansongàakàji, . . . bânà batekète, ne bakàji; kàdi kanùseemenyi pabwipi ne pàdi muntu nànsha umwe udi . . . ne cimanyinu nànsha; nènku yèyè wàkabangila ku mwaba wà cijila. Nènku . . . kubangila kùdi bakùlù bàà ku bantu bàvwà kumpàlà kwà nzùbu aku.

183 Mpindyewu tàngilàayi mupròfetà awu mu Nyumà, mwambwìbwe mu Butùmbi. Nzambi kwamba Yè ne: “Nènkuleejè mùNgààkòsà bwalu abu ne beena Yudà, kumpàlà kwà kulwa kùdi bàà Bisàmbà byà bendè.” Balàayi mvensà awu, anyi nshapità udi mucidyànjidile awu. Mpindyewu, pàakafikàye muntwamu, kwambayè ne: “Mèmè kumòna . . .” Dyàmbedi, wàkamòna mpèkaatù mu cimenga amu, mùvwàye kàyikù mwanji kumòna kacya kwònsò aku to, nènku kumònayè Yelusàlèmà. Mpindyewu vùlukàayi ne, ciwva cilongolwela ànu beena Yudà nkààyaabò, kí mbàà Bisàmbà byà bendè to; beena Yudà, ne cimenga cyàbò cikùlù, Yelusàlèmà. Ànu mùvwàbi makèèlèlà dilòòlò amu, tuvwà bacilongolwèle beena Mishòonyi; mpindyewu, dilòòlò edi, cidi bwà beena Yudà. Yèyè wàkamba ne: “Pìcilàayi mu cimenga amu.” Ki bantu bàlwalwà aba biikàle ne byamù byà dishebeyangana naabi mu byanza, bàya bwà kashebeyabò bintu byònsò mu cimenga amu. Yèyè kwamba ne: “Mpindyewu anji indilaayi, kasunsa kàmwè cyaanà.”

184 Ki mwômò amu kupàtukamù Muntu muvwàle bilàmbà bitòòke. Twánjàayi kwimana bwà katancì kakesè cyanààna. “Muvwàle bilàmbà bitòòke,” bwakàne, cijila. “Muvwàle bilàmbà bitòòke,” Uvwa ne kalòndò kàà màyi a mukàndà ku luseke Lwèndè. Yèyè ne: “Anjì picilà mu cimenga dyàmbedi, kumpàlà kwà kulwabò, ùtwe cimanyinu pa mpàla, cimanyinu pa mpàla pàà muntu yònsò mulùme, mukàjì, mwànà wa balùme, ne mwànà wa bakàjì, mu cimenga amu, udi upuma ne ùdila mwadi bwà cinyangu cidì cyènjii bwà mu cimenga, bwà mpèkaatù yà bantu.” Kubàtwa cimanyinu!

185 Ki pashìshe, paanyimà pà Yèyè mumanè kujikija ne mutwè cimanyinu, Yèyè kwalukila ne kwamba ne: “Cyènjii bù.”

186 Pashìshe Yèyè kutùma bantu abu, wàmba ne: “Ndàayi, ne kanùlaminyinyi cintu nànsha cimwè to, kàdi nùshebeye nùbutulè cyònsò cidì kaciyi citwà cimanyinu.”

187 Tàngilà kùneeku, wèwè mwanèètù. Mutwànganyi wa cimanyinu awu kàvwa mungà muntu to ànu Nyumà Mwimpè.

188 Nènku mònayyi, bu Yèyè mwà kulwa mu Jeffersonville, dilòlò edi, mu Branham Tabernacle, anyi mu tabernacle mukwàbò kanà yònsò ewu mu cimenga emu, anyi èkèleeziyà mukwàbò kanà yònsò ewu, nganyi udi Yè mufwànyine kutwà cimanyinu, uvwa ne meeji matòòke menemene ne wa kweyemena kumpàlà kwà Nzambi mu mùshindù wà ùdila ne wèla mbilà, ne ùsambila muunyà ne bufuku, bwà mpèkaatù wa cimenga?

189 N’Cifwànyine kwenza cinyi pa bayiishi bàdi bàlekelà bakàjì bààbò bàpàtuka bavwàle bilàmbà byà dyowa naabi màyi, ne bàdyòlola mu tùpùtulù, ne bàbànda bàpweka ne mìsèèsù; cibì bimba mu kòralè, ne bàdilaaba bilaabu ne bènza maalu bu ba-Izàbèlà aba. Ne pàdi. . . Balùme pambèlu apu, bànwà mfwankà, ne bànwà maalà, ne bènza bintu byà lukutukutu, ne bànyà twartà twà mfrangà, ne bikwàbò byònsò! Ne bàdi bènza maalu bu ne bwalu kì mbubàtàngile to; bàya ku didyà dinène kampàndà dyà bàdyàngana ne nzòlò yà bibèmbà, anyi fètè mu mwaba kampànda. Bàshààla kumbèlu mu diisàtù dilòlò munkacì mwà kubandila ntèlèviziyò, pamutù pàà kuya mu disangisha dyà milòmbò. Mu cikondo cyà muvù wà luuyà, bàkànga èkèleeziyà, bwà masangisha. Cidì Ye mufwànyine kutwà citampi ncinyi?

190 Cidì citùkèngela, dilòlò edi, nkukwata mbutangadiki bwàbùngi bwà mu Hollywood ebu kubwela panshi! Ne kupeta ditàbuluja cyà cyena-kale, ditùma kùdi Nzambi, balùme ne bakàjì bàdi bàya katwà binù ku cyoshelu! Ne kulekela dilabulangana dyà ku byanza edi, ne dyela dyà byanza muulu, ne dibàmyamina dyà màyi, ne dibàbàtiiza dyà cyàdi panshi, cyàdi muulu, ne tuubintu tukwàbò twònsò twà kwisùkwisù ne tusùmbù etu. Ne kuya ku nyumà mulelèlà, munyongàme, mucibùlùke, mùdi mpèkaatù amu. Kusambakaja abi nànkù, kàdi kukùtula mbilà mikolè yà cyena-kale, yà mwànà udi ufùma ku

dilediibwa ayi. Amen. Wa mùshindù awu ki udi upeta Nyumà Mwímpè. Ncyà bushùwà.

¹⁹¹ Nànsha bôbò biikàle ba-Méthodistes, ba-Baptistes, anyi beena Kàtòlikè, anyi cyònsò cidibo aci! Pàdibo bàya kumpàlà kwà cyoshelu aku bàdila myadi, muunya ne bufùku ne: “Éyi Mukalenge Nzambì, anjì tàngilàku ànu mpèkaatù yà cimenga eci! Mwoyi wànyì kawèna mwà kwikalakù ne diikisha to! Ncyèna mwà kwikalakù ne diikisha to, Mukalenge, pa kumòna mùdì bintu ebi byènzèka emu. Éyi Nzambì, enzàku cintu kampànda’s! Tùtùminèku ditàbuluja dyà cyena-kale,” wèwè’s udi mufikè pabwipi ne kupeta Nyumà Mwímpè dîbà adi, mwanèètù! . . . ? . . .

¹⁹² Kàdi wèwè useemenakù ne bwalu nyawù udi mutùpìke muyè muulu mwalùkile, anyi ne bwalu nyawù waji maja ku mijiki, anyi ne bwalu wenjì cintu cikwàbò kampànda; ne wendì unyunguluka ne utonoka, bu ne bwalu abu kî mbukutàngile, ne uleepesha mishiku, ne ukòkangana, ne ukashààla wa mu èkèleeziyà, ne wenda utùpika ku mwaba ne ku mwaba; aci’s cidi cileeja ne kacya kùtukù mwanjì kupeta cintu nànsha cìmwè to ànu kwìnè kwònsò aku.

¹⁹³ Mwanèètù, aci, aci’s mbwanga bwímpè bukolè, kàdi bwòbù abu’s ki bwàkwakajà bìmpè. Ncyà bushùwà’s. Éyowà’s, mukalenge. Necinùpàtùle pambèlu, kakùyi muntu nànsha umwe wa butekètè munkaci mwènù to.

¹⁹⁴ Bu Mòsà. Ndi muswè kutàpakù dîsù mu kashèètè kèndè kàà manga aku, kàdi nwènù? Úvwà mupàtùke ne bantu miliyò yibidi kuntwaku. Nudikù baswè kutàpa dîsù mu kashèètè kàà manga kàà Mòsà, cìvwàye naaci anyi? Bantu bakulàkàjì bònsò abu, ne nkàmà yà bânà bakesè bàvwà bàlediibwà dilòòlò dyònsò, ne bantu bacibùkile panshi, ne babèèdì. Kàdi pààkapàtukàye, munda mwà bidimu makùmi ànaayi amu, kamwàkiikalakù muntu nànsha umwe—umwe wa butekètè munkaci mwabò to. Bàmwè bàà kunùdì nwènù bangàngàbukà, bàdì basòmbe kaaba aka dilòòlò edi aba, kanwènaayikù baswè kumòna mu kashèètè kèndè kàà manga anyi?

¹⁹⁵ Twànjaayibi kumùtapa dîsù bwà kumòna ne ncinyi cidìmu. Mpindyewu tàngilàayi paanyimà. Netùjandulè. “Mémè ndi Mukalenge udi ukwondopa.” Kwajiki. “Amen.” Ki cìvwàku ncyòci aci. “Mémè ndi Mukalenge udi ukwondopa.” Wamba ne nekwikalè mwànà wàlediibwa. “Mémè ndi Mukalenge udi ukwondopa.” Ùdi ne dîsaamà dyà bisulùsulù. “Mémè ndi Mukalenge udi ukwondopa.” Ki kabèjì kàmwèpelè kàà bwanga kàvwàyekù mwà kupèeshangana nkòkò aku. Ki kàmwèpelè kàvwà kàmukèngela. Ki kàmwèpelè kàvwàye naakù. Ki cìvwà Nzambì ùmupeteshà.

Mu bushùwà bwà bwalu, leelù ewu: “Kaa, twètù katwèna twitabuuja Aci to. To, aci . . .”

196 Nzambì kàtukù Ùshintuluka nànsha. Yèyè ùdi umwèumwè awu. Piikalàbi ne nyumà ewu, wènza bintu byà lukutukutu mùshindù wùdi bantu bènza leelù ewu ewu, mu dínà dyà bwena Kilistò, mwendèshe Nzambì ku mwoyi mu cifù Cyèndè kale wàwa, piikalàbi ne civwa “ncinyangu” bwà bantu kwenzabò nànkù awu, s’ncinyangu leelù ewu. “Yesù Kilistò ùdi umwèumwè awu makèlèlè, leelù, too ne kashidi.” Kaa, ngàavu kuumvwa bwena Nzambì bwàmbwedì.

197 Mònaayi: “Ndà eku,” mwàkambàYe, “Ùpìcilè mu cimenga amu ùtwe cimanyinu aba bàdi bàpuma ne bàdila myadi bwà cinyangu cidì cyènjiibwà mu cimenga emu.” Kì pashiishe kwambaYè ne: “Paanyimà pàà Wèwè mwenzè aci,” kulekelelaYè bantu bàvwà ne byamù byà dishebeyangana naabi ebi, ki kuyabò ne kushebeyabò bintu byònsò.

198 Mpindyewu, wèwè mulongi wa maalu-malonda, anji indilàku kakesè. Yesù wàkalwa mu mubidi; Nzambì, mumwènèshìibwe mu mubidi. “Nzambì ùvwa munda mwà Kilistò, ùpungisha bàà pa buloba ne Yèyè mwinè.” Nènku pàakalwàYe mu mubidi apu, Wàkaya eku ne eku wènda ùlongesha. BààkaMubiikila ne: “Beelèzèbùlà; mwena lubùkù.” BààkaMwelulwila, bwà dilediibwa Dyèndè, ne bikwàbò byònsò; bààkaMubènga, bààkaMukùpa pambèlu.

199 KwambaYè ne: “Ewu yònsò wàkula bibi bwà Mwànà wa muntu awu, nebàmufwilèci luse, kàdi ewu wadidìnga kwakula bibi bwà Nyumà Mwímpè awu, kabààdyàkumufwilaci luse to, nì mmu eci cikondo nì mmu cikondo cìcilwalwà.”

200 Yèyè kusangisha pàmwè ndambù mukèsè wa beena Yudà. Kàakaya kùdi bàà Bisàmbà byà bendè to. Yèyè wàkaya kùdi beena Yudà. Ùvwa mutùmìibwe kùdi beena Yudà; kacivwa cipungu cyà bàà Bisàmbà byà bendè to. Kàndeyi kàà ndekeelu kàvwà munkaci mwà kuteema mu cikondo cyà beena Yudà, ki kuyaYè kwòkù aku. Nènku kùvwa bantu bakesèè bààkaMwakidilà, bàvwà babìikidìibwe bwà kupàtuka abu.

201 Ànu menemene mùdìbi leelù ewu emu. Ànu mùvwà Nyumà Mwímpè munkaci mwà kwakwila mu Yesù Kilistò, mubàbìikila bwà kupàtuka musangu awu; ki mùdì kàbìdì Nyumà Mwímpè munkaci mwà kwakwila mu Yesù Kilistò, ùbìikila bwa kupàtuka, leelù ewu.

202 Bàvwa biitabuuja citàmbe-mfùkilu. Bàvwa bàtàngila Mulombodi wabò. Bàvwa bàMutàngila. Bàvwa bamanyè ne Yèyè nguvwa Mfùmù wa bapròfetà. Bàvwa bamanyè cyònsò civwàYe. CivwàYe wàkula, Nzambì ùvwa ùcìshindika ne wàmba ne civwa Bulelèlè. Bàvwa bamanyè ne bàvwa ne Bulelèlè. Bàvwa bamanyè Uvwabò biitabùùje, ne bàakatùngunuka ne kuya ne Yesù.

203 Pashiishe kuMupoopelabò pa nkùrusè. KwambaYè ne: “Taatu, bàfwilèku luse, ki mbamanyè nànsha cidibo bènza aci to.”

204 Kàdi pàakalwà Ditùkù dyà Mpenta mu kaabujimà, kùvwa musùmbà wà tuubantu tukesè, tùdila myadi, twèla mbilà ne tütungunuka ànu nànkù. “Kàdi pàakalwà Ditùkù dyà Mpenta mu kaabujimà . . .”

205 Dyàkàmwè kulwakù nsaserdòsè wènda ùbànda ne mùsèèsù, mwikàle ne kashèètè kàà tuumàmpà twà kosher, kashèètè kàà kòomunyò, kwambayè ne: “Pàtulààku ludimì mpindyewu, kàdi mèmè nénnwè mvinyo” anyi? Lukutukutu naanyi we! Kulwakù muyiishi wa beena Mishòònyì wènda ùbànda ne njila, wàmba ne: “Netwàngatè cyanza cyà buunyànà, ne kwangata ngondo yisambòmbò yà dikàndika” anyi? Huh! Lukutukutu’s! “Nénkumyamìnè màyi. Nénkubàtìizè. Nénkuumùshè mùshindù *kampànda*, nénkubwejè mu èkèleeziyà, nkwelè mwoyi ku cyanza wà buunyànà” anyi? Lukutukutu’s!

206 “Kàdi pàakalwà Ditùkù dyà Mpenta mu kaabujimà, dyàkàmwè kwàkafùma mu Dyulu bu cipeepèlè cicolè cyà cìvuma, ne Cyàkuuja nzübu mujimà mùvwàbo basòmbèle. Ndimì mipandùlùke yàkiikila pamutù pààbò, mifwànangàne ne kapyà.” Bààkabanga kukukumina, ne kuzaazabala, ne kumacisha nta, ne kutwila mate, ne kutungunuka nànkù awu.

207 Wèwè udi wamba ne: “Nànsha!” Mèmè’s nénkujaadikilèci mu Bible. Èyowà’s, mukalenge. “Udi muswè kungambila ne ki cyàkenzàbo anyi?” S’ki cidi Bible mwambè.

208 Nuvwakù bamanyè ne Yeshàayi wàkamba cipròfeta anyi? Indilaayi nnùbadilèku kaacintu kakesè mu Yeshàayi emu, katanci kakesè cyanàànà. Yeshàayi, nshapità wa 28, kubangila ku mvensà wa 8.

Bwalu mèsà ònsò mmùle tètè ne bilùshi . . . (wàkula bwà ditùku edi’s) . . . ne bukooyà, mu mùshindù wà ne kakwèna mwaba mukezùke nànsha wùmwe to. (Mwanèètu, piikalàbi ne aci kacìvwa cimfwànyì cyà beena Yudà’s!)

Nganyì wàlongeshàyè dimanya? Ne nganyì wàfikishayè ku dyumvwa dilongesha? (Tudi munkaci mwà kwakula bwà Dilongesha, dilòlò edi.) . . . aba bàdìbo balekèèshe mabèèle, ne bàdìbo buumùshe ku mabèèle.

Bwalu bìdi ne cyà kwikala kanungu pa kanungu, kanungu pa kanungu; mulongo pa mulongo, mulongo pa mulongo; . . . (Ki mùshindù wùdi Èvànjeeliyò ùlwa, kuumukila ku Genèsè too ne ku Bwàkabuulwibwà.)

Bwalu ku mishikù yidi yikukumina ne mu mwakulu mukwàbò mmùngàakulà ne cisambà eci.

. . . ne *diikisha ndyôdì edi*, ditalala dîMvwà mwambè ne nedilwe adi. Ne bwà byônsò ebi kabàvwa mwà kuumvwa to, kàdi nebùùmukè bàye, bènda bàkùpa mitù.

209 Ki bwalu mbwòbù abu's. S'ki cidìYe mwambè. Aci kacìvwa dîyì dyànyì mèmè to; aci n'Dîyì Dyèndè. Wèwè ùDishintùlùlè's, pawikalà ne mùshindù. KaDyèna mwà kushintuludiibwakù to. Mmwambè ne: "Kanungu pa kanungu; mulongo pa mulongo; ndambù apa, ndambù pàapa." Èvànjeeliyò yônsò mu kaabujimà ùdi ne cyà kuyiishiibwa.

210 Èvànjeeliyò mu kaabujimà ùdi ne cyà kutwàdijila mwaba ewu, ne bôbò bààkaMuyiisha. Ne pàakayiishàbo, Bukolè bwà Nyumà Mwimpè bwàkalwa.

211 Ne beena Yudà bàvwà beelùlwile Yesù abu, kàdi bàakaseka, bàmba ne: "Ha-ha-ha! Bantu aba mbùle tètè ne mvinyò mupyamùpyà." Bààkatwà citampì ku kwàbò kwà diya kwà Cyendèlèlè. Bààkamba ne: "Bwà cinyì bìdi ne tudi mwà kuumvwa mu mwakulu wètù sungasunga, byenzi byà kukèma bidìbo bàmba? Mona's, bantu aba's mbùle tètè ne mvinyò mupyamùpyà. Ha-ha!" Kusekabò ne kusekabò.

212 Ki Peetèlò, munsantu mukèsè mubùnguluki wa mu malaba awu, muyiishi wa mwimànyine pa mushèètè wa nsàbangà awu, bamwenzèle cibumbà cyà mushèètè wà nsàbangà, ùmba ùtùpikilapù, kwambayè ne: "Nwènù bantu bàà mu Yudààya, ne nwènù bàdi basòmbèle mu Yelusàlèmà, eci cimanyiiwbè kunùdi, ne tèelejàayi dîyì dyà mukana mwànyì. Kàdi eci—eci ncyàkambàbo kùdi mupròfetà Yowèlà. Bantu aba kì mbùle tètè ne mvinyò mupyamùpyà to, munùdi nwènù nudicinkila amu, bwalu tudi pa dîbà citèemà dyà ditùkù. Kàdi eci ki Cyôci aci." Yèyè kufunkuna mu Bible. Ntu nkàadi misangu yônsò ànu mwambàmbe ne: "Piikalàbi ne eci kì n'Cyôci aci to, nènshaalè ànu mulamè eci too ne pàalwà Cyôci aci, piikalàku cintu kampànda cishiilàngàne." Cyà bushùwà. Kwambayè ne: "Eci ncyàkambàbo kùdi mupròfetà Yowèlà. Nebyènzekè mu matùkù a ndekeelu," bidimu binunu bibidì byà ndekeelu.

213 Bidimu binunu bibidì byà kumpàla, bààkabùtula buloba ku màyì. Bidimu binunu bibidì biibidì, Kilistò kulwaYè. Mu bidimu binunu bibidì byà ndekeelu: "Nèngiìcikijè Nyumà Wanyì." Àlèluuyàh! Kì nnè "NÈNdongeshè ndambù wa bayiishi ne ntùma ndambù wa bansaserdòsè" to.

214 "Kàdi Nèngiìcikijè Nyumà Wanyì ùfùmina mu Dyulu; bàna bèènù balela balùme ne bakàjì nebàmbè bipròfetà; pa basadidi Bàànyì balùme ne bakàjì Nèngiìcikijè Nyumà Wanyì, ne bôbò nebàmbè bipròfetà. Nèndeejè bimanyinu muulu mu maulu, ne panshì pa buloba." Ki civwàci. Aci ki civwà dibanjija.

215 Ki beena Yudà abu kusekabò ne kwelulwilabò, ne kwambabò ne: “Mbùle tètè ne mvinyò mupyamùpyà.” Aci kutwàci citampì ku kwàbò kwa diya kwà Cyendèlèlè.

216 Mu cidimu cyà 96 cyà bikondo byètù ebi, dilwa dyà Tiitò, mu kupweka kwèndè kwà ùfùmina ku citùpà aci, Yelusàlèrà ùvwa munyùngulukila kùdi bilwilu. Nènkù nudi bamanyè cyàkenzekà anyi? Beena Yudà abu bàakamba ne: “Mpindyewu netwàlukile ku nzùbu wa Mukalenge.”

217 Kàdi aba bàvwà badìmwija ne buujìbwe tètè ne Nyumà Mwìmpè. . .

218 Bu mwàkambà Josèphe ne: “Bantu badì bàà minyìnyì ya bantu abu, nutu nudyà mubidi wa Yesù wa ku Nazalèètà.” Yèyè ne: “Bààkasokoka mubidi Wèndè, ne ki wùtùbo bàdya awu.” Cìvwàbo bàdya cìvwa mmèèsà a Mukalenge. Kwambayè ne bòbò, musùmbà wà bantu awu kale wàwa ne: “Baabuludyanganyi abu.”

219 Nuvwakù bamanyè ne bantu abu kale wàwa bààkabìkidiibwa ne “mbaabuludyanganyi” anyi? Nutu bamanyè nànkù anyi? Nudi bamanyè cìdi *mwabuludyanganyi* anyi? Muntu kampànda udi “mupàle.” Èyowà. Tàngilàayi Pòlo munsantu.

220 Mpindyewu, nwènù aba, nwènù—nwènù ba-Baptistes nutu banangè kwamba ne: “Pòlo Munsantu, kaa, mèmè ndi mumwitàbùùje.” Nwènù beena Kàtòlikè nutu nwamba ne: “Kaa, Pòlo Munsantu,” ne nutwà mishikù ku àbìdi anyi àsàtù a ku makàsà èndè, mpìngù yidì mu Loomò mwàmwa yàya. “Pòlo Munsantu! Èyowà’s, mukalenge!”

221 Mònaayi cyàkambà Pòlo Munsantu pàvwàye kumpàlà kwà Agrìpà. Wàkamba ne: “Mu mushindu udìbò bàbìkila ne ndipàmbuka awu,” munsantu mubùnguluki wa mu malaba, “ki mushindu ùndì nkuukwila Nzambì.” Amen.

222 Mvw’a kujingakù ngìkala mutwàngàje nendè byanza; mvwa mufwànyìne kwamba ne: “Ndi ngiitabuuja mùshindù wùmweùmwe awu, Pòlò! Àlèluuyàh! Èyowà’s, mukalenge, cintu ànu cimwècimwè aci! Bidimu cinunu ne nkàmà citèemà bikaadi bipite, Pòlò. Ncìcìdi ngiitabuuja ànu cintu cimwècimwè aci!” Ncìcìdi ànu ne Nyumà Mwìmpè; bimanyinu bìmwebìmwe abi, maalù a kukèma àmwèàmwe awu, byònsò ànu bìmwebìmwe abi; bicìkàle ànu kacya byàtùngunuka, Nyumà Mwìmpè umwèumwè awu, batùngùmùke ànu ne kutwìbwa citampì too ne (dìbà kaayi?) ku ditùkù dyà bupikudi.

223 “Èvànjeeliyò ewu neayiishiibwè. . .” Cinyi? “Èvànjeeliyò!” Èvànjeeliyò ncinyi? Kì “ànu Dìyi nkààyaadi” to. Pòlò wàkamba ne: “Èvànjeeliyò mmulwè kutùdi, kì ng’anu mu Dìyi nkààyaadi to, kàdi ku Bukolè ne dileeja dyà patòokè dyà Nyumà Mwìmpè nkùdi Èvànjeeliyò mulwè.”

224 Pòlò mmwambè ne: “Kacya ncitukù mulwè ne dilonga kampàndà dyà tulaasà dyà sèminère nànsha, mulwè mwikàle nshindumuna myakù yà tùyaayi tükamònè, bwà lupàndù lwènù kwikalalù lushindàmèène pa myakù yà ditàmbisha ne mishikù yà yisànkishangana, ne musambu kampàndà wà Tùmbishàayi Mulopò anyi twitabàayi wa bàpostòlò, anyi cintu cyà mùshindù awu to. Ncítukù mulwè kunùdì nàнку awu to. Kàdì ntu mufikè kunùdì mumanyè cintu ànu cìmwèpelè, Bukolè bwà dibìikà dyà ku lufù dyà Yesù Kilistò, ne dileeja dyà patòòkè dyà Nyumà Mwìmpè.” Àlèluuyàh! Nzambi àtùpèèshèku bàmwè ba-Pòlò bìikalà kabàyikù mwà kudyàngana mukana to, kàdì bàCyàdija mwaba awu kabàyikù . . . ? . . . kabàyikù bavwàle gants yà sèminère to. Amen. Cimanyinu cyà Nzambi! Amen.

225 Mpindyewu, tudi ne díbà búngì kaayi? Dyàbúngì, kí mmwómò anyi? [Disangisha didi dyàmba ne: “Amen.”—Muf.] Kì cìmvwà mwelè meeji. Abi mbìmpè. Maaàlabà ngwa diisambòmbò, nànsha umwe wa kunùdì kèna wènza mudimu to. Eyo. Eyo. Vùlukàayi, ànu—ànu katancì kakesè cyanààna.

226 Sambilaayi! Mòna, mwanèètù, eci cikondo ncyà meeji matòòke. Eci ncikondo civwà cikèngelà twètù kudìbalulwila bwalu ne bwalu. Ncyèna mwab’ewu bwà kwenza bikàsà to. Bu ne mvwa ngenza bikàsà, bìvwa bikèngela bwà mèmè kuya ku cyoshelu ne kunyingalala. Bìdì mwà kwenzeka ne ndi bu udi wenza bikàsà bwà bàmwè bàà kunùdì, kàdì ncyèna ne meeji à kwenza nàнку to. Ntu ngenza maalu bu mukùtàkàne ndambù, ku misangu; ncyèna mwà kudìpangisha kwenza nàнку to. Cintu kampàndà ncidì cìnkwaàta, cìngenzeja mùshindù awu, pa nàнку ncyèna mwà kudìpangisha kwenza nàнку to. Kàdì munda mwà mwoyi wànyì, mwanèètù, ndi nCìitabuuja ne mwoyi wànyì wónsò. Kùkaadi bidimu makùmi àbìdì ne byà mu njìla bìndì nyiisha Cyòci eci ku cyambilu eku, pa buloba bujìma, ne Nzambi muCìshindike ne bimanyinu ne maalu a kukèma. Amen. “Yesù Kilistò umwèumwè awu makèèlèlè, leelù, too ne kashidì.” Èyowà.

227 Mpindyewu Yèyè wàkamba ne: “Ambilà bàdì ne byamù byà mvitá abi abu bwà bàlwe kumpàla eku.” Bòbò’s bààkabènga bwà kupeta cimanyinu aci. Kì kuyaYè, ne Tiitò kukwàtayè bimanu byà Yèlusàlèma, ne kubwelabò mu cimenga amu; kubàfwishabò ne nzala mwómò amu, mu mùshindù wà ne bààkasàbisha péku bàna bàà muntu ne mukwèndè ne kubàdyabò. Bààkadyà bizubu byà micì, mashìndà a panshi aa. Ne pashìishe ndekeelu wa byònsò pààkakèngelàbi bwà bòbò kulekela. . . Tiitò, pààkabwelàye mu Yèlusàlèma, wàkabùtula bùtùbùtù byònsò bìvwàmu, kushipa bakàjì, bàna, bàna bàà mu mabòkò, baakwidi, ne bikwàbò byònsò, ne wàkoosha cimenga.

228 Ne Yesù wàkamba ne: “Nekùlwe cikondo cìikalàku kakùyì kushààle dibwe nànsha dímwè to.”

229 Baaakamba ne: “Tàngilàayi kàtèdralè kèètù kanène kàka. Mwanèètù, twètù aba’s tudi ba-Baptistes, anyi ba-Méthodistes, anyi beena Mpenta, anyi ní ncinyi cyònsò.”

Yèyè ne: “Kakwàkushààla dibwe nànsha dimwè pamutù pàa dikwàbo to.”

230 Bidi bileeja ne “Nzambi kàtu ùsòmbela mu nzùbu myenza ne byanza nànsha.” Nzambi ùtu ùsòmbela mu myoyi yà buntu. “Bwalu Wèwè wàkaNgenzela mubidi.” Nyumà Mwímpè kàtu ùsòmbela mu nzùbu nànsha. Ùtu ùsòmbela mu mwoyi. Ki ntempèlù nyèyè awu. “Kanwèna bamanyè ne nudi ntempèlù yà Nzambi udi ne mwoyi anyi?” Amen. Kwibaka ntempèlù, kwibaka èkèleeziyà, diitabuuja dyèbè dyònsò ndiibakila mu nyungulukilu wa ntempèlù webè awu anyi wa èkèleeziyà webè awu, lupìngù lwà mucì, mwikàle wàngata cimanyinu cyà nyama wa lwonji kùyi mumanyè to. Ncyà bushùwà. Nujèmbelèlakù ne nujìmija díbà dyènù, nwènù bayiishi, bwà kutwà bulongolodi bwènù nyama ku mikòlò, ne baya naabù ànu buludi mu ifernò ne mwàbù mwònsò.

231 Ndi nkwambila, mwanèètù, díbà dyàkànyì bwà bantu kutàbulukabò ne kuyiishabò Èvànjeeliyò ne Bukolè bwà Nyumà Mwímpè, pàdìbi ne myaba yònsò, tùbiikilàayi ba-Méthodistes, ba-Baptistes, ba-Presbytériens, beena Kàtòlikè, ne bònsò, ku nkùrusè wa Yesù Kilistò.

232 Mpindyewu, wèwè udi wamba ne, mulami wa mìkòòkò wa kale awu ùvwa wàmbula bwìcì, ùbùtèèka pa lubwebwe. Pàvwà mìkòòkò yìvwà yìsaamà yilàka, yìvwa yìsàngala.

233 Mwanèètù, mèmè ndi ne kafuku kajimà kàà tuntu tufùnda kùle tèntè naabù kaaba aka, dilòòlò edi. Ne nèmùtèèkè pa Lubwebwe, Kilistò Yesù, nènku mìkòòkò yìdì yìsaamà yìdì mwà kulàka ne kusàngala. Ncyà bushùwà. Mwanèètù, tèèlejà, ncyàkubùtèèka pa èkèleeziyà nànsha bàmba ne ngwa bìshi to. Kabwèna bwà èkèleeziyà nànsha bàmba ne ngwa bìshi to. Mbwà Kilistò. Ncyà bushùwà menemene.

234 Byà kwìsùkwìsù’s! “Kaa, èyowà’s, twètù’s tudi twitabuuja Kilistò.” Byenzedi byènù’s mbìdì bìjaadikà cinùdì nwitabuuja.

235 Yesù mmwambè ne: “Bimanyinu ebi,” n-e-b-i, “nebìfilè aba bàdì biitabuuja, too ne ku ndekeelu kwà buloba. Ne mu Dìna Dyànyì bóbò nebiipatè baadémons, nebàakulè mu myakulu mipyamìpyà; bóbò bakwàte nyòka ne byanza, anyi banwè cintu cìdì cishebeyanganà, kacyàkubènzela bwalu to. Bóbò batentèkèle babèèdì byanza, babèèdì nebàsàngalè.” Aci ki cyàkambà Yesù. Awu ki Mèyi a ndekeelu àkapàtukà ku mishikù Yèndè. Nènku ki kwangaciibwaYè mu Dyulu.

236 Kàdi bantu bàdì bàya, biitabùùje ne bàyiisha dyondopa dyà kùdì Nzambi, ne makolè a Nzambi, bàà pa buloba bàdì bàbàbiikila ne “mbapàlè.” Ne Bible mmwambè ne: “Piikalàbo

bàbiikila Mfùmù wa nzùbu ne ‘Beelèzèbulà,’ ambààyaku tǔng mwàbèngàbo kubàbiikila bôbò abu, bayiidi Bèndè?”

²³⁷ Bapiishibwe, ki bôbò bàdi panshi myandanda abu, bônso bafwè ànu menemene. Kadi Josèphe mmwambè ne: “Bantu abu bàvwà. . . bantu bàà mùshindù wà bwena Kilistò abu—abu, bààkuumukà mu Yelusàlèmà kuya mu Yudààyà, ne bààkapànduka ku cijì cicolè cyónsò eci.” Mpindyewu abu bàvwa mbeena Yudà, ndekeelu wa beena Yudà’s.

²³⁸ Lùkàsàlùkàsà mpindyewu, bwà tusunsa tukesè tùdi tùlondà etu, tǔjikijàayi bwalu bwà bàà Bisàmbà byà bendè, ne lùkàsà lwónsò. Tùbuululàayi mu Bwàkabuulwibwà ku nshapità wa 7, mutwikalà mwà kujikijila cipungu cyà bàà Bisàmbà byà bendè. Mònaayi eci ní ncyà bushùwà ní ncyà mafi. Aci cìvwa mwaba ùvwa mupròfetà wa Yèhezèkèlè 9 mwambè cipròfetà cyà dyoya dyà cikondo aci; mpindyewu ki Nyumà Mwímpè nyewù wamba cipròfetà cyà dyoya dyà eci cikondo. Tèelejàayi ne ntèmà mpindyewu pàndi mbala ne ntèmà yónsò apa.

Nènku paanyimà pàà maalu aa. . .

²³⁹ Bwàkabuulwibwà 7 mpindyewu: “Paanyimà pàà maalu aa mèmè kumòna banjèlò bànaayi. . .” Bàvwa mbabàndi bàà pa tubalù bààkapàtukà, ku nshapità mwi6, ne mwàkapàtukàbo; kabalù kàà cisengàsengà, ne kabalù kafiike, ne kabalù kakùnze, ne bikwàbò, bu mùdibi ne, babàndi bàà pa tubalù abu bàkaavwa bendèlèndèle pa tubalù apu pa buloba kùkaavwa ntàntà mule.

. . . mèmè kumòna banjèlò bànaayi biimàne ku ntengu yinaayi yà buloba, bakwàte mpeepèlè yinaayi. . . bwà yôyi kayituutu pa buloba to, anyi pa mbù, anyi pa mucì nànsha wùmwe.

²⁴⁰ Mpindyewu tàngilàayi cikèènà-kumòna cyàkadyànjlàyè kumòna. “Mèmè kumòna banjèlò bànaayi biimàne ku ntengu yinaayi,” myaba yinaayi mu nyungulukilu wa buloba amu, mwanjèlò, bakwàte mpeepèlè yinaayi. *Banjèlò* “mbaamisànjeelà.” Ki mùdi Bible mwambè. Ne *mpeepèlè* mbwena kwamba ne “mvità ne dikòkangana.” Ùvwa mukwate mpeepèlè yinaayi ayi, kaaba aka, . . .? . . . Mpindyewu tàngilàayi, mvensà mwi2.

Ne ngàkamòna mwanjèlò mukwàbò ùtùuluka ùfùmina ku esètè, mwikàle ne (c-i-t-a-m-p-i, mudimu mujikija’s, mu ngaakwilù mukwàbò). . . mwikàle ne citampì cyà Nzambi udi ne mwoyi; ne yèyè wàkeela lubilà lwà dìyi dikolè kùdi. . . banjèlò, . . . bàvwà bapèèshibwe bwà kwenzela buloba ne mbù bibi abu,

Wamba ne: Kanwènzedi buloba bibi to, anyi mbù, anyi. . . micì, too ne patwàtwà basadidi bàà Nzambi wetù citampì pa mpàla pààbò.

²⁴¹ Tàngilàayi, nêmbalè too ne kwìnshì.

Ne ngàkuumvwa búngì bwà aba...bàakatwàbo citampì: ne kwàkatwibwa citampì kùdì—kùdì... bàakatwibwà citampì binunu lukàmà ne makùmi ànaayi ne binaayi bàà...cisàmbà cyà—cyà...cisàmbà cyà bàna bàà Izalèlèlè.

242 “Bàà cisàmbà cyà Yudà, dikùmi ne bibìdì...” ànu nàнку, ne “Beenyàminà,” ne “Gaadà,” ne “Luubènà,” too ne ku “Zabùlònà,” ànu nàнку too ne ku bisàmbà dikùmi ne bibìdì, ku ndekeelu kwà mvensà wa 8. Ne dikùmi ne ibìdì kuvudija ku dikùmi ne ibìdì mbúngì munyi? [Disangisha didi dyamba ne: “Lukàmà ne makùmi ànaayi ne inaayi.”—Muf.] Lukàmà ne makùmi ànaayi ne inaayi. “Binunu lukàmà ne makùmi ànaayi ne binaayi,” bwà bônso beena Yudà. Mpindyewu, tàngilàayi.

Nèнку paanyimà pàà cyòci eci mèmè kutàngila, ne, mònaayi, musùmbà munène, wùvwà muntu nànsha umwe kàyikù mwà kubala to, wà bifuku byònsò, myakulu yònsò, ne matùnga ònsò,...

243 Bávwa bafùmìne penyi? Nudi numòna’s, tudi tumòna beena Yudà abu ku ndekeelu; ne pàvwà banjèlo bapèèshùbwe bwà kuya kabùtula, mmwambè apa ne, wàkamòna ne “wàkakwàta.” Kàdi kùvwà bóbò aba bafùmìne mpenyi, bàà bifuku byònsò, myakulu, ne matùnga aba? Bàakamwènèka mu cyalu.

...ne bisàmbà, ne myakulu, biimàne kumpalà kwà Mwànà wa mùkòòkò, ne kumpalà...bávwa bavwàdika...Mwànà wa mùkòòkò, bavwàdika mìzabì mìtòòke, ne malala a mabwè mu cianza;

244 Mukàjì-musèla, Mukàjì-musèla wa bàà Bisàmbà byà bendè ùkaavwa mumana kutwà citampì. Tàngilàayi.

Ne bóbò bààkeela lubilà lwà dīyi dikolè, bamba ne: Lupàndù kùdì Nzambì wetù udi musòmbe pa nkwaswa wa butùmbi, ne kùdì Mwànà wa mùkòòkò.

Ne—ne...banjèlò bávwa biimàne mu nyùngulukilu wa nkwaswa wa butùmbi,...bakulù,...nyama yinaayi ayi, ...bààkapòna batwè mpàla pànshì kumpalà kwà nkwaswa wa butùmbi, ne bàakakuukwila Nzambì,

Bamba ne:... (Tèèlejàayi, eci cyòci kaciyi cyùmvwika bu disangisha dyà Nyumà Mwimpè to!) Ne-...Mabènèsha, amen, butùmbi,...lungènyi,... kusàkidila,...lumù,...bukolè,...ngulu, bìikalè kùdì Nzambì wetù kashidi ne kashidi. Amen.

245 Bwànyì mèmè, aci kaciyèna cyùmvwika bu disangisha dyà baccalauréat wa mushingà wà mùshindù kampàndà nànsha. Aci’s cìdi cyùmvwika bu diicikija dyà cyena-kale, dyà Nyumà Mwimpè’s, bwànyì mèmè. Bantu abu bávwa mu mwaba kampànda; bàakamanya cyà dyenza pàakamònàbo Mwànà wa mùkòòkò musòmbe pa Nkwasa wa butùmbi apu.

Ki umwe wa ku bakùlù abu . . . kungambilayè ne: Aba mbanganyi . . . ne bavwádika mizàbì mitòòke aba? ne bàdi bàfùma penyi?

246 Mpindyewu uvwa mumanyè beena Yudà bônso, kàdi aba mbafùme penyi, “bàà bifuku byónso, myakulu, ne matungà” aba? Tàngilàayi.

Ki mèmè kumwambila ne: Mukalenge, wèwè's udi mumanyè. (Yone wákamba ne: “Ncyèna mumanyè to.”) Ki kungambilayè mèmè ne: . . .

247 Aba mbàvwà bapetè Cyôci aci, ngeela meeji. Èyo.

. . . Aba mbàdi bapàtùke mu dikèngà dinène, (bàbìikidiibwa ne “mbansantu babùnguluki bàà mu malaba,” bààkeelulwilàbo, kubàkèngesha, kubàseka) . . . bapàtùke mu dikèngà dinène, ne basukùle mizàbì yàbò, ne bayìvwijè mitòòke mu mashi a Mwànà wa mùkòòkò. (Tàngilàayi!)

. . . bàdi kumpàlà kwà nkwasà wa butùmbi wa Nzambi, . . .

248 Mukàji ùtu ùshààla penyi? Mukalenge-mukàji ùtu ùshààla penyi? Awu's m'Mukàji-musèla's, Mukàji-musèla wa bàà Bisàmbà byà bende.

. . . ne bàdi bàmukwàcila mudimu muunya ne bufùku mu ntempèlù: . . .

249 Mukàjàanyi's ngudi unkwàcila mudimu kumbèlu, muunya ne bufùku. Nwamònu anyi? Awu's m'Mukàji-musèla wa Yesù; awu's m'Mukàji-musèla wa bàà Bisàmbà byà bendè.

. . . ne ewu udi musòmbe pa nkwasà wa butùmbi neàsombelè munkaci mwabò.

Kabààkwikala kàbìdi ne nzala nànsha, . . .

250 Àlèluuyàh! Midimu yà ku ditùkù ne ku ditùkù ayi mmijikè. Èè, twètù tutu bapangilèpàngile byàkudyà byàbùngì, kàdi katwàkupangilakù didyà nànsha òmwè Kwàka to. Amen.

251 Ndi mumanyè ne mààmù wanyi mukesè, mukwàte ne byà luse, mukùlákàji awu mmusòmbe kaaba aka dilòòlò edi. Ne nkààvwakù mumumònèmòne ùjuuka ku mèèsà. Tuvwa tunwà kàfè ne màmpà mume. Úvwa ùkàpòngolwelapù, wèlapù nsùkaadi. Kàdi kabìvwakù bùngì bukùmbànè byà bitùkùmbana to; bàna bàvwa bààsa myadi, ne bàjuuka bàya. Kàdi katwàkwenza nànkù Kwàka to! Tààtù wanyi mukùlákàji awu wàkalààlè mu mabòkò àanyi emu, dinsambù dyà mùsèèsù dyàdyà, kuntu kwàka, ne kufwàye, mwikàle ne nzala.

252 Kàdi katwàkucyènzakù kàbìdi to. Àlèluuyàh! To, mukalenge. Byà dyumvwa nzala abi kàbìdi to.

Bôbò kabààkuumvwa nzala kàbidì to, anyì bôbò kabààkuumvwa nyòòtà . . . anyì muunyà kawàkubòòsha to, . . .

Bwalu Mwànà wa mùkòòkò udi munkaci mwà nkwasà wa butumbi awu neàbàdùshè, ne neàbàlombòlè mu mpokolo yà màyi yìdì ne mwoyi; ne Nzambi neàbàkùpùlè . . . binsónji byónsò ku mèsù.

253 S'mbifwànyine kukèngela bwà kudilabò ne kwenzabòku ndambù wa maalù a bantu bàseka, pàdì Nyumà Mwímpè ùlwa's. Kàdì Nzambi neànùkùpùlè binsónji byónsò ku mèsù.

254 Tàngilàayi, yèyè wàkamòna “banjèlò bànaayi biimàne ku ntengu yinaayi, bakwàte mpeepèlè yinaayi.” Lùkàsàlùkàsà mpindyewu. Dìbà dyànyì dyàjikì, kàdì lekèlaayi nnùfikishilèku kaabwalu aka, kumpàlà kwà kujikija. Tàngilàayi, yèyè wàkamòna banjèlò bànaayi abu. Wàkamòna ndekeelu wa èkèleeziyà wa beena Yudà, mùshindù wàkabàmònaye bàlwa mùshindù wùm wèwùm wè awu; bàlwa biikàle ne byamù byàbò byà dishebeyangana naabì, cilwilu aci's.

255 Mpindyewu tàngilàayi. Ncimanyinu cyà mùshindù kaayi cyàkapatèbo kùdì Èkèleeziyà wa Nyumà Mwímpè, bu cimanyinu pa mpàlà pààbò? Cìvwa ncimanyinu cyà mu nyumà. Nyumà Mwímpè ngwàkabàtwa cimanyinu aci. Ncyà bushùwà anyi? Yèyè kààkabàtápakù nsàlu ku mitù to, mmwòmò anyi? To.

256 Kabàvwakù bapiishibwe kùdì ditungà kampàndà dyà dibènga ntèndeleeleu nànsha. Bààkabàpiisha kùdì bààbò sungasunga. Nudi bumvwè cìndì muswè kwamba aci anyi? Èkèleeziyà mulelèlè wa Nzambi udi ne mwoyi neàpiishiibwè kùdì Kàtòlikè ne Mishòonyì, bwalu bôbò aba nebàdisangè. Bôbò bàkaadi bamanè kwikala pàm wè bu umwe, bu maamù ne mwanèndè wa bakàjì.

257 Kàdì aba nùnkù, *apa*, kabàvwa nànkù to. Pashìshe, tàngilàayi cyàkenzàYe. KwambaYè ne: “Twà cimanyinu pa mpàlà pààbò.” Cìvwa ncimanyinu cyà mùshindù kaayi? Mémè nènnùbadilèci, Byenzedi 2. “Bàvwa bònso ne díyi òmwè mu mwaba wùm wè. Ne dyàkàm wè kwakalwa cyonà, Mwanjèlo awu ùtùluka mu Dyulu.”

Wèwè udi wamba ne: “Mwanjèlo awu ùvwa cyonà anyi?”

258 Cìvwa ncinyì, cyàkendà kumpàlà kwà Davìdì aci ncinyì, pààkuumvwàye mutooyi wa mabèjì, mabèjì a micì yà múriers, bufùku abu pàvwàye ne bwòwà bwà kuya ànu kumpàlà apu? “Bààkuumvwa cyonà cìfùma mu Dyulu cyenzè mùdì cipeepèlè cikolè cyà cìvuma amu,” Nzambi nguyààya kumpàlà kwàbò awu.

259 “Ne dyàkàm wè kubamwènelakù Nyumà Mwímpè ne Bukolè.” Bôbò kupàtuka e kuyabò mu misèèsù, bènda bèèla bidya bàtùpika, ne bàakula mu myakulu, ne mishikù yikukumina, ne bèèla mbilà, ne bènza maalù bu bakwàcike

maalà, ne muntu ne muntu mwikàle ànu ùcyònkómoka ne ùtùmbisha Mukalenge Nzambi. Kí mmwômò anyi?

²⁶⁰ Ki mùshindù wùdi Nzambi wènta pàdiYè ùtùma Bukolè Bwèndè pa buloba ku dibàtiiza dyà Nyumà Mwímpè. Ki kukwàtaBù mudimu buludi mwômò amu, ne Mukenji kuyaWù! Àlèluuyàh! Ki kwelabò mbilà ne kwelabò mikunda, ne kwakulabò mu myakulu, ne kupàtukabò kwàka. Ne aci cìvwa ncimanyinu cyà Nzambi citwà bantu abu. Ncyà bushùwà anyi? Nzambi nguvwa mutwè cimanyinu, ne ki mùshindù wà cimanyinu ciikalà Nzambi mwà kutwà bantu Bèndè leelù ewu. Cimanyinu cimwècimwè cyà Nzambi cyàkabàtwàbò kuntwaku aci, ku dibàtiiza dyà Nyumà Mwímpè, cìvwa ncitampi cyà Nzambi.

²⁶¹ Ndi muswè nnùkonkèku cintu kampànda, nwènú èkèleeziyà. Bible ùdi wàmba ne cimanyinu cyà Nzambi, mu ditùkù adi, cìvwa ndibàtiiza dyà Nyumà Mwímpè. Citàmpì cìvwa pa bantu, bwà kubàvwija bashiilàngàne ne bakwàbò, cìvwa ndibàtiiza dyà Nyumà Mwímpè. Mmwômò anyi? Dipungila Dipyadìpyà ndyambè, mu Efèsò 4.30 ne, Nyumà Mwímpè ki citampì cyà Nzambi, bwà bantu mu matùkù a ndekeelù, too ne kwènú kwà Cyendèlèlè kunùyaayà. Mmwômò anyi? Nènkù Nyumà Mwímpè ùvwa mubingè.

²⁶² Mpindyewu, tudi bapetè cikondo cyà ba-Méthodistes, tudi bapetè cikondo cyà ba-Baptistes, tudi bapetè dibingishiibwa, tudi bapetè dijidiibwa. Tudi bapetè bintu byònsò ebi, bilwè byènda bilondangana.

²⁶³ Ne kùkaadi bidimu bitwè ku makùmi ànaayi, dibàtiiza dyà Nyumà Mwímpè dyàkalongiibwa bwà musangu wà kumpàlà mu États-Unis. Mmwômò anyi? Kùkaadi bidimu bitwè ku makùmi ànaayi, kùdi bantu babangè kupeta . . .

²⁶⁴ Mpindyewu, bàvwa kale wàwa bàcibìikila ne mmudimu mwibìdi wà cyà bushùwà wà ngàsà, dijidiibwa adi. “Dijidiibwa,” ndyà cyà bushùwà.

²⁶⁵ Dibùngù bàdi ne cyà kwanji kudyàngata, kudyàmbula. Ndyùle dyònsò ne bitoci. Ndibingishiibwe, bwalu mu—muntu awu wàdyàmbùlù.

²⁶⁶ Cintu cìdi cìlondà, bìdi bìkèngela bwà—bwà bàdisukùlè ne kudìkùpula ne kudyùmisha. Mwakù *kujidila* mbwena kwamba ne “musukula, ne mutèèka ku luseke bwà mudimu.” Kàdi “mutèèka ku luseke *bwà* mudimu” kí mbwena kwamba ne wèwè udi *mu* mudimu nànsha.

²⁶⁷ Ne pashiishe Yesù wàkamba ne: “Nudi babènèshiibwe panùdi ne nzala ne nyòòtà yà bwakàne, bwalu nenùùjiibwè.” Nwamònu’s, Nyumà Mwímpè wàkalwa pa mwena kwitabuuja mujidila, wa cyà bushùwà, mulelèlè, mujidila. Ne bimanyinu ne maalu a kukèma byàkabanga kudimwènesha pààkenzekàbi ànu

ne dibungu dijidila adi dyàkadilongolola, ne Nyumà Mwímpè wàkabwelamù. Nudi numòna cìndi njinga kwamba aci anyi?

268 Kwèna mwà kupàtula màfutà mu mùlàngi wàwa pùikalàmu kamùyi màfutà to, nànsha mùlàngi awu mwikàle musukula bìshi. Kwèna mwà kupàtula dyakula dyà mu myakulu, ne dyondopa dyà kùdi Nzambì, ne Makolè a Nzambì, mu cintu mùdi kamùyi cintu nànsha cimwè to. Bìwva bikèngela bwà Nyumà Mwímpè àtwadiibwè, dîbà adi.

269 Tàngilàayi, kùkaadi bidimu bitwè ku makùmi ànaayi. . . Twánjàayi kupingajaa meeji paanyimà. Tudi tukènzakana, eku ne eku. . . Tàngilàayi ne ntèmà. Kwàkapàtuka mulombodi munène, wa mu Mvità yà Kumpàlà yà Buloba bujimà; bwà musangu wà kumpàlà mu maalu-malonda ónsò a pa buloba, mvità yà buloba bujimà. Yèyè ùwva ùbangila penyì? Ùbwela buludì mu Àlèmanyè. Cyàkenzekà ncinyi? Bwala bwà dikèma, muntu nànsha umwe kî mmumanyè to, too ne ku leelù, mwakiimanayi. Muntu nànsha umwe kî mmumanyè to. Balàayi *Dyenda Dijika Dyà Mvità Yà Buloba Bujimà*. Mupimbu ne mupimbu wónsò, mèmè ndi muwùbalè. Kakwèna muntu nànsha umwe. . . Cintu cìmwèpelè cìdìbo bamanyè, kwàkalwa díyi ditùma ne: “Lekèlaayi mvità!” Muntu nànsha umwe kî mmumanyè ne wàkatùma díyi adi nganyi to. Bwà cinyi?

270 Éyi Nzambì! Nenùmbiikile ne “munsantu mubùnguluki wa mu malaba,” nànsha bìshi, pa nànkù’s mbipiciibwe ne mèmè mwenzè bilondeshila mùndi ndyumwva’s. Tàngilàayi! Mùshindù mwinè wùndi ne kusàkidila kùdi Nyumà Mwímpè bwà kwikala ku cyambilu eku, bwà kusokolola’s wè.

271 Mònaayi. Tàngilàayi. Bàakaya, lupeepèlè lwónsò lùwva lùlwa pa buloba, bingoma byà cyena-leelù, bwà kubùtula bùtùbùtù bintu byónsò mu mvità yà buloba bujimà. Kàdi, dyàkàmwè, kwimanayi. Bwàkabuulwibwà nshapità wa 7, mmwambè ne: “Mèmè kumòna banjèlo bànaayi bàtùuluka bambùle byamù byàbò byà dishebeyangana naabi. Kàdi kulwakù Muntu ùfùmina ku esètè, mwikàle ne citampì cyà Nzambì udi ne mwoyi; kwambayè ne: ‘Kwàtaayi mpeepèlè yinaayi ayi.’”

272 “Lùkwàtè,” bwà cinyi? Beena Yudà kî mbanji kwikala mu mwaba wùdi wùkèngediibwà to. Butùmbi’s wè! Beena Yudà kabèena mu mwaba wùdi wùkèngediibwà, mwàkalayà Nzambì to. Yèyè ùwva mubàmbìle kùwvábò mwà kwikala, kwimana kwòkò aku. Wàkamba ne: “Panwàmònà mucì wà mfigi wèla matàmbà, nùmanyè ne cikondo cìkaadi pabwìpì.” Ne panùdi numòna beena Yudà bàalukila mu Pàlèstinà, nùmanyè ne cikondo cìkaadi pabwìpì. “Lukòngò elu kalwàkupità to bintu byónsò ebi kabìyi byùle.” Nènku, mwanèètù, mu bidimu mwandamutekètè byà ndekeelu ebi ki musangu wà kumpàlà wùkaadiku dibèndelà dyà beena Yudà dipeepè, mu bidimu

binunu bibìdi, kuulu kwà Yêlusàlèrà; èyowà's, bidimu binunu bibìdi ne nkàmà yitaanu. Amen. Beena Yudà kabàvwa mu mwaba wùvwàdi mwà kwikala dipeepa to, kàdi Yêyè kwamba ne: “Kwàtaayi! Kwàtaayi!”

²⁷³ Bwà cinyi, bwà cinyi “kukwàta”? Tàngilàayi, kùcìvwa bàmwè bàà Bisàmbà byà bendè, pankaci pàà cikondo cyà Wesley ne cikondo cyà Mpenta apu, bàvwà ne cyà kubwela. Kumpàlà kwà Mpenta kubwelayè mu Cikondo cyà Èkèleeziyà cyà Laòdikiyà, kùvwa “ciibi cyunzulula” citèèka kumpàlà kwà èkèleeziyà; ciibi cyunzulula, bwà ne: “Ewu yònsò udi muswè àlwe kunwà cyanààna ku Mpokolo wa màyi a Mwoyi.” Ciibi cyunzulula, citèèka. Kaa, ekèlekèle!

Ki kwambaYè ne: “Lùkwàtaayi!” Bwà cinyi?

²⁷⁴ Yesù wàkamba ne: “Muntu wàkapàtuka ne kwenza mudimu. Ne mukwàbò muntu wàkapàtuka, pa dikwàbò dîbà, ne wàkenza mudimu. Mukwàbò muntu wàkapàtuka ne wàkenza mudimu. Kàdi muntu kampànda wàkapàtuka pa dîbà dyà dikùmi ne ùmwè. Kàdi pààkiimanyikàye pa dîbà dikùmi ne ùmwè apu, yèyè wàkapèèsha yònsò wa kùdîbo difutu dyà mwomùmwè, pa dîbà dikùmi ne ùmwè apu.”

Bòbò kudìkonka ne mbwà cinyi. “Bwà cinyi yèyè, mufikè pa dîbà dikùmi ne ùmwè, bantu bònsò bàlwa?”

²⁷⁵ Beena Martin Luther bààkenzà mudimu abu, bààkenda mu cipungu cyà Luther, kufwilabò mu ngàsà! . . . ? . . . bakwàbò, ba-Méthodistes beedi bàà mbilà abu, bààkafwà mu cikondo cyà Wesley abu, bààkafwila mu ngàsà. Twètù tudi ne mwoyi mu cikwàbò cikondo, kaciyi cyà musangu wà kale awu to. Apa! Màmù ùvwa ne ciibidilu cyà kwendela mu ditempu dyà ngombe, kàdi twètù tudi twendela mu kàshinyi kàà Ford kàà modèle V-8, ciibwîpi ne kàsukumiibwa kùdì kandèkè kàà jet. Ncyà bushùwà's. Twètù tudi ne mwoyi mu cikondo cishiilàngàne, ànu menemene. Ne tudi ne mwoyi mu cipungu cishiilàngàne. Tudi ne mwoyi mu ditùkù dyà dyalujulula dyà Makolè a Nzambì, ne apa mene tumòna Bukolè bwà Nzambì mwàkenzàbò bòbò ku cibangidilu amu. Twètù tudi ne mwoyi mu cikondo cikwàbò. Kanùtàngidi paanyima kùdì Wesley, ba-Méthodistes, ne bònsò abu, ba-Baptistes, ne ba-Presbytériens abu to. Tàngilàayi apa kùdì Yesù Kilistò, Mubangi ne Mujikiji wa Diitabuuja dyà Bible. Àlèluuyàh!

²⁷⁶ Mpindyewu Mutàngilàayi, mwambè ne: “Shààla mucikwàte,” too ne (cinyi?) pààbwelà bantu bàà pa dîbà dikùmi ne ùmwè, dibìikidiibwa dyà ndekeelu dyà bàà Bisàmbà byà bendè. Màmù wàkenza mudimu kwòkù *aku*; papa ne bakwàbò mbenzèle mudimu *apa*; kaakù-mukàji wàkenza mudimu kale *wàwa*. Eci ncyètù cikondo, dîbà dyà dikùmi ne ùmwè. Mvità yà Buloba bujimà ayi yàkiimana mu ngondo wa dikùmi ne umwe wa cidimu aci, ditùkù dyà dikùmi ne ùmwè dyà ngondo awu,

dìbà dikùmi ne ùmwè dyà ditùkù adi, ne kasunsa kàà dikùmi ne kàmwè kàà dìbà adi; bwà bantu bàà dìbà dyà dikùmi ne ùmwè bààmòna mwà kubwela, (cinyì?) kupeta dibàtiiza dyà Nyumà Mwîmpè òmwè òmwè dyàkapatèbo bóbò kale *apa* ku cibangidilu adi, bwà kwaluja Bukolè ne dibìikà dyà ku lufù dyà Mukalenge Yesù Kilistò, bimanyinu ne maalu a kukèma àmwèàmwè awu.

²⁷⁷ Ncinyì aci? Mvità yìdi yìkòkangana *apa*, yìkòkangana *pààpa*, yìkòkangana *apa*, yìkòkangana *pààpa*, bàteeta bwà... Maabòmbè a mushinda ne bikwàbò byònsò ki kwenjiibwabì eku, kàdi kaèna mwà kwenza bwalu abu nànsha. Kaèna mwà kwenza bwalu abu to too ne pìikalà beena Yudà batèpè dikùmbudiibwa dyà dibàtiiza dyà Nyumà Mwîmpè. Mwanjèlò wàkamba ne: “Shààlaayi bacikwàte, too ne patwàtwà basadidi citampì,” kì m’Mukàjì-musèla to. Kacya bàà Bisàmbà byà bendè kabàtukù basadidi nànsha; twètù tudi bàà bàà balùme ne bàà bakàjì. Abu mbasadidi, beena Yudà abu. Abraham ùvwa musadidi wa Nzambi. Àlèluuyàh! Mpindyewu, beena Yudà binunu kuvudija ku binunu kuvudija ku binunu. Nzambi wàkapatipisha mwoyi wà Pàlò, bwà kubenzeja bwà kuyabò ku Pàlèstìnà. Nzambi mmupapishè mwoyi wà Hitler, mwoyi wà Mussolini, mwoyi wà Staline. Ùdi munkaci mwà kubàsàka ku bukòlè, mu Pàlèstìnà, kàyi mumanyè cidìye munkaci mwà kwenza to, mwikàle ànu ùkwàta mudimu mu byanza byà Nzambi.

²⁷⁸ Binunu lukàmà ne makùmi ànaayi ne binaayi abu nebìikalè biimàne kuntwaku. Ne òmwè dyà ku matùkù aa, mupròfetà kampànda wa Nzambi, wa cijila, mwela maanyi wa Nzambi neàye kuntwaku mwikàle ne bimanyinu ne maalu a kukèma. Beena Yudà abu nebàmbè ne: “Cìndi mémè nkèba’s ki cyòci aci.” Èyowà’s, mukalenge. Ne Nzambi neàbatiizè beena Yudà binunu lukàmà ne makùmi ànaayi ne binaayi.

²⁷⁹ Ne Dyambwibwa nedilwe; cikondo cyà bàà Bisàmbà byà bendè necijikè. Bòmbè bwà mushindà nebùtaayikè ne nebùkwatè bàà pa buloba. Ne Èkèleeziyà wa bàà Bisàmbà byà bendè neikalè mwambwibwe, bwà kushààla mwimàne mwàmwa mu Bwikadi bwà Nzambi. “Aba mbanganyì bàdì bàpàtukà mu dikènga dinène? Mbasukùle mizàbi yàbò mu Mashi à Mwànà wa mùkòòkò. Bàdì kumpàlà kwà Nzambi, kabàyi katobà to.” Amen.

²⁸⁰ Cimanyinu cyà nyama wa lwonji, nsangilu; maèkèleeziyà, cyena-Kàtòlikè, byònsò abi biswikakaja pàmwè, bibwela mu cimvundù cinène. Bàshààdìlè, Mukàjì-musèla wa Nyumà Mwîmpè.

²⁸¹ Nènku bantu leelù ewu bàdì bàsekà dyakula dyà mu myakulu abu, bàdì bàsekà dyondopa dyà kùdi Nzambi abu, bàdì bàseka cipròfetà abu, bàdì bàsekà òmwè òmwè dyà Nyumà abu; ne nyumà òmwè òmwè wàkàkòòkesha beena Yudà bàà kale abu, bàkàpendà Nyumà Mwîmpè kale wàwa, ne kufwilabò mu

dilumbulwisha dyà Nzambì awu. États-Unis ewu ùdi ne cyà kupicila ku cilumbulwidi cyà Nzambì, ku Bukolè bwà Nyumà Mwimpè. Mbatùpiishe, batwélùlwile, batùkèèke, ne batùbiikile “bansantu babùnguluki bàà mu malaba” ne bikwàbò byònsò. Kàdi díbà’s ndyedi dyákànyì, dyàpòngololà Nzambì dinyooka Dyèndè dyà Nzambì. Amen.

²⁸² Wèwè ikalà mudìlongòlòle. [Katùpà kàà mukàbà wà mèyì munda mutupù–Muf.]...?...Mwaba wùmwèpelè wà dikùbiibwa leelù ewu mmu Kilistò Yesù. Nzambì àkubènèshè. Wèwè kùyi munda to, lwangàna mvità too ne paùdi ubwela. “Aba bàdi mu Kilistò Yesù Nzambì neàlwe naabò pàmwè Nendè ku Dilwa dyà cyàkàbìdi.”

²⁸³ Pa kuumusha citampì cyà Nzambì, cìdi dibàtiiza dyà Nyumà Mwimpè aci, nsangilu wa dipàmbuka awu ki udi cimanyinu cyà nyama wa lwonji. Aci ng’EMU MMÙDÌ MUKALENGE WÀMBA. Nudi bamòne cìndi njinga kwamba aci anyi? Kàdi balongeshi bàà ntèndeleeleu aba mbaswè kucyèla mu communisme, mpàdìbo kabàyi bàjingulula ne cìdi munkaci mwà kukwàta mudimu ànu munkaci mwàbò bòbò biinè mene. Yèyè wàkamba ne: “Nebiikalè bampofò balombodi bàà bampofò.” Wàkamba ne: “Nebiikalè ne mèsù, kàdi kabàyi mwà kumòna to.” Yèyè ne: “Nwènu, ne mu bilèlè byènu, nudi nwamba dilongesha dyà bantu, nukwàtakaja mèyi matùma a bantu, nuvwija mèyi matùma a Nzambì kaàyi ne bwenzeji nànsha bukesè to.”

²⁸⁴ Nwènu’s nenùsekè beena Kàtòlikè bwà kwenza kwàbò kwà kàtèshismù, kàdi bantu bèènu’s bàyaaya ku cisangilu kampànda cyà muyiiki kuntweku anyi cintu kampànda, bàkaswika díyì bwà ne bàdi mwà kwakidila dyondopa dyà kùdi Nzambì, anyi dibàtiiza dyà Nyumà, ne bintu ebi. Bàdi bàCipiissha ne bàCibènga. Kàdi nuseka beena Kàtòlikè. Kanwènakù ne bukenji bwà kuseka beena Kàtòlikè nànsha. Bwalu, pìikalàbi ne yèyè awu ùdi “MUKAJÌ WA MASANDI,” Bible’s mmwambè ne nwènu nudi “NDUMBÀ,” mu yèyè nsangilu umwèumwè awu.

²⁸⁵ “Pàtukààyi munkaci mwèndè, bantu Bàànyì! Ikàlaayi batàpùlùke,” mùdi Nzambì wàmba, “ne Mémè nènwnwàkidilè kùndi Mémè mwinè.” Ncyà bushùwà’s.

²⁸⁶ Kaa, bwà cinyi Branham Tabernacle ewu kàyikù mwà kupàtuka mu mufudì wètù ewu? Ndi muswè kumanya nwènu bantu bàà mu nyùngulukilu emu aba ní nudi nwiitabuujja Èvànjeeliyò ewu. Ne Yèyè mmuyiishìibwe, ne nwènu baMumòne, bimanyinu ne maalu a kukèma, ne bishindikìibwe. Ne byònsò bidì Mukalenge mwambè, mbyenzèke. Díbà adi, mbwalu kaayi ebu mu nyùngulukilu emu, pàndi ngumvwa ne kùdi mapangananganana a bafìkilàngàne ne munda munkaci mwènu, pàndi ngumvwa ne kùdi dikòkanganana? Ndi muswè bwà ùfundè cìdi kaciyi cyènda bimpè kùdi, cìdi pa mwoyi wèbè apu aci, ùcitèèkè pa cyambilu apa, màalabà dilòòlò.

287 Ndi muswè kumòna bwà cinyi èkèleeziyà ewu kênàku mwà kusaluka ne Bukolè bwa Nzambi, ne dibàtiiza dyà Nyumà Mwîmpè, ne bimanyinu ne maalu a kukèma. Mbwalu kaayi ebu's? Mpaasàtâ wenù's ùdi ùCìitabuuja. Nwênù's nudi nuCìitabuuja. Pa nànkù, ncinyi cidì kaciyi cyènda bîmpè kaaba aka? S'kùdì cintu cidì kaciyi cyènda bîmpè. S'bivwa bikèngela bwà mwab'ewu kwikalawù kàleyi kàà bukènkè kàà buloba bujimà. S'bivwa bikèngela bwà mwab'ewu kwikalawù wùdì Makolè a Nzambi, ne myadi ne mbilà, ne dikèbà dyà Nzambi, biikàle byènzeka, muunya ne bufùku. Bwà cinyi katwèna mwà kwikala naabi?

288 “Ndi muswè, kàdi wèwè ngudi kùyi muswè to,” mwàkambà Yesù. “Kwèna muswè to. Lwà ùsumbè kùNdi.”

289 “Ndi mumanyè ne wèwè udi wàmba,” mwàkambàYe, “ne udi ‘mubanji, kùyi ukèngela cintu nànsha cimwè to,’” wàmbila maèkèleeziyà. Yèyè ne: “Wèwè udi wamba ne: ‘Ndi mubanji, ne ncyèna nkèngela cintu nànsha cimwè to. Twètù mbàdi bulongolodi butàmbe bunène.’ Ne kwèna mumanyè to, kàdi udi mukèngeledi wa luse, mupèlè, mukèngi, mpofo, ne butakà, kàdi kùyi mucimanyè to.” Muntu yèyè mu lukutukutu lwà mùshindù awu kàdi mucimanyè, s'neàdipàtùlè mu bwalu abu. Kàdi, wèwè mu mùshindù awu, “kàdi kùyi mucimanyè to!” Kàdi Kilistò mmwambè ne èkèleeziyà mu ditùkù edi yivwa mwà kwikala mu mùshindù awu, kàdi kayi yi micimanyè to.

290 Kàma buumùntù bwèbè bwà nyumà, munanga wanyi, mwanèètù munanga. Twa musùukà wèbè cizàdi, mutùdi mwà kwamba, ne disambila, wamba ne: “Mukalenge Yesù, nkenkètèku. Enzàku bwà mbalululè maalu àànyi dilòòlò edi, kumpàlà kwà mèmè kuya kalààla, bwà njandùlè ne ncinyi cidì kaciyi cyènda bîmpè naanyi. Ndi njikula kwènji bidimu, kàdi ncìyi mmòna bintu byàkambà Yesù ebi to. Bwà ne Yèyè ùvwa mwà kwikala naanyi, ne bintu ebi bivwa mwà kutùngunuka ne kwenzeka, nyewù ncìyi mbimòna to. Ncinyi cidì kaciyi cyènda bîmpè, Mukalenge Yesù?”

291 Ikàlà wa kweyemena. Ikàlà ne meeji matòòke. Lwà ùtwe binù wàkulè Nendè, bu udi wakùla ne mwanèènù wa balùme mpàla ne mpàla. Yèyè neàkusokòlwèlè. Yèyè neàkwambilè. Pandùlùlà musùukà wèbè tupese tupese, ùwàdije mwaba awu. Ambà ne: “Mukalenge Yesù, bu ne bivwa bindòmba dîkù dyànyi, bu ne bivwa bindòmba mwoyi wànyi, bu ne bivwa bindòmba mudimu wànyi, bu ne bivwa bindòmba buumambàlà bwànyi, bu ne bivwa bindòmba kaneemu kàdibo bàmpana mu cimenga emu, nèndondè njila pàmwè ne banyaàbanya badyombola bàà Mukalenge.”

292 Mpindyewu vùlukàayi, Yesù wàkamba ne: “Mushikù wà mbèlu mmubùmbàkàne, ne njila mmubùlàkàne, ne kùdi ànu bakesè bààmupetà. Bwalu mwalàbàle nnjila udi ufla ku kabùtù.” Mùliyò mukwàbò mujimà mu cidimu cyà 54,

“Mwalàbàle mmushikù wà mbèlu wùdì wùfila ku kabùtù, ne kùdì bààbùngì bàdì bàbwelelàku.” Ncyà bushùwà. “Ewu wajimija mwoyi wèndè bwà bwalu Bwànyì neàwùpetè. Ewu udi munangè tatwèndè, mamwèndè, mwanààbò wa bakàji, mwanààbò wa balùme, anyi ní ncinyì cyònsò, kuntàmba MÈmè, kí mmukùmbànyìne kubiikidiibwa ne Ngwanyì nànsha. Ewu watèèka cyanza ku ditempu dyà nkàsu kàdì kukùdimuka e kutàngila paanyimà, kí mmukùmbànyìne cikondo nànsha.” Mwanèètù!

²⁹³ Dìmwè dyà ku matùkù àdì panshì aa, diiyiisha dyà ndekeelu dyà Èvànjeeliyò mulaaba maamyì wa Nyumà Mwìmpè nediyiishiibwè. Dìmwè dyà ku matùkù àdì panshì aa, cingoma cyà ndekeelu necituutè. Dìmwè dyà ku matùkù àdì panshì aa, musambu wà ndekeelu newìmbiibwè. Dìmwè dyà ku matùkù àdì panshì aa, disambila dyà ndekeelu nedyènjiibwè. Dìmwè dyà ku matùkù àdì panshì aa, biibi byà tabernacle nebikangiibwè bwà musangu wà ndekeelu, Bible neàbwikidiibwè pa cyambilu. Ne newikalè mwimàne mu Bwikadi bwà Nzambi, bwà wèwè kulumbulula bwà biwátèèleji dilòòlò edi ebi. Bwalu nebwikalè cinyì dîbà adi? Bwalu nebwikalè cinyì dîbà adi? Pààbuuludiibwà Mukàndà munène awu, bwalu nebwikalè cinyì dîbà adi? Dilòòlò edi pààlwàdì bu bujaadiki, bwalu nebwikalè cinyì dîbà adi? Kaa, mùdì musambu wàmba ne:

Bwalu nebwikalè cinyì dîbà adi?
Pààbuludiibwà Mukàndà munène awu, bwalu
nebwikalè cinyì dîbà adi?
Pìikalà bàdì babènge Musùngidi leelù ewu
abu,
Pààbàlòmbàbo bwà kufilabò kabingilà—Bwalu
nebwikalè cinyì dîbà adi?

²⁹⁴ Mudimu wèbè nyawù wùvwa mukucyàmàkàne mu njila. Baledi bèèbè nyawù bàvwa bakucyàmàkàne mu njila. Mulundà webè mulùme nyawù ùvwa mukucyàmàkàne mu njila. Mulundà webè mukàji nyawù ùvwa mukucyàmàkàne mu njila. Èkèleeziyà webè nyawù ùvwa mukucyàmàkàne mu njila.

Bwalu nebwikalè cinyì dîbà adi? Bwalu
nebwikalè cinyì dîbà adi?
Pààbuuludiibwà Mukàndà munène awu,
bwalu nebwikalè cinyì dîbà adi?
Pìikalà bàdì babènge Mukenji dilòòlò edi abu,
Pàwikalà, pààbàlòmbàbo bwà kufilabò
kablingilà—Bwalu nebwikalè cinyì dîbà adi?

²⁹⁵ Ciwènzà ncinyì pa bwalu abu? S’udi mumanyè cìdì cimanyinu cyà nyama wa lwonji. S’udi mumanyè cìdì citampì cyà Nzambi. Abu bùdì ànu mbwèbè.

Mukalenge ànùbènèshèku, patùdì tujuukila kuulu apa.

²⁹⁶ Taatù wa mu Dyulu wa musàngeelu, luse Lwèbè ne mabènesha bìikalèku pa bantu aba. Nyumà Webè àkwatèku mudimu. Ne Nyuma Mwîmpè Webè àpwekèku pa bantu aba, ne àbàpèèshèku, Mukalenge, dibàtiiza dyà Nyumà. Swàku bwà mulùme yònsò ne mukàji yònsò, mwànà wa balùme ne wa bakàji, mwab'ewu, bìikalèku basalula dilòdòlò edi, kùdi Nyumà Mwîmpè, mu mùshindù wà bàfika ku dyamba ne: “Nzambi, angàtaku byònsò bìndi mèmè naabi. Angàtaku cyònsò cîndi mèmè aci. Kàdi, enzàku bwà Nkusadilè, Mukalenge wanyì. Nènteekè byònsò ku luseke. Nèndilekèlè mèmè mwinè. Nèndekelè maditambishi. Nèndekelè èkèleeziyà. Nèndekelèlè byònsò.”

²⁹⁷ Kí nnè nebikengelè bwà kupàtukabò mu èkèleeziyà wabò to, Mukalenge, kàdi bìdi bikèngela bwà bàpatukè mu ngiikadilù udibò bàsanganyibwamu ne mwoyi awu. Éyi Nzambi, alùjàku ba-Méthodistes ku èkèleeziyà wabò, biikàle bàlàkuka kapyà, bwà kuyiishabò Èvànjeeliyò; alùjàku ba-Baptistes, alùjàku ba-Campbellites, alùjàku beena Kàtòlikè. Mukalenge Nzambi, tùmaku muntu kampàndà wa mu Branham Tabernacle emu, umwaluja mu tabernacle ewu, mwikàle ne nyumà mupòle, mudipwekèshe, wikalakù mwà kuya ne kwakula, ne kunanga, ne kuteeta mwà kufikishakù cyàkàbìdi bantu mu díyi dìmwe, bwà Nyumà Mwîmpè wàmònakù mwà kubwela ne kukwàta mudimu ne bantu. Tùmaku bimanyinu binènè ne maalu a kukèma. Laabàku mwena kwitabuuja yònsò maanyi. Fwàkù luse ku mpèkaatù ne mpèkaatù yònsò.

²⁹⁸ Éyi Nzambi, tudi tumòna bimanyinu bimwèka. Tudi tumòna mucì wà mfigi wèla ntòngà. Tudi tumanya ne cikondo cikaadi pabwìpì. Tudi tumòna bòmbè abu kuntu kwàka mu byanza byà muntu mwinè úwà mwambè ne ki udi mupèèshìibwe bwà kubùtula buloba awu.

²⁹⁹ Éyi Nzambi wa yààya, mmunyi mutùdiku mwà kutungunuka kàbìdi ne kubènga's? Mmunyi's? Pàdìbi ne, tudi tuumvwa Èvànjeeliyò Webè mubènesha awu wèla kangonga kajikùke, kajikùke bikolè; tuumvwa Nyumà Mwîmpè ùlombola; tumòna Nyumà Mwîmpè ùfila bimanyinu ne maalu a kukèma; wòndopa babèèdì, ùtábaja mèsù mafòfòme, wàlujulwila bafwè mwoyi; maalu a kukèma manène ne bimanyinu; Èvànjeeliyò munkacì mwà kuyiishìibwa kùdi bantu bàdi kabàyi bamanyè mukàndà, bapangi, ùyiishìibwa mu Bukolè ne dileeja dyà patòdòkè dyà Nyumà Mwîmpè; bimanyinu ne maalu a kukèma biikàle bìfila èkèleeziyà. Bikwàbò biinè búngibi's wè!

³⁰⁰ Wèwè wàkamba ne: “Bu ne nuvwa bamanyè Mòsà, nunku nudi bamanyè ditùkù Dyànyì.” Àlèluuyàh! Kí mùdìbi kàbìdi nàнку leelù ewu, Mukalenge. Bàdi bàmòna bimanyinu byà mishindù yònsò, byà mvità ne ntàtu, ne bintu byònsò. Enzàku bwà bàbuululè mabèji a Bible munanga wa kale ewu, ne bamòne

mwaba wùdì dikunji dyà ntàntà disanganyiibwa. Tukàadi ku ndekeelu kwà cikondo.

³⁰¹ Éyi Nzambì, nyùkushàku Nyumà Webè kumutù kwà bantu aba. Ne pàdibo bùmuka mwaba ewu apa, dilòòlò edi, swàku bwà Nyumà Mwímpè àye naabò.

³⁰² Nènku mààlabà dilòòlò, Mukalenge, patwàfikà ku dibìikila dinènè dyà ku cyoshelu ditùkaadi tudìlongolola bwà kwenza edi, tudi tulòmba bwà byoshelu bìikalè byùle tètè ne bantu badyüngwijekù, bibambalu byà masambila bìikalè byùle.

³⁰³ Ne swàku, bwà mu dyàlumingu mu dindà, Mukalenge, ne mu dyàlumingu dilòòlò, twìkalè ànu tubàtiiza bantu mwab'ewu bilondèshìle Dìyì dyà Nzambì. Swàku bwà Nyumà Mwímpè ìkalè ànu ùpweka pa màyì awu, ne wènza bimanyinu ne maalu a kukèma. Enzàku nàнку, Taatù.

³⁰⁴ Bèneshàku mpaasàtà wetù munanga ewu. Bèneshàku bidimba. Bèneshàku beenyì bàdi batwëndèle. Swàku bwà twàlukilè mu mèètù dilòòlò edi ne kwelangana kwà meeji pa bintu ebi mu myoyi yètù; twalukila mààlabà dilòòlò, twenda tucyònkomoka, tulwa ne bisàkisaki. Tudi tulòmba mu Dìnà dyà Yesù Kìlistò. Amen.

³⁰⁵ Mukalenge Yesù Kìlistò àbeneshèku yònsò wa kunùdì. Labùlàngànaayi ku byanza muntu ne mukwëndè. Nwàlukilàayi mààlabà dilòòlò, ulwa ne dilòmbà dyèbè ne cyùdì muswè aci, nènku ùcitèèkè pa cyambilu. Nzambì ànùlaabèku, ìkalè neenù! Amen. Nzambì ànùbènèshè.



CITAMPi CYà NZAMBì LUA54-0514

(The Seal Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diitànù mu mapingaja, mu matùkù a ngondo 14 a ngondo mwithànù, cidimu cyà 1954, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org